

## A toukui turu APOSOL

1-2 O Tiopilus, alia e koloto lel uagu i tamölö. Turu buku mam i tar alia u kolotein a mamanaka te katoi e Iesu tara pöata te hatanieien a toukui i tanen, e antunana tara pöata ti lu sei pouts menaien i Kolö. Mamuna te la sei uaien i Kolö, nonei e hala sila naia u raranga turu Namnamei u Göagono turu aposol te hopö kap raien. <sup>3</sup> I murina te mate hakapaien, ba nonei e roron butuna turu aposol i tanen tara man töa man pöata. Nonei e kato sila naia a mamanaka teka tego haröto meraien u aposol, nonei e töatöa hamanana. Nori i tareien tara man tötöa man pöata iahana u tohats u maloto u lan, ba nonei e hatei raneien a Nipepeito tere Sunahan. <sup>4</sup> Tara töa pöata e Iesu e nou gono mer u aposol me poeiena i taren, “Möa tu laba naiam i Jerusalem, hahaloseiam u Namnamei u Göagono te ranga nema e Tamar tego hala raien limiou, alia u hatei has raien limiou. <sup>5</sup> E Jon e baptais ria u katuun u ramun, kaba ema lehana noi ba limiou tena habaptais moua romana turu Namnamei u Göagono.”

### *E Iesu i lu sei menai i Kolö*

<sup>6</sup> Ba pöata ti gono hoboto pon ia u aposol ne Iesu ba nori e rangate ren me poeier, “O Tsunono, Alö e taguhu hamanasa tala ramoura a tei Israel tara pöata teka bara te pile peisa nariou a peisarara?”

<sup>7</sup> Ba e Iesu e poeiena i taren, “Ema limiou nei tego atei sileiam a pöata tsi u lan tsi u hiningal

te haka mei e Tamar a nitsunono peisa i tanen. <sup>8</sup> Kaba limiou e luemou u Namnamei u Göagono tere Sunahan ba nonei te hala ranoui limiou a nitagala. Ba limiou tena ranga hatei namoua lia i Jerusalem na i Judia na i Samaria na turu han hoboto i puta.” <sup>9</sup> E Iesu e ranga hakapa lasi ba nonei te lu sei menari i kolö i matar u aposol. U köasi e hamous kap naien ba nori ema tara lele rien. <sup>10</sup> Nori i tara sei noa has uu i kolö tara makum te sila len, ba huol a katuun e songots buturia i rehiren, u hasobö i taren e hiaka nitöa. <sup>11</sup> Ba huol a katuun teka e poeier, “U katunura i Galili, aha te tuol sile mi limiou bate tara sei uamiou i kolö? E Iesu te lu sei me lilei i Kolö ena mar kopis pouts has uanama romana temar la uala len i Kolö.”

### *A katuun te palis e Judas*

<sup>12</sup> Ba u aposol e laban ner u Pokus tara Ruein Olip ti kaien me la poutsur i Jerusalem. A maroro teka e antunaia temar tataala uaier u Jiu turu Lan u Göagono i taren.\* <sup>13</sup> Pöata tina tukuien i Jerusalem ba nori e sei uaier tara rum iasa ti kaien. Nori ere Pita mere Jon ne Jemis ne Endru, ne Pilip ne Tomas ne Batolomio ne Matiu. Na e Jemis a pien tere Alpius, ne Saimon a katuun te tagala bei a han i tanen, ne Judas a pien tere Jemis. <sup>14</sup> U katuun hoboto teka i gono hoboto bate singo nitöa uaier tere Sunahan. Nori i ka gono has mer a touhaliou, ne Maria e tsinana e Iesu, na u toulana e Iesu has.

<sup>15-16</sup> Tara pöata teka u katunun tsitsilo tere Iesu ti gono hoboto i antunaia turu 120 a katuun. Be

---

\* **1:12:** A töa kilomita.

Pita e takeina me tuol na i mataren me poeiena, “A matsi hahatoulana i tar, u raranga te kana turu Buku u Göagono ega butu hamana koru. U Nam-namei u Göagono tere Sunahan e ranga silama tere tuburara e Devit i manasa me ranga nena e Judas, a katuun te las rema u katuun ti pile kapiin e Iesu. <sup>17</sup> E Judas a töa has i tarara, nonei e ka has ia tara toukui ti kaia ra.”

<sup>18</sup> A moni tara markato a omi te katoeien, i holei a töa makumun tsiktsiki. Ba I murinen be Judas e rusuna ba torinen e tabutuna me talous haka-pana. <sup>19</sup> U katuun hoboto i Jerusalem i hengoin a ka teka me ngöeri a makumun tsiktsiki teka i Akeldama. A solo teka e poeiena “U Tsiktsiki te kamena u Rahatsing.”

<sup>20</sup> Be Pita e poeiena, “I koloto has naia turu Buku u Göagono turu Buk Sam,  
‘A luma i tanen e tatei opingina romana,  
na e möa nou ta katuun tega kaia i tanen.’  
“Na u Buku u Göagono e pei hasena,  
‘A tana katuun e tatei palise nen  
bate lueiena a toukui i tanen.’

<sup>21-22</sup> “A katuun te tataala gono meraiou ra tara mamana pöata ti hula la gono mei ra e Iesu, te taniama tara pöata te baptais raia e Jon u katuun batena antunana tara pöata te laba raia ra e Iesu te lauaien i Kolö, a katuun te tara hamatskö te takei pouts ia e Iesu tara tou mate i tanen, a katuun teka ega tahongoia i tarara.”

<sup>23</sup> Ba nori e hala ner a huol a solo, a töa e Josep ti ngöei e Basabas na tana solo tanen e Jastus, na tai ti ngöei e Matias. <sup>24</sup> Ba nori e singo uar tere Sunahan me poeier, “O Tsunono, alö a töa te atei silem a

torir u katuun hoboto. Haröto ramei lam esi te ngile mölö tara huol a katuun teka. <sup>25</sup> Nonei ega palisi e Judas tara toukui turu aposol te pile naien. E Judas e rus ia tara toukui teka me la uana tara makumun nihahuna i tanen.” <sup>26</sup> Ba nori e hongo hoboter a man hihase tara huol, ba u hihase tere Matias e talous mam nama, ba nonei e hatahongo taleria tara maloto na töa a aposol ba u hihase i taren e onoto poutsuna.†

## 2

### *U Namnamei u Göagono tere Sunahan e kouluma*

<sup>1</sup> Pöata te butuma u Lan u Göagono ti ngöei u Pentikos, u katuun tere Iesu Kristo i ka hoboto ia tara töa makum. <sup>2</sup> Ba töa a ka te olongo here mei u ualupu pan e songots butu nama i Kolö, memi saputu hobotena a iahana luma ti gumien. <sup>3</sup> Ba nori e tareier a ka te here ii u kulupu na te here ii u mia e la kalakalana mena tö ria i bakuna man tötäa man katuun hoboto. <sup>4</sup> Ba nori e saputu hoboto meier u Namnamei u Göagono tere Sunahan, te haranga raien na te hala raien a niatei na nitagala tegi antunan ranga uaien tara man taina man ranga.

<sup>5</sup> U Jiu u para koru ti kamei u nihamana u kapan koru turu han hoboto ti kaia i Jerusalem tara pöata teka. <sup>6</sup> Ba pöata ti getaia u katunun tsitsilo, ba u katuun u parpara e piata hoboto ruma me asingoto koru ner ti hengo menaien ti ranga uaien tara man ranga hoboto i taren. <sup>7</sup> Ba nori e asingoto korur me rangatar, “Alia e poeiegu u katuun te rangar a tei Galili. <sup>8</sup> Ga e hana bara man tötäa te

---

† **1:26:** A maloto na huol a aposol.

hengoera a man ranga i tarara? <sup>9</sup> Ara u katununa tara man provins i Patia na i Midia na i Ilam na i Mesapotemia na i Judia na i Kapadosia na i Pontas na i Eisia. <sup>10-11</sup> Na i Pritsia na i Pampilia na i Itsip na tara man makum i Libia te sukusuku uana i Sairini. Na palair u katunura i Rom, u Jiu hamana na pala halhal ti lu hasi u lotu turu Jiu, na palair u katunura i Krit na i Arebia. Ara hoboto e hengo raren ba nori te ranga ria turu mar ranga i tarara bate hatei ner a man toukui pan te katoe e Sunahan!” <sup>12</sup> Ba nori e asingoto hobotor me lagi hakhakatsir me hia rangrangatar, “Aha nonei koru te markato uana teka?” <sup>13</sup> Kaba palai i ranga hamatsingolo raien me poeier, “U katuun teka e tutu mer a uain.”

*E Pita e ranga ia turu katuun*

<sup>14</sup> Kaba e Pita e tuol gono mer a maloto na töa a aposol me ranga hapanina me poeiena turu katuun, “U katunura i Judia na limiou hoboto te ka mia i Jerusalem, hengo mia i tar ba limiou te atei haniga miou. <sup>15</sup> Alam ema tutu memi a uain temar ranga ua milimiou, taraha a ka e bongbong noana.\* <sup>16</sup> E möa, a ka teka e ranga mam noani e Joel a propet tere Sunahan i manasa me poeiena: <sup>17</sup> ‘E Sunahan e poeiena,  
Tara pöata i murimuri te sukusukun kapa noa  
romana a pöata hoboto,  
alia e katoe gou a ka teka:  
Alia e hala nagou u Namnamei i tar turu katuun  
hoboto.

---

\* **2:15:** HaInglis: nine in the morning. U Jiu i tania meia u lan u lotu tara bongbong bate nou la mer a pal 10 kilok.

A galapien tson i tamilimiou na galapien touhaliou has ena ranga nariou romana u rangan propet.

U hitots i tamilimiou ena tare riou a man hiharöto,

na u tsonpan ena sinasohe riou a man sina-soho.

<sup>18</sup> E manana. Na tara man tsonun kukui puku na touhalioun kukui puku has alia e hala nagou u Namnamei i tar, ba nori tena ranga nariou u rangan propet.

<sup>19</sup> Na lia te haröto nagou a man hiharöto iasa i kolö na manka te butu noua i puta turu tsiktsiki u rahatsing na u tula na u ruhu pan.

<sup>20</sup> I mam te butu noua u Lan u kapan koru tara Tsunono a pitala e kuhil nou na tsihou e rörö here noi u rahatsing.

<sup>21</sup> A Tsunono e taguhu ranou u katuun te singo uaier i tanen, ba nori tema tatei omi roi.’ ”

E Sunahan e mar ranga uu teka.

<sup>22</sup> “Alimiou u katunura i Israel, hengoeiam u raranga i tar. E Iesu na i Nasaret nonei a katuun te hopö kapiin e Sunahan. Na e Sunahan e haleien a nitagala ba nonei te katoeiena a man mirakol pan i matamilimiou, na manka teka e harötein te mana uana e Iesu. Alimiou e atei sile miou a ka teka, taraha nonei e butuia tara han teka. <sup>23</sup> A katuun teka i hala rai limiou, e kukute noahasena a man hakats tere Sunahan te kato mam noahaseien i manasa, ba limiou e kato hamatie men, taraha alimiou u tagala sileiam u katuun u omi gi nila

naïen tara kuruse. <sup>24</sup> Kaba e Sunahan e hatakei poutseïen tara tou mate i tanen. E Sunahan e purese banai e Iesu a kits tara tou mate i tanen, taraha a tou mate ema antuna korui tega pile kap menaien e Iesu. <sup>25</sup> E tuburara e Devit e rangein e Iesu i manasa me poeïena tere Sunahan:

‘Alia u tara nitöani a Tsunono i matar.  
Nonei e kana tara pal matou i tar  
ba lia tema tatei matout gi.

<sup>26</sup> A torir e sasaalana na u raranga i tar e haröto nena a nisasaala i tar.  
Na peisar e hahanei nitöa sile nou a tou takei pouts.

<sup>27</sup> Taraha, alö ema laba namoi u namnamei i tar bate kakana tara makum turu mate. E möa.  
Alö ema haniga namoi tego koreme uu a tsomi i tamölö. E möa.

<sup>28</sup> Alö u haröte ii lia a maroro te la uana tara nitöatöa.  
Na lö e kato hasasaala korue mou lia, taraha alö e ka gono memou lia.’ E Devit temar ranga uu teka.”

<sup>29</sup> E Pita e ranga lel me poeïena, “A matsi hahatoulana i tar, alia e ranga halesala negu e Devit a King i tarara na i manasa e mate hakapa ba nori e honge ren tara kiou, na kioun mate i tanen e ka noa hasina i romana. <sup>30</sup> Nonei a propet, na nonei e atei sil e Sunahan e haleïen u raranga te mana uu iasa. E Sunahan e ranga hatagala hamana mam noani tega hatuol menaien ta töa tara hun katuun tere Devit turu gungum u kapan. <sup>31</sup> E Devit e atei sil a ka teka ba nonei e ranga mam nena e Mesaia a katuun te hopö kapiin e Sunahan. Ba nonei e poeïena, e Mesaia ega takei poutsia tara tou mate

i tanen. E markato uana teka, ‘E Sunahan ema laba naien ba nonei te kakana tara makum turu katuun ti mate. E möa. A tuenrei nen ema koreme ii.’ <sup>32</sup> Nonei e Iesu teka e Sunahan e hatakei poutseien, na alam u tara hoboteien ba lam te habulungana namen. <sup>33</sup> Na nonei e la hakapa uu iasa mena gumna i rehina e Sunahan, be Sunahan e hale neien u Namnamei u Göagono te ranga mam naien i manasa. Na, a ka te tare milimiou na te hengoe milimiou nonei u Namnamei teka te hala rameien lam. <sup>34-35</sup> E Devit ema la sei uai i Kolö, kaba nonei e pei,

‘A Tsunono e pei tara Tsunono i tar:

Gum ia tara pal matou i tar,

e antunana tara pöata te kato ragoua lia u pakö i tamölö  
u kaan töto i tamölö.’

<sup>36</sup> “Bora, hatei raiam a tei Israel: E Sunahan e katoeien a Tsunono na Mesaia, nonei e Iesu a katuun ti hahalosi ra ti nila namia limiou tara kuruse.”

<sup>37</sup> Pöata ti hengoeia u katuun u raranga teka, ba nori e toku korur be ranga meier e Pita na u palair u aposol me poeier, “A matsi hahatoulana, aha tego kati lam?”

<sup>38</sup> Be Pita e poeiena i taren, “Hapolasa ba neiam a man markato a man omi na man hakats a man omi i tamilimiou ba limiou tena habaptais mia tara solona e Iesu Kristo ba man markato a man omi i tamilimiou te luba nariou ba limiou te lue miou u Namnamei u Göagono i tanen. <sup>39</sup> U Bulungana u Niga teka e la uana i tamilimiou na tara galapien has i tamilimiou i murimuri. Na nonei e la has uana turu katuun hoboto te ka ria turu



han i lehana na turu katuun hoboto te ngö rena e Sunahan.”

<sup>40</sup> Be Pita e hatei has raneien u raranga u parpara lel me ranga hataatagina i taren me poeiena, “Haneiam! Alimiou e namots lu hase miou a nihahuna te la uanama turu katunura i romana.” <sup>41</sup> U katuun ti hengoe u ranga i tanen bate sasaala meren i baptaisir. E sulusukuia turu 3,000 turu katuun ti baptaisir nonei turu lan teka temi hahonoto gono mer u katunun tsitsilo.

<sup>42</sup> Nori i ha hengo hanigan töaia turu hihatuts turu aposol bate singo gono meraren tere Sunahan, na nori i nou gono has mer u aposol.

### *U katuun ti hamana i ka haniga hoboto*

<sup>43</sup> Ba u aposol e katoeier u mirakol u parpara, ba u katuun e matout korur. <sup>44</sup> U katuun ti hamana i ka hoboto bate hiamolamola ner a mamana i taren. <sup>45</sup> Nori i haholin a manka i taren bate molamola naier a moni turu katuun hoboto ti möa ta moni. <sup>46</sup> Turu mamana u lan nori i la hoboto uu tara Luman Lotu Pan tina singo hoboto uaian na nori i nou hoboto mei u hakats u niga na nisasaala pan. <sup>47</sup> Nori i solosei nitöani e Sunahan bate ka mer a niniganiga turu katuun ti ka hoboto meraien. Na turu mamana u lan a Tsunono e halasei susuli u hihase turu katuun u tsimus ti hamanaia tere Iesu Kristo.

## 3

### *A töa katuun a mou omi e niga pouts*

<sup>1</sup> Turu töa u lan e Pita mere Jon i la uu tara Luman Lotu Pan tara pal 3 kilok tara lahi, a pöatan singo. <sup>2</sup> Ba töa katuun a mou omi te söata hatasue ria tara tamana ti ngöei “A Tamana a Niga.” E

tsinanen e mar posa noahas menaien teka. Turu mamana u lan nonei i söata nitöa menai tara tamana teka, tega singo be me naien a peisanen ta tsi moni turu katuun ti tasuia tara Luman Lotu Pan. <sup>3</sup> Tara pöata te tareien ere Pita mere Jon ti katsin tasu uaien, ba nonei e singoe iena ta tsi moni i taren. <sup>4</sup> Ba nori e tara tötoso uaiier i tanen be Pita e poeiena, “Tara uama i tamulam!” <sup>5</sup> Ba nonei e tara uana i taren me hakats nena tega lu menaien ta ka i taren.

<sup>6</sup> Be Pita e poeiena i tanen, “Alia u möa ta moni, kaba lia e hale goilö a ka te ka megou lia. Tara solona e Iesu Kristo na i Nasaret, alia e ranga megou lö, alö go tataala!” <sup>7</sup> Be Pita e lueiena a pal matou i tanen tega hatakei menien, ba man pit-pitana u mou na man pagpagotona man mounen e tagala poutsur. <sup>8</sup> Ba nonei e kurapa seinä me tuoluna me tanian tataalana! Ba nonei e tasu gono merena ere Pita mere Jon i Luman Lotu Pan, me kurapa lalana me soloseiena e Sunahan turu ranga i tanen! <sup>9</sup> U katuun hoboto i tara te tataala uaien ba nori e soloseir e Sunahan. <sup>10</sup> Ba nori e töan tara marei taler nonei lasi a katuun te roron singo ta moni te gumien tara Tamana a Niga. Nori i asingoto koruni a ka te butuia tara katuun teka.

### *Pita e rarareia iahana Luman Lotu Pan*

<sup>11</sup> U katuun hoboto i asingoto koru me piata uaiier i taren, tara makum ti ngöei a “Luman Oho tere Solomon” i rehina Luman Lotu Pan. Na nonei a katuun teka e pile noahas ia tere Pita mere Jon. <sup>12</sup> Be Pita e tara ranen me poeiena i taren, “Alim-iou u katunura i Israel e asingoto koru namiou a ka teka bate tara tötoso uamuma i tamulam? Kaba a katuun teka ema niga mela lei a nitagala peisa

i tamulam tsi a markato a niga i tamulam bate tataalana. E möa. <sup>13</sup> A Sunahan tere Abraham mere Aisak na e Jekop na u tuburara i hala sei a solona a katunun kui i tanen e Iesu. Nonei a katuun teka tu hala mena milimiou turu katuun ti paköeien. Na e Pailat a gamman e ngilin purese e Iesu bate lana, kaba limiou u tori tsuga namen i matana e Pailat. <sup>14</sup> Nonei a katuun a matskö na niga koru, kaba limiou u tori tsuga namen. Alimiou u singo tsipon nemi e Pailat ega hapurese berami limiou a katuun a hhipuli. <sup>15</sup> Alimiou u atung hamateiam a Mouna a Nitöatöa. Kaba e Sunahan e hatakei poutseien tara tou mate i tanen, na lam u tari a ka teka bate hahatei namen. <sup>16</sup> A markato te hamana mena milam e Iesu na te haniga mena milam a solonen, nonei a markato te hatagala poutse lala a katuun teka te tare milimiou na te atei sile milimiou. E Iesu te habuti a nihamana i tamulam, na nihamana teka te kato haniga poutse lala a katuun teka i matamilimiou hoboto.

<sup>17</sup> “A man hahatoulana, alia e atei silegu a ka omi teka u kato memi limiou na pal kapan has i tamilimiou a nitutu. <sup>18</sup> Ba tara markato teka be Sunahan te kato hantoeiena u raranga i tanen ti hatei mamin u propet hoboto, te poeiena e Mesaia ega sagohi a kamits pan, na e Sunahan e kato hamana noa hasi a ka teka. <sup>19</sup> Paliseiam u hakats i tamilimiou bate habirits ua miou tere Sunahan, be Sunahan te luba nanou a man markato a man omi i tamilimiou. <sup>20</sup> Te markato uamou limiou teka, ba Tsunono te habute nou a nitagala a tsimus i tamilimiou, ba nonei te hala pouts has mena namei romana e Iesu i tamilimiou, nonei e Mesaia te hopö kap mam beraien limiou. <sup>21</sup> Nonei ega

ka buia i Kolö e antunana te butu nama romana a pöata te kato hatsimuse noa e Sunahan a man ka hoboto, temar ranga sila uaia e Sunahan turu propet u matskö i tanen i manasa. <sup>22</sup> E Mosis e pei, 'E Sunahan a Tsunono i tamilimiou e habute nou romana a töa propet turu toulamilimiou i murimuri bate taguhu ranou limiou, kato has uana te markato has meien lia. Alimiou go hengoeiam a mamana te ranga mera neien limiou. <sup>23</sup> Ere si u katuun tema hengoe roi a ka te ranga nanou a propet teka, e lu kata raroua turu katuun tere Sunahan ba nori tena taia riou.'

<sup>24</sup> "E Samuel na u palair u propet has ti butu hamurimurima i tanen, nori hoboto i rangein a pöata te kana i romana. <sup>25</sup> Alimiou u pal katuun turu propet. Na limiou u katuun te lu hasemiou a manka turu ranga hamana te hale ii e Sunahan u tubumilimiou. Nonei e pei tere Abraham, 'Alia e kalala sila ragoua a man hun katuun hobotora i puta tara pala i tamölö.' <sup>26</sup> Be Sunahan e hopö kap nena a katunun kui i tanen e Iesu, me hala mam mena meien i tamilimiou tega kalala meraien limiou. Nonei e ngilin habirits ba ranei limiou a man markato a man omi i tamilimiou."

## 4

### *E Pita mere Jon i haka raia turu Kout Pan turu Jiu*

<sup>1</sup> E Pita mere Jon i ranga noahas ia turu katuun, ba u pris na tson pepeito kap turu polis ti tara kapiin a Luman Lotu Pan na u Sadiusi e la uarima i taren. <sup>2</sup> Nori i raharaha koru mei ti hatuts meraien u katuun, e Iesu e takei poutsia tara tou mate, e

haröto nena u katuun ti mate hakapa e takei pouts has riou. <sup>3</sup> Ba nori e pile kap raier ere Pita mere Jon me karabus raren tegi kout meraien turu tanu lan, taraha a ka e lahi hakapa. <sup>4</sup> Kaba a katuun a parpara koru ti ka me hengoeier u raranga i taren me hamana korur, me hapara lel raier a pala ti hamana mamia tere Iesu. Na u hihase tara pal tson hoboto e sukuukuia turu 5,000.

<sup>5</sup> Ba turu hamahö ba pal kapan turu Jiu na u tson hihatuts tara Lo e gono hoboto ria i Jerusalem. <sup>6</sup> Nori i gono hoboto mei e Anas a tsunono pan turu pris, na e Kaiapas ne Jon ne Aleksenda, na palai has ti pala uu tara tsunono pan turu pris. <sup>7</sup> Ba nori e hatuol raria a huol a aposol i mataren me rangata raren me poeier, “Ime tu lue ma limiou a nitagala tu kato haniga pouts memi limiou a katuun teka? Alimiou u kato memien a solo teresi?”

<sup>8</sup> Ba u Namnamei u Göagono e saputena e Pita me ranga palis uana i taren, “Alimiou u pal kapanira i Israel na u tsunono. <sup>9</sup> Alimiou e rangata ramou lam i romana tara ka a niga te katoi lam ti kato haniga pouts menai lam a katuun a mou omi na ime temar niga pouts uaien. <sup>10</sup> Alia e ranga hatei mera goulimiou hoboto na u katuun hobotora i Israel. A katuun teka te tuoluna i matamilimiou e niga pouts mei a nitagala tara solona e Iesu Kristo na i Nasaret. Nonei tu hanila namia limiou tara kuruse be Sunahan e hatakei pouts noa hase nen tara tou mate. <sup>11</sup> Nonei e Iesu a katuun te ranga nena u Buku u Göagono bate poeiena, ‘Alimiou e heremi u katuun te hatakeier a luma. Na katuun teka e here ii a hatu tu rama naiam limiou.

Kaba nonei a hatu te niga balana tara toukuina tara luma.’

<sup>12</sup> “E möa ta taina ta katuun tega tatei lu pouts merai u katuun tere Sunahan. Tara mamana han hoboto i puta, e Sunahan ema hanige ii ta taina ta katuun tega tatei lu pouts merai ra tere Sunahan. E Iesu puku lasi.”

<sup>13</sup> Nori i asingoto koru ni timar ranga hatagala uu ere Pita mere Jon batema matout ri, me tara marei haser a huol a katuun teka ima la meia tu skul pan. Nori i asingoto koru me tara marei taleier ti lala gono menaien e Iesu i manasa. <sup>14</sup> Ba nori e hahalongolo mer ti tara menaien nonei a katuun ti kato haniga poutsi bate tuol gono meraiena ere Pita mere Jon. <sup>15-16</sup> Ba nori e ranga meraier a huol a aposol egi lakasa, ba nori te hirari ria i taren pouts. Ba nori e poeier, “A saha ka te katoe roura i taren? U katuun hoboto te ka ria i Jerusalem e atei siler ti kato menaien u mirakol pan teka, na ra ema tatei holis narien. <sup>17</sup> Kaba aragi ranga hatagala meraien ba nori tema tatei hala lel nari tu raranga tara palair u katuun tara solona e Iesu. Taraha, u bulungana teka e namots hula la na turu katuun hoboto.”

<sup>18</sup> Ba nori e ngö hatasu pouts raren, me ranga hatagala mera rien tegima rarare lel menaien e Iesu, na tegima hihatuts lel has menaien a solonen.

<sup>19</sup> Bere Pita mere Jon e ranga palis raren me poeier, “Alimiou peisa tego hamoue iam a saha ka te nigana i matana e Sunahan. Alam ego hengo raiou limiou, tsi alam go hengoi e Sunahan? <sup>20</sup> Alam ema antunan hahalongolo ba nami a ka tu tari lam na tu hengoe lam.” <sup>21</sup> Ba pal kapan e ranga

hatagala lel mera ren me töan hapurese raren. Nori ima sabe ii ta markato tegi mar hahuna sila meraien, taraha u katuun hoboto i ranga me soloseier e Sunahan tara ka te butu. <sup>22</sup> Taraha, a katuun te butu ia u mirakol teka e kamei u tohats u maloto u hiningal, nonei e lan tsonpan hamanasa.

*U kristen i singo sil tegi tagala uaien*

<sup>23</sup> Ba nori e hapurese raier ere Pita mere Jon ba nori e la pouts uaien turu katuun i taren mena hatei rarien a manka ti rangein u pris pan na pal tsunono. <sup>24</sup> Pöata ti hengoien, ba nori e gono hobotor me singo uaien tere Sunahan me poeier, “O Tsunono, alö tu kato u kolö na u puta na u tasi na mamanaka te ka ria i taren. <sup>25</sup> I manasa u Namnamei u Göagono i tamölö e ranga silaia tere Devit e tubumulam a katunun kui i tamölö me poeiena:

‘U palair u katuun i raharaha koru.

Nori i mastein korupaköni a Tsunono.

<sup>26</sup> U tsunono pan turu han i puta i tuol me hanei siler a hiatatung.

Aa, u katuun u kapan i gono hoboto sil tegi hiatatung

gono menaien a Tsunono e Mesaia.’

“U Namnamei u Göagono temar ranga uu teka.

<sup>27</sup> Na ka teka e butuia i Jerusalem. U mana koru, e Herot a King na e Pontias Pailat a gamman i gono hoboto mer a pal kapan i tamulam u Jiu na u katuun halhal. Nori i gono hobotoia tara taun teka tegi kato homi menaien e Iesu, nonei a katunun kui a Göagono i tamölö tu hopö kap mamin lö tego Mesaia. <sup>28</sup> Tara nitagala i tamölö na turu ngil i tamölö, alö u kits hakapi u raranga tara

manka teka tega butu. Ba nori u katuun e gono siler tegi kato menaien a mamana teka. <sup>29</sup> O Tsunono, alö go tara tala, te ranga sil mena rien u katunun kui i tamölö, hatagala ramou lam ba lam te ranga hatagalam batema tatei matoutmi. <sup>30</sup> Alö go harötein a nitagala i tamölö bate kato haniga pouts rem u katuun te ka mer a siki, bate katoeiem u mamana mirakol tara nitsunono tere Iesu a katunun kui a Göagono i tamölö.”

<sup>31</sup> Tara pöata ti singo hakapaien, ba makum ti gono ien e tagasina. Nori hoboto i saputu mei u Namnamei u Göagono me tanian hatei ner u raranga tere Sunahan, nori ima matout ii.

*U katuun i hiamolamola hobotein a mamana i taren*

<sup>32</sup> A pala ti hamana i ka mei u töa puku u tori na u töa puku u hakats. E möa ta töa i taren tega ranga bate poeiena, “A manka teka, a manka pepeisa i tar.” E möa. Kaba mamana hoboto i taren era manka hobotoien. <sup>33</sup> U aposol i hatein u raranga te takei pouts uu a Tsunono e Iesu, na u ranga i taren e tagala koru. Be Sunahan e hala hoboto raneien a nisasaala pan. <sup>34</sup> E möa ta töa i taren tega makmakum ban ta ka. U katuun ti kamei u tsiktsiki tsi a luma i hahol naien, ba nori emi piou pouts ner a moni tara manka ti hahol naien. <sup>35</sup> Ba nori emi hala narien turu aposol, ba u aposol e molamola rarien u katuun hoboto e antunaia timar makmakum hapopoien tara mamana.

<sup>36</sup> Hena, a töa katuun a solonen e Josep te tuhanaia tara tolo i Saiprus na te hatubunaia tere Livai. U aposol i ngöeien e Banabas. A mouna solo teka e poeiena, “A katuun te katoena u rangen



hitaguhu.” <sup>37</sup> Nonei e haholin a makumun tsikt-siki i tanen, memi piou nena a moni te lueien turu aposol.

## 5

### *Ananias na e Sapira i mate*

<sup>1</sup> E kamei a töa katuun a solonen e Ananias, na tahol i tanen e Sapira. E Sapira e atei sil hasi te hahol menai e Ananias a töa makumun tsiktsiki i taren. <sup>2</sup> Na tahol i tanen e atei has te pile kap pouts menai e Ananias a hapalan moni tara hiholina u tsiktsiki. Ba nonei ena hala ranei u aposol a hapalana a hihol. <sup>3</sup> Be Pita e poeiena i tanen, “O Ananias, aha tu hengo sile ii lö u hiamus tere Satan balö te gamoeiem u Namnamei u Göagono? Alö u pile kap pouts sil nai a hapalana moni ti hole ii u tsiktsiki, aha? <sup>4</sup> Tima hol noei u tsiktsiki, u tsiktsiki peisa i tamölö. Na i murina tu hahol naien lö, alö u kato meien u ngil peisa i tamölö. Ga ime tsiponi tu mar hakats uu lö balö te katoeiem a markato a omi teka? Alö ma gamo rai lam, kaba alö u gamoe e Sunahan.” <sup>5</sup> Pöata te hengoeia e Ananias a ka teka ba nonei e rusuna me tuhamate nitöa nena. Na u katuun hoboto ti hengoein u bulungana teka i matout koru. <sup>6</sup> Ba u katuun u hitots e tasur mena pitseren, me söata halakase ren mena kaho naren.

<sup>7</sup> A topisa aua e la hakapa ba tahol i tanen e Sapira e tasu nama. Kaba nonei ema atei sile ii a ka te butu. <sup>8</sup> Be Pita e poeiena i tanen, “Hatei moulia, nonei lasi a hihol hoboto turu tsiktsiki teka tu lueiam limiou u mun tahol?” Ba tahol e poeiena, “Aa, nonei lasi a hihol hoboto.”

<sup>9</sup> Be Pita e poeiena i tanen, “Alimiou u kitseiam u ranga tego torohana mena milimiou u Namnamei tara Tsunono? U katuun te kaho narima a tson i tamölö e ka ria tara tamana. Nori e söata halakasa hase riou lö!” <sup>10</sup> Ba tahol e rus na i mouna e Pita me matena. Ba u hitots e tasu rima me tarer a tahol e mate hakapa, ba nori e söata halakase ren mena kaho narien i rehina a tson i tanen. <sup>11</sup> U katuun hoboto tere Kristo na u katuun hoboto has ti hengoein a ka teka i matout koru.

### *U mamana u mirakol e butu*

<sup>12</sup> U aposol i katoi u mamana u mar mirakol i gusur u katuun. U katuun ti hamana i gono hobotoia tara makum te ngöeri a Luman Oho tere Solomon. <sup>13</sup> U katuun tima hamana ii ima la ua ii ti kaien kaba nori i hala raien u pannen koru u tara marei. <sup>14</sup> Kaba a para tson na tahol i hamana mena tapo raier a pala tara Tsunono. <sup>15</sup> Ba u katuun e söata halakasa merari u katuun ti ka mei a siki i kalana mena hopö rarien tara man inana na man holholasa. Nori i markato uu teka ba pöata te la ma e Pita ba u oho tanen te kopo rena a palai i taren bate kato haniga pouts ranen. <sup>16</sup> U katuun u parpara ti lama turu han ti ka hahis a taun i Jerusalem emi piou hasir u katuun ti ka mei a siki na u katuun has ti ka mei a lillahanei, nori i kato haniga hoboto poutsir.

### *U aposol i kato homir*

<sup>17</sup> Ba tsunono pan turu pris na u katuun ti ka gono meien, a pala turu Sadiusi, e hiomi koru ria turu aposol. <sup>18</sup> Ba nori e pile kap raier u aposol me haka rarien tara luman karabus. <sup>19-20</sup> Kaba tara bong ba angelo tara Tsunono e kalatena a tamana

tara luman karabus me halakasa rena u aposol me poeiena i taren, “Na tuol mia iahana Luman Lotu Pan bate hatei rami u katuun u raranga hoboto tara markato a tsimus teka.”

<sup>21</sup> Pöata ti hengoeien u raranga teka, ba nori e la uaier tara Luman Lotu Pan tara bongbong koru mena hihatuts ria turu katuun. Ba tsunono pan turu pris na pal kapanira i Israel e ngö gögono merari a pal kapan hoboto turu Jiu turu hagum turu Kout Pan, ba nori e hala ner u ranga tara luman karabus tegimi piou meraien u aposol i mataren. <sup>22-23</sup> Ba pöata tina tukuia u polis, ba nori ema sabe rari u aposol tara luman karabus. Ba nori e la pouts uarima turu Kout memi hateir, “A pöata tena tuku mula lam tara luman karabus, alam ena sabie mula a man tamana e pili hakarapoto koru lala, na u tson pepeito kap e tuol has rima turu tamana. Kaba pöata te kalate muma lam u tamana, alam ema sabie mumei ta töa iogana.”

<sup>24</sup> A tson pepeito kap turu polis ti tara kapiin a Luman Lotu Pan na u pris pan i hengo a ka teka me hakats hapara koru ner a ka te butuia turu aposol.

<sup>25</sup> Ba töa katuun e tasu nama me poeiena i taren, “Hengoiam! U katuun tu haka ramia limiou tara karabus e tuol ria iahana Luman Lotu Pan, nori lahas te hatuts rer u katuun!” <sup>26</sup> Ba tson pepeito kap e la gono merena u polis i tanen mena lu pouts rarima u aposol. Kaba nori ima atung rai u aposol, taraha nori i matouti tegi titi hatu meraien u katuun.

<sup>27-28</sup> Ba nori emi piou pouts raria u aposol i gusuna u Kout Pan, ba tsunono pan turu pris e rangrangata ranen me poeiena, “Alam u hapiou

hatagala koruni tegoma hihatuts mena milimiou a solona e Iesu. Kaba limiou u hasaputu hobotemi u hihatuts i tamilimiou a han i Jerusalem. Alimiou e hasösö noahas mera milam a nimate tere Iesu.”

<sup>29</sup> Be Pita na u palair u aposol e ranga palisir me poeier, “Alam ema tatei kukutiemi u ranga i tamilimiou! Alam e kukute lasem u raranga tere Sunahan. <sup>30</sup> Alimiou tu nila naiam e Iesu tara kuruse me kato hamatie men, kaba a Sunahan turu tuburara te hatakei poutseien tara tou mate.

<sup>31</sup> Be Sunahan e lu sei mena neien iasa tara pal matou i tanen, nonei a Tson Mammam na Tson Hihitaguhu. Nonei i lu sei sileien tegi palis menai u katunura i Israel u hakats na markato a omi i taren, ne lu sei sil haseien tego luba menaien a markato a omi i taren bate tara pouts uana i taren. <sup>32</sup> Alam na u Namnamei u Göagono u tarei a manka teka te kato e Sunahan me hatei namen. Be Sunahan e hala has nena u Namnamei u Göagono turu katuun te kukutier u raranga i tanen.”

<sup>33</sup> Pöata ti hengoeia a pal kapan u ranga teka, ba toriren e si koruna ba nori e katsin atung hamate rer u aposol. <sup>34-35</sup> Kaba a töa a Parasi e kaia turu hagum pan teka, nonei a katuun pan turu Kout, a tson hihatuts tara Lo, na u katuun i tara marei korueien. A solonen e Gamaniel, e tuol ia i gusuren me hatei nena u aposol gi halakasa bir. Ba nonei e poeiena turu Kout, “U katunur i Israel, alimiou go hakats mam naiam a ka te ngilin katoe milimiou turu katuun teka. <sup>36</sup> Ema manasa korui a töa katuun a solonen e Tiudas e pei hasi, ‘Alia e ka megu a nitagala.’ U 400 tara katuun i hamaneien. Kaba a gamman e atung hamateien, ba u katuun hoboto ti hamanaia i

tanen e la kalakalar ba u hihatuts e tia hakapana. <sup>37</sup> I murinen, tara pöata ti hopö naia u katuun a soloren tara gamman, be Judas na i Galili e takei has mena eno hakats ba katuun a para e kukute hasenen. Kaba nonei i atung hamate hasi, ba u katuun hoboto ti hamaia i tanen e la kalakala hasir. <sup>38</sup> Na tara ka tala teka i romana, alia e hatei ragou limiou, alimiou goma katoemi ta markato ta omi i taren. Haka raiam. Te taniama a toukui teka tara katuun tuun, nonei ema takui noi. <sup>39</sup> Kaba te taniama a toukui teka tere Sunahan, alimiou ema antunan luba ramoiem. Alimiou e namots hiatatung gono me miou e Sunahan!”

Ba pal kapan e hengoer u ranga tere Gamaliel. <sup>40</sup> Ba nori e ngö hatasu pouts raier u aposol me hasingata raren. Ba nori e ranga hatagala mera rien tegima kato lel menaiem u ranga tara solona e Iesu, ba nori e hapurese raren. <sup>41</sup> Bu aposol e laba ner u Kout, me sasaala koru siler te haniga meraiem e Sunahan tegi kamits sil menaiem a solona e Iesu. <sup>42</sup> Na turu mamalu lan, tara Luman Lotu Pan na turu luma has turu katuun, nori i hahatei nitöani u Bulungana u Niga bate hihatuts ner e Iesu nonei e Mesaia, a katuun te hopö kapiin e Sunahan tega taguhir u katuun i tanen.

## 6

### *A tohit a katuun i taguhir u aposol*

<sup>1</sup> Tara man pöata teka u hihase turu katunun tsitsilo e para susul. U katuun ti atei sil u rangan HaGrik i raharاهر u katunura i Hibru u amoaba i taren ima tara sil rai tara pöata ti molamola naia a kannou. <sup>2</sup> Ba maloto na huol a aposol e ngö

gögono rer u katunun tsitsilo hoboto me poeier, “Ema niga koru nei tego hapolasan hahatei menai lam u raranga tere Sunahan bate tara kap nem a kannou. <sup>3</sup> Alimiou go hopö kap raiam a tohit a katuun i gusumilimiou te ka mer a solo a niga i matar u katuun, na u Namnamei u Göagono ega saputuia i taren bate ka meier a niatei a niga. Ba ra te haka raiera u katuun teka egi tara kapiin nonei a toukuin kannou teka. <sup>4</sup> Ba lam te kui nitöa moua tego singo u lam tere Sunahan na tego taguhu has merailam u katuun turu raranga tere Sunahan.”

<sup>5</sup> U katuun hoboto i haniga korui u raranga ti katoi u aposol. Ba nori e hopö kap naier e Stiven, a tson te ka mei u nihamana u kapan na te saputu mei u Namnamei u Göagono. Ba nori e hopö kap has naier e Pilip ne Prokoras ne Naikena ne Timon ne Pamenas na e Nikolas. E Nikolas a katununa i Antiok te la uama tara pala turu Jiu. <sup>6</sup> Ba nori e hatuol raria u katuun teka i matar u aposol, ba nori e singo uaier tere Sunahan me hatakope ria a limaren i taren tega kalala meraien e Sunahan tara toukui i taren.

<sup>7</sup> U raranga tere Sunahan e tasata susul noahas. Na u hihase turu katunun tsitsilo i Jerusalem e para susul koru hamanasa tala, na para koru has a man pris turu Jiu i hengo koru talei u nihamana teka.

### *Nori i pile kapiin e Stiven*

<sup>8</sup> E Sunahan e haniga korui e Stiven me hale neien a nitagala a kapan, nonei e katoe u mirakol e gono i gusur u katuun. <sup>9</sup> Ba palair u katuun e tanian raharاهر e Stiven. Nori a pal katuun tara töa luman lotu turu Jiu ti ngöei a luman lotu turu

Friman.\* Nori u katunur i Sairini na i Aleksenria na i Silisia na i Eisia. <sup>10</sup> Kaba u Namnamei tere Sunahan e hale ii e Stiven a niatei a niga koru, nori ima antuna ii temar ranga sila uu e Stiven. <sup>11</sup> Ba nori e hol raier a palair u katuun tegi pei menaien, “Alam u hengoi te ranga homi menaien e Mosis na e Sunahan!” <sup>12</sup> Ba nori e hala ner u ranga te kato harahahir u tsunono na u tson hihatuts tara Lo. Ba nori ena tarer e Stiven me pile kap naren mena piou narien i matana u Kout Pan. <sup>13</sup> Ba nori e hatuol rer u katuun tegimi gamo uaien bate poeier, “A katuun teka e roron ranga homi nena a luman lotu a Göagono i tarara na Lo has tere Mosis. <sup>14</sup> Taraha, alam u hengoei te pei menaien, ‘Nonei e Iesu ni Nasaret e kato rure nou a Luman Lotu Pan bate palise nou a man markatona i manasa te hala raira e Mosis!’ ” <sup>15</sup> U katuun hoboto ti gum ia turu Kout i tara tötoso uu tere Stiven me tarer a matanen e here ii a matana a angelo.

## 7

### *E Stiven e rangaia i matana u Kout Pan*

<sup>1</sup> Ba tsunono pan turu pris e rangatena e Stiven, “U ranga teka e manana?” <sup>2-3</sup> Be Stiven e ranga palisina me poeiena, “A matsi hahatoulana na matsi hahatamana, hengo iam! A Sunahan turu ualesala e butuia tere tuburara e Abraham tara pöata te ka ien i Mesopotemia ba nonei tema la noanei i Haran, me poeiena, ‘Alö go laban a hun katuun na han i tamölö ba lö te lauam tara han te hatare goi lia alö.’ <sup>4</sup> Ba nonei e laba nena a han i Kaldia mena kana i Haran. Ba i murina te mateia

---

\* **6:9:** U katuun tima kamei ta markato tega pile kap raien.

e tamanen, be Sunahan e hala mena meien tara han te ka tala mia limiou teka.

<sup>5</sup> “E Sunahan ema hale ii e Abraham ta makum turu tsiktsiki teka ba nonei te tatei teie nen. E möa koru ta tsitabubun tsiktsiki tega solosolo meien. Kaba e Sunahan e ranga hamanein tega hala menaien u tsiktsiki teka i murimuri, ba nonei te tatei tei gono mera nen u hatutubunei tanen i murimuri. Kaba e Abraham e möa noa ta töa ta pien tara pöata te katoeia e Sunahan u ranga hamana teka. <sup>6</sup> E Sunahan e mar ranga uu teka i tanen me poeiena, ‘U tubumölö i murimuri ena ka roua tara palair u han turu tana u katuun, ba nori tena hakukui puku rariou bate kato homi rariou e antunanoa turu 400 u hiningal. <sup>7</sup> Kaba lia e hahuna ragou romana u katuun te hakukui puku rarouen, ba i murimuri ba u katuun i tar te laba narima romana nonei a han te kukui puku rien batemi hatsunone roua lia tara han teka.’ <sup>8</sup> Be Sunahan e hale nei e Abraham a markato te hapö menari a hatöatongo tere Sunahan turu pikpikö, bate haröto nena u raranga te kits gono mei e Sunahan e Abraham e manana. Be Abraham e hatuhanena e Aisak me pöena a pikpikönen turu hatöalina u lan ti poseia e Aisak. Be Aisak e hatuhanena e Jekop me kato has mena neien iesana. Be Jekop e hatuhana rena a maloto na huol a pien tson me kato has mera neien iesana. Na nori tala u tuburara.

<sup>9-10</sup> “A man munmun toulana teka i hiomia tere Josep me hahol naren, ba nonei ena kukui pukuna i Itsip. Kaba e Sunahan e ka gono meien, me luba naneien a mamana nomi hoboto te butuia i tanen. Ba pöata te butuia e Josep i matana e Pero a



Kingina i Itsip, be Sunahan e haniga korue nen me hale neien a niatei a niga. Ba e Pero e hopö kap sile nei e Josep tega pepeito kap menaien a mamanaka tere Pero na u katuun i tanen na han hoboto has i Itsip. <sup>11</sup> Ba bes pan e butuna tara mamana han i Itsip na i Kenan has. A bes teka e pan koru, ba u katuun e bes homi korur. Ba u tuburara ema antunan sabe nari ta kannou. <sup>12</sup> Be Jekop e hengo nena te ka uu a kannou i Itsip, me tula rena a galapien tson i tanen tara tou la tutuun. <sup>13</sup> Tara hahuoluna a tou tataala, be Josep e halakasena nonei e si koru turu toulanen, te töan atei sil haseia e Pero a hun katuun tere Josep. <sup>14</sup> Be Josep e hala nena u raranga tere tamanen e Jekop me hatei nena tegi la hakapa hoboto koru uamen i tanen i Itsip. Nori i antuna hobotoia turu 75 tara katuun. <sup>15</sup> Ba e Jekop e la uana i Itsip tena kaien, te mate has ien, na galapien has i tanen, nori u tuburara. <sup>16</sup> A tsinö ren ina kaho raia turu kahokaho te holeia e Abraham tara pala tere Hamor i Sikem.

<sup>17</sup> “A pöata e sukusuku tala tego butu hamanaia u ranga hamana te kato e Sunahan tere Abraham, kaba u hihase turu katuun tarara i Itsip e para susul. <sup>18</sup> Kaba a tana king e pan lel ma i Itsip tema atei silei e Josep. <sup>19</sup> Nonei e gamoer u katuun i tarara me ranga meraiena u tuburara tegi laba meraien a man göama i taren ielesala bate mater. <sup>20</sup> E Mosis i poseia nonei tara pöata teka na nonei e taratara haniga koruia i matana e Sunahan. Tara topisa a tsihou e tamanen na e tsinanen i taratara kap naien i luma i taren. <sup>21</sup> Kaba tina haka piou naien ielesala, ba pien tahol tere Pero emi lue nen me hahahu here naneien a pien tson tanen. <sup>22</sup> Be

Mosis e hatutseri a mamana niatei a niga turu katunura i Itsip, na u raranga na toukui i tanen e tagala koru.\*

<sup>23</sup> “Tara pöata te ka meia e Mosis u 40 u hiningal, ba nonei e hakats nena tegona tara meraien u katuun i tanen a Israel. <sup>24</sup> Pöata te tareien a toun Itsip e atungi a toun Israel ba nonei ena taguhena a toun Israel me atung hamatena a toun Itsip. <sup>25</sup> Nonei e kamei u hakats te kato uana, a pala i tanen egi tara bate tara marueier, e Sunahan e katsin taguhu sila ranen tara nitagala tere Mosis. Kaba nori ima ate ii.

<sup>26</sup> “Ba turu hamahö be Mosis ena tara rena a huol a toun Israel bate hiatatungur. Ba nonei e torohanan hamatskö ranen me poeiena, ‘Hengoiam! Alimiou a töa hun katuun. Aha te hiatatung sile milimiou?’ <sup>27</sup> Kaba a katuun te kato homi a tai e tula ban e Mosis me poeiena, ‘E si te hale ii lö a nitsunono tego tara kap merailö alam bate hahamouem a markato i tamulam?’ <sup>28</sup> Alö e katsin atung hamate here has nami lia a toun Itsip tu atung hamati lö i nolaha?’ <sup>29</sup> Pöata te hengoeia e Mosis u mar ranga teka be Mosis e bus ba nena a han i Itsip mena ka here nei a katuun te moa ta han tara han i Midian. Pöata te ka ien tara han teka ba nonei e hitöluna me hatuhanena a huol a pien tson.”

<sup>30</sup> Be Stiven e ranga lenina me poeiena, “Pöata te la hakapaia u 40 u hiningal, ba töa angelo e butuna tere Mosis tara makum a palaka turu Pokus i Sinai me butu nama turu ruei te kulupu. <sup>31-32</sup> Pöata te

---

\* **7:22:** E Mosis ema tatei rarangai, kaba u ranga na manka te katoeien e tiama na e tagala koru.

tareien e Mosis ba nonei e asingoto koruna me la hasukusukuna tegona tara menaien u ruei te kulupu kaba ema ats ii. Ba u töa u ranga e la nama tara Tsunono iahana u kulupu me poeiena, ‘Alia e Sunahan turu tubumölö, e Sunahan tere Abraham mere Aisak ne Jekop.’ Be Mosis e toltololona me matoutun tara uana turu kulupu. <sup>33</sup> Ba Tsunono e hateie nen, ‘His ban u sendol i moumölö. A makumun tsiktsiki te tuol mia lö e göagonona. <sup>34</sup> Alia u tara hakapi a man markato a man omi te katoer u katunura i Itsip tara hun katuun i tar. Alia u hengo hakapa hasi te har uaren, na lia e koul sile guma tegomi taguhu meraien. Alö go lama. Alia e hala pouts mena gilö i Itsip.’ ”

<sup>35</sup> Be Stiven e ranga lel noa hasina me poeiena, “Nonei e Mosis ti raman u katunura Israel me poeier, ‘E möa ta katuun tega hale ii lö a nikapan na markato te ona menari markato i tamulam!’ Nonei lasi a katuun te hala here nai e Sunahan a tsunono na katuun tega luba raien a nomi. E Sunahan e hatagala sila naien tara angelo te butuia i tanen tara tsi ruei te kulupu. <sup>36</sup> E Mosis e kato u mamana mirakol i Itsip me lu halakasa ba ranei u katuun i Itsip. Ba nonei e katoena u mirakol turu tasi ti ngöei u Tasi u Rörö na u mamana u mirakol tara makum a palaka e antunaia turu 40 u hiningal. <sup>37</sup> Nonei e Mosis te hateir u katunura i Israel me poeiena, ‘E Sunahan e hatuolenou a töa propet turu katuun i tamilimiou i murimuri, kato has uanou temar hatuol menaien lia.’ <sup>38</sup> Nonei e Mosis te ka gono mer u katunura i Israel ti gono hobotoien tara makum a palaka. Nonei e ka gono mei u tuburara na a angelo has te rangaia

i tanen turu Pokus i Sinai. Nonei e lui u raranga tere Sunahan, u rarangana tara nitöatöa, tega hala raien ra.

<sup>39</sup> “Kaba u tuburara ima ngilin hengo nai u raranga i tanen. E möa. Nori i tori tsuga naien me ngilin la pouts uaier tara han i Itsip. <sup>40</sup> Ba nori e hateier e Eron, ‘Alö go kui bera mei ra a man got ba nori te mam rariou ra. Ara ema atei sile ri aha te butuia tere Mosis, a katuun te lu halakasa ba ramei ra a han i Itsip.’ <sup>41</sup> Tara pöata teka nori i kui u kesa te mata here ii a tunan bulmakau ba nori e kato menari u haats i tanen. Nori i sasaala koru mei a ka ti katoeien a lima ren peisa. <sup>42</sup> Kaba e Sunahan e habirits me haka ba ranen ba nori e hatsunono uaier tara pitala na tsihou na u pitopito, temar koloto uu a propet turu Buku u Göagono:

‘Alimiou u katunura i Israel!

I manasa alimiou u ka mia tara makum a palaka turu <sup>40</sup> u hiningal,  
     ba limiou e atung hamate ramiou u bulmakau na u sipsip me haats ramen.

A markato teka u kato mena milimiou i tar? E möa.

<sup>43</sup> Alimiou u lue iam a luma labalaba tara got gamogamo a solonen e Molok,  
     me söata gono memien a pitopito tara got gamogamo e Repan,  
     nori a man kesa tu kui sile milimiou tego hatsunono mena mien limiou.

Te markato uanen teka balia te luba has ragou limiou bate hala mera goilimiou i hapalana i Babilon.’

“A propet temar ranga uu teka.”

<sup>44</sup> Be Stiven e ranga lel noa hasina me poeiena, “Tara pöata ti kaia u tuburara tara makum a palaka, nori i ka mei a luma labalaba ti roron singoien tere Sunahan. E Sunahan e haröte ii e Mosis tego mar kui menaien a luman lotu teka, ba nori te töan mar kui mena rien temar haröto menai e Sunahan e Mosis. <sup>45</sup> Ba i murinen bu tuburara e la gono merima e Josua tegimi lu menaien u tsiktsiki turu palair u katuun te tsuga baraia e Sunahan i matar u tuburara. Tara pöata teka nori emi pioun nonei a luma labalaba me hakei rien turu tsiktsiki teka e antunaia tara pöata tere Devit a King.

<sup>46</sup> “E Sunahan e haniga korui e Devit, be Devit e singo uana i tanen tega tatei kui menaien a töa luma a niga tere Sunahan tere Jekop. <sup>47</sup> Kaba e Solomon a pien tson tere Devit te kui bei e Sunahan a luma.

<sup>48</sup> “Kaba e Sunahan Iasa Koru ema tatei ka neia tara luma ti kui u katuun. E markato uana temar ranga uu a propet:

<sup>49</sup> ‘A Tsunono e poeiena,  
Alia e king gia tara mamana makum hoboto  
i Kolö na i puta.

A saha mar luma te kui be moi limiou alia  
ba lia te husa gia i tanen?

<sup>50</sup> A han i tar e ka hobotona tara mamana makum,  
taraha alia peisa tu kui a mamanaka hoboto.’  
“E Sunahan e mar ranga uu teka.”

<sup>51</sup> E Stiven e ranga lel noahas ia tara pal kapan turu Kout me poeiena, “Alimiou u katuun u hihipus! Alimiou e tori here noa hasemi u tematan! Alimiou e talingatu ba koru namiou u raranga tere Sunahan! Alimiou e hipus nitöa namiou u Namnamei u Göagono ti markato has uu tuburara!

<sup>52</sup> U tuburara i kato homir u propet hoboto i manasa. Nori i atung hamatir u katuun tere Sunahan ti habulungana mamin tego la uama romana a Katuun a Matskö i tanen, nonei e Kristo. Na limiou u hala hakapa mena mien turu katuun ti omieien ba nori e atung hamatie ren. <sup>53</sup> Alimiou tu lue iam a Lo te hala menai e Sunahan turu angelo, na limiou uma kukutie mien te la noa hasina i romana!” E Stiven e mar ranga uu teka.

### *E Stiven i titi hamate ii u hatu*

<sup>54</sup> Pöata ti hengoeia a pal kapan u ranga tere Stiven, ba nori e raharaha korue ren me kutu ha karkarangaker a liho ren. <sup>55</sup> U Namnamei u Göagono e saputi e Stiven, ba nonei tara tötoso uana i Kolö me tarena u ualesala pan tere Sunahan, na e Iesu e tuol ia tara pal matou tere Sunahan. <sup>56</sup> Be Stiven e poeiena, “Alia e taregu u Kolö e kalatana na e Iesu te butun Katunuma e tuolna tara pal matou tere Sunahan!”

<sup>57</sup> Kaba nori i tupu kapiin a talingaren me ele hapan tuun mer u ranga, me takei hobotor me piatar tina pile kap menaien e Stiven. <sup>58</sup> Ba nori e las ba na rien a taun mena titi hate ren. U katuun ti saka mam meien u ranga i his ban a man hasobö a man ngahangaha i taren me hakei rien i rehina a töa katuun a hitots a solonen e Sol. <sup>59</sup> Tara pöata ti titi hateien e Stiven, ba nonei e mar singo uana teka, “O Iesu a Tsunono, lui u namnamei i tar!” <sup>60</sup> Ba nonei e hatukununa me ku hapan koruna me poeiena, “O Tsunono, moa tu palisi a markato a omi te katoeren teka!” E Stiven e mar ranga uu teka me matena.

## 8

*E Sol e kato homir u kristen*

<sup>1</sup> E Sol e hanigein te mate uu e Stiven. Nonei turu lan teka, ti tania kato homi koru raia u kristen ti kaia i Jerusalem. I markato uu teka bu kristen hoboto e sata uaier tara man han iahana provins i Judia na i Samaria. U aposol puku ti ka noaia i Jerusalem. <sup>2</sup> A pal katuun ti hamana hatagala koru ti kahoein e Stiven, ba nori e tabe hapan koru mer a nitaatagi tere Stiven.

<sup>3</sup> Kaba e Sol e kato homi korur u kristen te tasu menaien a man luma turu katuun bate las me ranei a pal tson na touhaliou has tara karabus.

*U Bulungana u Niga i hahatei naia i Samaria*

<sup>4</sup> U kristen ti sata i la uu turu han hoboto me hahatei laner u Bulungana u Niga. <sup>5</sup> E Pilip e la uu tara taun i Samaria me hatuts ranei u katuun i Samaria e Mesaia. <sup>6</sup> U katuun u para koru i hahengo hoboto hanigan töaia tere Pilip, nori i hahengo hanigan töa bate tara haseier a man mirakol te katoe e Pilip. <sup>7</sup> U liliahanei u omi i ku hapan koru bate lakasa ba raruma u katuun u para ti ka ien. Na u katuun u para ti matekata na ti mou omi i kato haniga pouts hasir. <sup>8</sup> Ba nisasaala pan e butuna tara taun i Samaria.

<sup>9</sup> A töa katuun e kaia tara taun teka a solonen e Saimon. I manasa nonei e roron kato a matuna na hirakö. Ba u katunur i Samaria i roron asingoto koru ni a manka te katoeien. Nonei e roron pei, “Alia a katuun pan.” <sup>10</sup> Ba u katuun tara taun teka te taniama turu katuun ti möa ta solo na pala ti kamei a solo, nori hoboto i tagala koru mei ti hengo menaien e Saimon. Nori i poei, “A katuun

teka nonei a nitagala tere Sunahan te ngöeri a Nitagala Pan.” <sup>11</sup> Nonei e solon hatara rarien a para a ka ba nori e hahengo haniga koruria i tanen. <sup>12</sup> Kaba ti hamaneien a manka te hatein e Pilip turu Bulungana u Niga tara Nipepeito tere Sunahan na solona e Iesu Kristo, ba nori hoboto a pal tson na touhaliou e habaptaisir. <sup>13</sup> Na e Saimon e hamana has me habaptaisina. Ba nonei e ka gono nitöa mena e Pilip me asingoto koru nena a man mirakol pan te kati e Pilip.

<sup>14</sup> Tara pöata ti hengoeia u aposol ti kaia i Jerusalem u katunura i Samaria i hanigei u raranga tere Sunahan, ba nori e hala merari ere Pita mere Jon i taren. <sup>15</sup> Tara pöata ti tuku ien, ba nori e singo uaier tere Sunahan me singo siler u kristen tegi lu menaien u Namnamei u Göagono. <sup>16</sup> Taraha, u Namnamei u Göagono ema koul noa uamei i taren. I manasa nori i habaptais tuun mei a solona Tsunono, e Iesu. <sup>17</sup> Bere Pita mere Jon e hatakope ria a limaren i taren, ba nori e töan luer u Namnamei u Göagono.

<sup>18-19</sup> Ba pöata te tareia e Saimon ti hatakopo menai u aposol a limaren turu katuun ba nori te luer u Namnamei u Göagono, ba nonei e torohanen hala ranei ere Pita mere Jon a moni me poeiena, “Alimiou go hala hase mei lia a nitagala teka, ba lia te tatei hatakopo hase goua a limar turu katuun ba nori te tatei lu haser u Namnamei u Göagono.”

<sup>20</sup> Kaba e Pita e pei i tanen, “Na taia gono mei a moni i tamölö, taraha alö e poeiem alö e antunan holemi a kaan halhala puku tere Sunahan a moni! <sup>21</sup> E möa koru, alö u möa ta pala tara manka teka, taraha a torimölö ema matskö neia i matana e



Sunahan. <sup>22</sup> Palis ban u hakats u omi teka, ba lö te singo uam tara Tsunono tego ngil uaien ba nonei te luba nena u ngilngil u omi i torimölö. <sup>23</sup> Taraha, alia e taregu a torimölö e omi koruna, balö te heremi a karabus te kitsna tara markato a omi.”

<sup>24</sup> Be Saimon e poeiena, “Pua, alimiou go singo bemumoulia tara Tsunono ba manka te ranga nemulalö tema tatei butu noi i tar!”

<sup>25</sup> Ba pöata te hatei hakapa naia e Pita mere Jon u raranga tara Tsunono, ba nori e kopis pouts uaier i Jerusalem me hahatei lala na lila u Bulungana u Niga tara man han a man parpara tara Provins i Samaria.

### *E Pilip na tson a malapei na i Itiopia*

<sup>26</sup> Ba töa angelo tara Tsunono e poeiena tere Pilip, “Takei balö te la uaiem tara maroro te laba nena i Jerusalem, bate gala uana tara taun i Gesa.” A maroro teka e kaia tara makum a palaka. <sup>27</sup> Be Pilip e takeina me lana. Tara maroro teka e laia a töa toun Itiopia a malapei. Nonei a töa tson pepeito a kapan te pilein a toukui tara tetahol panina i Itiopia a solonen e Kandesi. Nonei e taratara kapiin a mamananaka a niga tere Kandesi. A tson teka e la silema egomi lotuia i Jerusalem. <sup>28</sup> Nonei e lotu hakapa me katsin hakopis pouts hamanasana. Nonei e ošaia tara karis i tanen bate ritena u buku te kolotein e Aisaia a propet. <sup>29</sup> Ba u Namnamei tere Sunahan e ranga mena e Pilip me poeiena, “Alö go la hasukusuku uala tara karis balö te tataala gono memen.” <sup>30</sup> Be Pilip e piata hasukusuku lala mena hengoena te rit menai a katuun teka u buku te kolotein e Aisaia a propet.

Be Pilip e poeiena, “Alö e atei silem a mouna u raranga te tare mölö?”

<sup>31</sup> Ba katuun teka e kato uana, “Tema hale noi lia ta katuun ta niatei, ime temar atei uagou lia?” Ba nonei poeiena tere Pilip, “Alö go seima balö te gum gono memou lia.” Be Pilip e seinä me gum gono menen. <sup>32</sup> A makumun ranga turu Buku u Göagono te tareien e markato uu teka:

“Nonei a katuun e here nei a sipsip tena piou ner tara makum te atung hamate raria u sipsip. Nonei e here nei a tunan sipsip tena tuol hakakamotona tara makum te kotskotseria u hulu tara sipsip batema ngala nei. Na nonei ema ranga has nei.

<sup>33</sup> Nori e pitaputa korue ren batema katoeri tu kout tu niga i tanen. Esi te tatei rarariena u hatutubunei i tanen? Taraha, a nitöatöa i tanen i luba hakapa naia u puta.”

U Buku u Göagono temar ranga uu teka.

<sup>34</sup> Ba malapei teka e rangatena e Pilip me poeiena, “Alia e rangate goulö, a propet e rangein esi ba nonei te katoena u raranga teka? Nonei e rangein a peisanen, tsi e rangein a tana katuun?”

<sup>35</sup> Be Pilip e tania na tara makumun raranga teka te kaia turu Buku u Göagono, me hatei nena u Bulungana u Niga tere Iesu. <sup>36-37</sup> Pöata ti la noaien i maroro ba nori ena butu ria tara töa ramun, ba tson pepeito teka e poeiena, “Röto, a ramun teka. Aha te hatu kap na noulia tego habaptais uu lia?” Be Pilip e poeiena, “Te ka memialö a nihamana i torimölö, alö e antunan habaptaisim.”

Ba nonei e ranga palisina me poeiena, “Alia e hamanegu e Iesu Kristo nonei a Pien Tson tere Sunahan.”

<sup>38</sup> Ba nonei e hagumena a karis, be Pilip na nonei a tson pepeito e koul uaier tara ramun, be Pilip e baptais nen. <sup>39</sup> Pöata ti la sei pouts men tara ramun, ba u Namnamei tara Tsunono e luba pouts nena e Pilip me la menen. A malapei ema tara lele ii e Pilip, kaba nonei e sasaala koru noahas, be la uana te la uaien. <sup>40</sup> E Pilip ena butuia tara taun i Asdot te tataala silaien ba nonei e hatei lanena u Bulungana u Niga tara mamana taun, antunaia te na butuien tara taun i Sisaria.

## 9

### *E Sol e butun kristen* (Aposol 22:6-16, Aposol 26:12-18)

<sup>1-2</sup> Tara pöata teka a töa katuun a solonen e Sol e ranga hatagala nohasin tega pile kap meraien u katunun tsitsilo tara Tsunono bate atung hamate ranen. Ba nonei e lana tara tsunono pan turu pris turu Jiu mena rangata nena tu pas tega söateien bate la gono menen turu luman lotu turu Jiu tara taun i Damaskus. Ba u ranga u tagala turu pas teka e poeiena, “Tegona sabeia e Sol ta katuun turu katuun te kukutier a maroro tere Iesu, a tson na tahol has, ba nonei tena pile kap ranen bate las mera neien i Jerusalem.”

<sup>3</sup> Be Sol e la uana i Damaskus. Ba pöata te sulusuku ien tara taun teka ba u töa u ualesalana te hereia u kanaha e koul nama i Kolö me piraha hahisenen. <sup>4</sup> Ba nonei e rus uana i puta turu tsik-tsiki, me hengoena u töa u raranga bate poeiena

i tanen, “O Sol, o Sol, aha te kato homi sile milö alia?”

<sup>5</sup> Ba e Sol e rangatana, “O tsunono, alö esi?”

Ba nonei e poeiena, “Alia e Iesu, a katuun te kato hakamitse mölö. Te kato hakamits ramia lö u katuun i tar, alö e kato hakamits hase moulia. <sup>6</sup> Alö go takei balö te lam tara taun ba nori tena hateie rouilö a saha ka tego kati lö.”

<sup>7</sup> A pal tson ti la gono mei e Sol i tuol hahalongolo koru. Nori i hengoe u ranga kaba nori ima tarei ta katuun. <sup>8</sup> Be Sol e takeina, a matanen e kalata kaba nonei ema antunan tarei ta ka. Ba nori e pile ner a limanen me las mena rien i Damaskus. <sup>9</sup> Na turu topisa u lan nonei ema antunan tara ii, na tara pöata teka nonei ema nou ii na e ema ua has ii.

<sup>10</sup> A töa katunun tsitsilo tere Iesu e kaia i Damaskus, a solonen e Ananias. Nonei e tareia a Tsunono turu hiharöto i tanen ba Tsunono e poeiena, “O Ananias.”

Be Ananias e poeiena, “O Tsunono, alia teka.”

<sup>11</sup> Ba Tsunono e poeiena i tanen, “Alö go takei balö te la uaiam tara maroro te ngöeri i Matskö, balö te la uaiam tara luma tere Judas. Alö ena rangata nemou a töa katununa i Tasmus a solonen e Sol. Tara pöata teka nonei e singo uana tere Sunahan. <sup>12</sup> E Sol e tarei a töa katuun a solonen e Ananias e butuia turu hiharöto i tanen, e Ananias e tasuna bate hatakopena a limanen tere Sol tega kato haniga pouts menaien a matanen.”

<sup>13</sup> Be Ananias e ranga palisina me poeiena, “O Tsunono, u katuun u para ti hate ii lia a katuun teka. Nori i pei nonei e kato hakamits korur u katuun i tamölö i Jerusalem. <sup>14</sup> Nonei e la menama

u ranga u tagala koru turu pris pan turu lotu te poeiena e Sol ega pile kapir u katuun hoboto te singo uaier i tamölö.”

<sup>15</sup> Ba Tsunono e poeiena i tanen, “Lala, taraha alia u hopö kapiin a katuun teka tega hatei menaien a solor turu katuun tema Jiu ri na turu king i taren na turu katunura i Israel. <sup>16</sup> Alia peisa te haröte goien romana a kamits pan tena lue nouen. U katuun te rama nariou lia e kato hakamitse rouen romana.”

<sup>17</sup> Be Ananias e lana mena tasuna tara luma tere Judas. Ba nonei ena hatakopena a limanen tere Sol me poeiena, “O Sol, ara e muntoulana sila ria tere Kristo, a Tsunono te tula nena moulia. E Iesu, te butuma i tamölö i kalana tara pöata tu la uamalö teka, nonei te tula nena moulia tegomi taguhu menai lia alö balö te tara haniga pouts mou, balö te saputu memou u Namnamei u Göagono tere Sunahan.” <sup>18</sup> Ba nonei tara tsi pöata puku has ba ka te here ii a kapöana e rus ba nena a matana e Sol ba nonei e töan tara haniga poutsuna. Ba nonei e takeina me luena a baptais. <sup>19</sup> Ba nonei e nouna me lu poutsena a nitagala.

### *E Sol e hihatuts ia i Damaskus*

Be Sol e gamon ka gono meraiena u katunun tsitsilo tere Iesu i Damaskus. <sup>20</sup> Ema lehana ii ba nonei e la uana turu luman lotu turu Jiu mena hatei raneien e Iesu me poeiena, “Nonei a Pien Tson tere Sunahan!”

<sup>21</sup> U katuun hoboto ti hengo i asingoto koru me poeier, “Boka! A katuun teka te roron atung hamater u katuun i Jerusalem ti pala uu tere Iesu? Nonei e la silema tegomi pile kap meraien

u katuun tere Iesu bate las mera neien turu pris pan turu lotu?”

<sup>22</sup> E Sol e tagala susul ba nonei e haröto nena e Iesu nonei e Mesaia hamana, a katuun te hopö kapiin e Sunahan. Na nonei tara pöata u Jiu ti kaia i Damaskus i hengoe u ranga teka kaba nori ima antunan ranga palise ii e Sol. <sup>23</sup> A pöata a parpara e la hakapa, bu Jiu e korupakö ner tegi atung hamate menaien e Sol. <sup>24</sup> Kaba e Sol e hengoin u korupakö teka. A lan na bong, nori i pepeito kapiin u tamana tara taun i Damaskus tegi atung hamate menaien e Sol. <sup>25</sup> Kaba tara töa bong u katunun tsitsilo tere Sol i lueien be na hakoule rien i hapalana a ololo tara ka te here ii a tohene pan.

### *E Sol e la uu i Jerusalem*

<sup>26</sup> Pöata te la uu e Sol i Jerusalem ba nonei ena torohanan ka gono merena u katunun tsitsilo tere Iesu. Kaba nori i matouteien na i hahamana naien tego katunun tsitsilo uaien tere Iesu. <sup>27</sup> Ba e Banabas ena piou nanen turu aposol me hatei raneien e Sol e tareia a Tsunono i maroro ba Tsunono e ranga gono menen. Ba e Banabas e hatei has raneien e Sol e ranga hatagala koru te hatei la menameien e Iesu i Damaskus. <sup>28</sup> Be Sol e ka gono mera nen me hula lana i Jerusalem, me ranga hatagala has nena e Iesu Kristo. <sup>29</sup> Nonei e hiararanga gono mer u Jiu ti atei sil u HaGrik me hiatagtagala mer u ranga. Ba nori e hakats ner tegi puli menaien e Sol. <sup>30</sup> Na tara pöata ti hengo naia u katunun tsitsilo tere Iesu a ka teka, ba nori ena piou naria e Sol tara taun i Sisaria me hala ba naren i Tasmus.

<sup>31</sup> Ba u katuun hobotor i Judia na i Galili na i Samaria ti hamanaia tere Iesu i ka hanigar tara pöata tara masalohana. Ba niateina tere Sunahan e pan susuluna i taren. Ba nori e hapan nitöaner a Tsunono bu Namnamei u Göagono tere Sunahan e taguhu ranen. Ba nori e para susulur.

*E Pita e kato haniga poutsi e Ananias*

<sup>32</sup> E Pita e hula laia tara mamana han teka, ba nonei e gala has uana tara taun i Lida mena ka gono meraiena u kristen i Lida. <sup>33</sup> Ba nonei ena sabeiena a töa katuun a solonen e Ananias, a matekata, e opöia tara holholasa e antunaia turu töal u hiningal. <sup>34</sup> Be Pita e poeiena i tanen, “O Ananias, e Iesu Kristo e kato hanige poutse nolö. Alö go takei balö te hamatsköem a holholasa i tamölö.” Ba nonei e takei soköna. <sup>35</sup> Ba u katuun hoboto tara huol a taun i Lida na i Seron e tare ren ba nori e töan habirits hoboto uaier tara Tsunono.

*E Pita e hatakei poutsi e Tabita*

<sup>36</sup> Tara taun i Jopa e kamei a tahol te hamana uu tere Iesu a solonen e Tabita, turu HaGrik nori i ngöeien e Dokas. Tara mamana pöata nonei e roron kato a markato a niga, bate taguhu has rena u katuun ti möa ta ka. <sup>37</sup> Tara pöata teka nonei e lu a siki pan koru me matena. Ba nori e totobue ren mena hake rien tara töa rum iasa iahana luma. <sup>38</sup> A taun i Lida e susukuia tara taun i Jopa. Ba pöata ti hengo naia u kristenira i Jopa e Pita e kaia i Lida, ba nori e tula nalila a huol a katuun i tanen mena poeiena i tanen, “Alö go la boroboro uama i tamulam.”

<sup>39</sup> Be Pita e takeina me la gono mera nen. Pöata tina butuien ba u katuun e las menarien tara rum

iasa te kaia e Dokas. U amoaba i tuol hobotoia i rehina e Pita bate taber. Nori i haröto haseien a man hasobö te katoe e Dokas me hala raneien tara pöata te ka gono noa meraien e Dokas. <sup>40</sup> Be Pita e halakasa hoboto ranen, ba nonei e hatukununa me singo uana tara Tsunono. Ba nonei e habirits uana tara tahol a mate me poeiena, “O Tabita, alö go takei!” Ba tahol e hakalatena a matanen. Ba pöata te tareien e Pita, ba nonei e gum seinä. <sup>41</sup> Be Pita e pile nena a limanen me las hatakeie nen, be Tabita e tuoluna. Nonei e töatöa pouts tala. Be Pita e ngö gögono rena u amoaba na palair u kristen, ba nonei e hala pouts raneien e Dokas. <sup>42</sup> A ka teka i atei sil hoboteia tara mamana makum i Jopa, ba katuun a para ti hengo naiien e hamana uaier tara Tsunono. <sup>43</sup> Be Pita e kana i Jopa a pöata a ngahangaha. Nonei e ka gono mei a töa katuun te roron hapalaki a pikpiköna a bulmakau,\* a solonen e Saimon.

## 10

### *E Pita mere Konilius*

<sup>1</sup> Tara taun i Sisaria e ka mei a töa katuun a solonen e Konilius, a tsunono te mamin a töa pala turu ami ra i Itali. <sup>2</sup> Nonei e hamanaia tere Sunahan, na nonei na u katuun hoboto i luma tanen i hatsunoni e Sunahan. Nonei e roron hala ni a moni tina taguhu merai u Jiu ti möa ta moni, na nonei e roron singo has uu tere Sunahan. <sup>3</sup> Turu töa u lan tara pal 3 kilok tara lahi nonei i hatare ii u töa u hiharöto te tara hanigan töa naiien a angelo tere Sunahan bate tasuna me poeiena i tanen, “O Konilius.”

---

\* **9:43:** U HaIngliis: tanner.



<sup>4</sup> Be Konilius e tara tötoso nitöa mena a nimatout me poeiena, “O tsunono, aha nonei?”

Ba angelo e poeiena i tanen, “U singosingo na nihalhala moni i tamölö, e Sunahan e hengoeien na e tari a manka teka me sasaala menen. <sup>5</sup> Alö go tula rela u katuun tara taun i Jopa, ba nori tena ngöe rima a katuun te ngöeri e Saimon Pita. <sup>6</sup> Nonei e ka gono mena a tana Saimon, a katuun te roron hapalakeiena a pikpiköna a bulmakau. A luma i tanen e kana i rehina a tasi.” <sup>7</sup> Pöata te la hakapaia a angelo te rangaia i tanen be Konilius e ngö rena a huol katunun kui i tanen, ba nonei e ngö hasena a töa soldia te kui be haseien na te hatsunono hasi e Sunahan. <sup>8</sup> Ba nonei e hatei raneien a ka te butuia i tanen me tula mera neien i Jopa.

<sup>9</sup> Tara pal söasa turu hamahö ti la noaien i maroro me sukuukun tuku hamanasaria tara taun, be Pita e seina tara makumun roro ieluna luma tena singo uaien tere Sunahan tara söasa.

<sup>10</sup> Ba nonei e sagohena a bes me ngilin nouna. Tara pöata ti nas noeien a kannou, be Pita e tarena u töa u hiharöto. <sup>11</sup> Ba nonei e tareiena u Kolö e takalata, ba töa ka te here ii u labalaba u tataabala e koul uanama i puta, me here namei a tohats a katuun i pileia tara tohats a makum rungu na u labalaba bate hakoule rumen. <sup>12</sup> Mamana mar enimol e kaia turu labalaba teka, u poum na kori na mamanaka te silna turu tsiktsiki na u apena has. <sup>13</sup> Ba u töa u raranga e poeiena i tanen, “O Pita, alö go takei balö te atung hamatem ta ka, bate noum!”

<sup>14</sup> Be Pita e poeiena, “O Tsunono, e möa koru! Taraha, alia e namala nouegi ta ka ta korkoriana

na ta omi.”

<sup>15</sup> Ba u raranga teka e la lel uanama i tanen a hahuoluna a pöata, “A ka te haniga nena e Sunahan tego noui lö, alö goma tatei agono naien.” <sup>16</sup> U ranga teka e butu a topisa a pöata bu labalaba e las sei pouts menari i Kolö.

<sup>17</sup> Pöata te hakats hapan koru naia e Pita a ka te tareien na ime temar mouna uaien, ba u katuun te tula rema e Konilius te tukur i matana a luma tere Saimon. <sup>18</sup> Ba nori e ngör me rangatar, “Ime te kana a katuun te ngöeri e Saimon Pita?”

<sup>19</sup> Pöata te hakats noahas naia e Pita a ka te tareien, ba u Namnamei tere Sunahan e poeiena i tanen, “A topisa a katuun e rangata na riou lö. <sup>20</sup> Takei balö te koulum i puta batena tara ramen bate la gono mera men. Alö goma toku ii, taraha alia te tula ragu men.” <sup>21</sup> Be Pita e koul uana i puta mena rangana turu katuun mena poeiena i taren, “Alia nonei a katuun te sachie muma limiou. Alimiou e la sile muma aha?”

<sup>22</sup> Ba nori e poeier, “A töa tsunono tara ami, a solonen e Konilius, e tula rena moulam. Nonei a katuun a niga na nonei e hatsunono hasena e Sunahan, u Jiu hoboto e hanige ren. A töa angelo tere Sunahan e butuia i tanen me poeiena, ‘Alö gona ngöeiema e Saimon Pita ba nonei te la uanama i luma i tamölö, balö te hengo mia turu ranga i tanen.’ ” <sup>23</sup> Be Pita e ngö rena u katuun me hasoho ranen tara luma tere Saimon.

Turu tana u lan be Pita e la gono mera nen. A palair u katunura i Jopa ti hamanaia tere Iesu i la gono has meraien. <sup>24</sup> Nori i sohoia i maroro, ba turu hamahö ba nori ena tuku ria i Sisaria. E Konilius e ngö gögono hakaper a sungutu nen na

man hahikapien has i tanen, ba nori e hahaloso raren. <sup>25</sup> Tara pöata te tukuia e Pita, be Konilius e tupale nen me hatukunna i matanen me turu putana. <sup>26</sup> Kaba e Pita e hatakeien me poeiena, “Takei, alia a katuun tuun has.” <sup>27</sup> Pöata te ranga gono meia e Pita e Konilius ba nori e tasur i luma, be Pita ena tarena a katuun a para koru ti gono hoboto. <sup>28</sup> Ba nonei e poeiena i taren, “Alimiou e atei silemiou a Lo i tamulam u Jiu te hapiou nena tego kapiena merai lam u katuun tema Jiu ri. Na lam u Jiu ema tatei tasu has mia tara luma i tamilimiou. Kaba e Sunahan e hatare lalei lia, alia goma mar hakats lel uai teka. Alia goma tatei pei lelei a tana katuun e tara halel na i matana e Sunahan. E möa. <sup>29</sup> Ba tara pöata tu hangö mula limiou, alia uma rama mei na lia uma hapinamei me la guma. Aha tu hangö me mula limiou?”

<sup>30</sup> Be Konilius e poeiena, “U tohats u lan te la hakapa, tara mar pöata teka, alia una singo tara 3 kilok tara lahi. Ba töa katuun e hasogi u hasobö u kankanaha nitöa e songots butuna me tuoluna i matar. <sup>31</sup> Ba nonei e poeiena, ‘O Konilius, e Sunahan e hengo hakapi a man singosingo i tamölö, na nonei e hakats kap has nena te roron hala mena milö a moni turu katuun ti möa ta moni. <sup>32</sup> Alö go tula rela u katuun i Jopa ba nori tena ngöe ruma a töa katuun a solonen e Saimon Pita. Nonei e kana tara luma tara tana Saimon te hahapalakeiena a pikpiköna bulmakau. A luma i tanen e kana i rehina a tasi.’ <sup>33</sup> Ba lia e hangö boroboro na goulö, na e niga koru mena te la ua mumalö. Na lam e ka hoboto talamia teka i matana e Sunahan, tegomi hengo menai lam a man raranga hoboto te hale ii

lö a Tsunono.”

*E Pita e katoe u ranga*

<sup>34</sup> Be Pita e taniaan rangana me poeiena, “Alia e atei hamana talagu, e Sunahan ema ngil kalakala ranei u katunura i puta. E möa. <sup>35</sup> E Sunahan e haniga rena u katuun turu han hoboto te hat-sunone ren na te kato hamatskör. <sup>36</sup> Alimiou e atei silemiou u ranga te hala namen i tamulam u katunura i Israel. U raranga teka e habulungana nena a masalohana temi halan e Iesu, bate hakapa hasena u pakö turu katuun i tanen. Nonei a tsunono turu katuun hoboto. <sup>37</sup> U raranga teka e taniama i Galili me la ualala i Judia i murina a tou baptais tere Jon. <sup>38</sup> E hatei nena e Iesu na i Nasaret. E Sunahan e hale meien u Namnamei u Göagono na nitagala has. Nonei e tataala bate taguhu rena u katuun na nonei e kato haniga pouts hasir u katuun hoboto ti ka mei a siki na u katuun te pile kapir e Satan, taraha e Sunahan e ka gono meien.

<sup>39</sup> “Alam tu tarei a manka hoboto te katoeien i Jerusalem na tara palair u han has turu Jiu. Ba nori e hakute rien tara kuruse me atung hamate ren. <sup>40</sup> Kaba turu hatopisana u lan e Sunahan e hatakei poutseien tara tou mate i tanen, be haröto nanen turu ualesala i matar u katuun. <sup>41</sup> U katuun hoboto ima tareien kaba alam tu tareien, taraha e Sunahan e hopö kap mam raiou lam tego tara menai lam a ka teka ba lam tena ha-hatei namen. Alam u nou gono meien na u ua gono has meien i murina te takei pouts ien tara tou mate. <sup>42</sup> Na nonei e ranga meraiou lam me poeiena, ‘Alimiou gona hahatei naiam u Bulun-gana u Niga turu katuun, ba tena hatei ramien e

Sunahan e hopö kap naiou lia tego ona menai lia u katuun te töatöar na u katuun ti mate.’ <sup>43</sup> U propet hoboto i ranga naien me poeier u katuun hoboto te hamana ria i tanen, e Sunahan e luba nanou a man markato a man omi, taraha e Iesu e taguhu ranouen.”

*U katuun tima Jiui i lui u Namnamei u Göagono*

<sup>44</sup> Pöata te ranga nohasia e Pita ba u Namnamei u Göagono tere Sunahan e koul nama memi tö na turu katuun hoboto ti hengo u ranga. <sup>45</sup> U Jiu ti la gono mema e Pita u katunun tsitsilo tere Iesu i asingoto koru, taraha e Sunahan e hala nema u Namnamei u Göagono i tanen turu katuun has tema Jiu ri. <sup>46-47</sup> Taraha nori i hengoe ti ranga uaien tara man taina man ranga me soloseier e Sunahan. Be Pita e poeiena, “U katuun teka e lu haser u Namnamei u Göagono tu mar lu has menaien lam. E möa ta katuun tega antunan hapioun tegi baptais merai u katuun teka u ramun,” <sup>48</sup> Be Pita e ranga mera nen tegi baptais meraien tara solona e Iesu Kristo. Ba nori e rangate ren tego gamon ka buaien bate ka gono mera nen.

## 11

*E Pita e hala nema u raranga turu kristenira i Jerusalem*

<sup>1</sup> Tara pöata teka u aposol na u kristen ti kaia i Judia i hengoen u raranga te pei u katuun tema Jiu ri i lu hakapi u raranga tere Sunahan me hanige ren. <sup>2</sup> Ba tara pöata te la poutsia e Pita i Jerusalem, ba u kristen tara pala turu Jiu e raharahe ren. <sup>3</sup> Ba nori e poeier, “E hana balö e lauaiem turu luma

туру катуун тема Jiu ri, balö tena nou gono mera men?” <sup>4</sup> Be Pita e tanian hatei nena a mamanaka te butu.

<sup>5</sup> Ba nonei e poeiena, “Alia u kama tara taun i Jopa ba tara pöata tu singo ia lia ba lia e taregu u töa u hiharöto. A töa ka e koulma i Kolö te here mei u labalaba u kapan. E here ii a tohats a катуун e pileia tara tohats a makum i runguna u labalaba me hakoul menarumeien i puta me la uanama i tar. <sup>6</sup> Pöata tuna tara haniga koru ia lia iahana u labalaba teka ba lia e taregu a mamana mar enimol na i puta turu labalaba teka, u poum na u kori na mamanaka te silna turu tsiktsiki, na u apena has. <sup>7</sup> Ba lia e hengo hasegu u töa u raranga bate poeiena i tar, ‘O Pita, alö go takei ba lö te atung hamatem ta ka turu labalaba balö te noue men.’

<sup>8</sup> “Kaba lia u pei, ‘E möa koru, o Tsunono. Alia ema mala nouegi ta töa ta ka tu hagonein lö.’

<sup>9</sup> Kaba nonei u ranga teka e la lelma i Kolö me ranga hahuol menou lia me poeiena, ‘A ka te hanigein e Sunahan tegi noui, alö ema tatei agono namien.’ <sup>10</sup> A ka teka e butu a topisa a pöata, ba mamanaka hoboto teka e las sei pouts menari i Kolö.

<sup>11</sup> “Ba nonei tara pöata, a topisa катуун emi butuna tara luma tu kaia lia. A töa katununa i Sisaria e tula mera meien i tar. <sup>12</sup> U Namnamei tere Sunahan e ranga meioulia, ‘Alö go la gono meraien, ma hakats hapara ii.’ Na tönomo a kristen i la gono has meiou lia. Ba lam ena tasu mia tara luma tere Konilius. <sup>13</sup> Ba nonei e hatei ranei lam te tara menaien a angelo te tuol ia iahana luma i tanen me poeiena, ‘Alö go tula menai ta

katuun i Jopa, batena sake nama e Saimon te ngö haseri e Pita. <sup>14</sup> Nonei emi hale noi lö u ranga, na turu raranga teka e Sunahan e lu pouts gono hoboto mera noi lö a pala i tamölö.' A angelo e mar ranga uu teka tere Konilius.

<sup>15</sup> “Ba pöata tu na butuia lia tere Konilius me taniaan rangagu, ba u Namnamei u Göagono e koul uana i taren, te markato has uaien i tarara tara pöata tutuun. <sup>16</sup> Ba lia e hakats lel negu u raranga tara Tsunono te pei, ‘E Jon e baptais ra ii u katuun u ramun tuun, kaba limiou ena habaptais moua turu Namnamei u Göagono.’ <sup>17</sup> Te hala naia e Sunahan u Namnamei u Göagono i tanen turu katuun teka ti hamana uaien tere Iesu Kristo a Tsunono, temar hala has meraien ra, galia a saha mar katuun te hatu kap nagou a maroro tere Sunahan?”

<sup>18</sup> Pöata ti hengoien u ranga tere Pita, ba nori e haniga korue ren. Ba nori e soloseier e Sunahan me poeier, “U mana, e Sunahan e haniga hasir u katuun tema Jiu ri tegi habirits ba menaien a man markato a man omi ba nori te töatöa has riou!”

### *U kristenira i Antiok*

<sup>19</sup> U kristen ti sata noahasia ti titi hatu hamateia e Stiven na ti kato homi merai u katuun ti hamana uu tere Iesu. A tou la kalakala i taren e noan töa ma i Pinisia na i Saiprus na i Antiok. Nori i hala puku naia u Bulungana u Niga turu Jiu. <sup>20</sup> Kaba e ka has meir u katunura i Saiprus na i Sairini, nori i sohala ma turu katuun ti lauama tara taun i Antiok bate hatei laner u raranga turu katuun has tima Jiu ii. Nori i hahatein u Bulungana u Niga tere Iesu Kristo. <sup>21</sup> A nitagala tara Tsunono e kaia i

taren, ba katuun a parpara e hamanar be habiritis uaier tara Tsunono.

<sup>22</sup> U kristenira i Jerusalem i hengoin u raranga tara ka teka, ba nori e hala menari e Banabas i Antiok. <sup>23</sup> Pöata tena tukuieren, ba nonei e tarena a nihitaguhu tere Sunahan e ka gono meraien, ba nonei e sasaalana. Na nonei e kato hatagali u hakats turu katuun hoboto tegi hatagala menaien a toriren bate hamana nitöa uaier tere Sunahan. <sup>24</sup> E Banabas a katuun a niga, na u Namnamei u Göagono e saputeien, na nonei e ka has mei u nihamana u tagala. Ba u katuun u parpara e la uaier tara Tsunono.

<sup>25</sup> Be Banabas e la uana i Tasus tena sake menaien e Sol. <sup>26</sup> Nonei e sabeien memi piou nanen i Antiok. Ere Banabas mere Sol i ka gono mer u katuun tere Iesu i Antiok turu töa u hiningal u ohots, me hatuts rari u katuun u parpara, u raranga tere Sunahan. U katunun tsitsilo tere Iesu i ngö tutuun raia u kristen nonei tara taun teka.

<sup>27</sup> Tara pöata teka, a palair u propet i laba nema i Jerusalem, me la uaier i Antiok. <sup>28</sup> A töa i taren, a solonen e Agabas, e tuol ia turu hagum, ba tara nitagala turu Namnamei u Göagono ba nonei e hatei nena a bes pan e butu noa tara mamana han hoboto i puta. A bes pan teka e butu hamanaia tara pöata te gamman pan ia e Klodias. <sup>29</sup> Ba man tötöa man kristen hobotor i Antiok e kitser u ranga tegi hala hapopo naien u monin hitaguhu turu kristenira i Judia. <sup>30</sup> Nori i markato uu teka, ba nori e tula rer ere Banabas mere Sol tegina piou menaien u moni turu tsunono turu kristenira i Judia.



## 12

### *A king e kato homir u kristen*

<sup>1</sup>Nonei tara pöata teka e King Herot e kato homir a palair u katuun tere Iesu. <sup>2</sup>Nonei e hangats hamateni e Jemis e toulana e Jon u kilatan hiatatung. <sup>3</sup>A pöata te tareien u Jiu i ngil a ka teka, ba nonei e hapile kap has nena e Pita. (A manka teka e butuia tara pöata turu Paska turu Jiu, pöata tara Beret te möa ta Is.) <sup>4</sup>Herot e hapile kapiin e Pita me hala mena neien tara karabus. Nori i hakeien i limana a tohats a hun soldia tegi tara kap naien. A man töa man hun soldia hoboto teka i ka mei a man tohats a man soldia ti roron tara kapiin e Pita. E Herot egami piou naien turu katuun i murina u Paska. <sup>5</sup>Pöata te kaia e Pita tara karabus, u kristen i singo hatagala sileien tere Sunahan.

### *A angelo e halakasi e Pita tara karabus*

<sup>6</sup>Tara bong i mamina u lan tega la uu e Pita turu kout, e Pita e opöia i gusuna a huol a soldia. Nori i kitseien a huol a tsien, na u soldia i tuol hasia tara tamana bate tara kap ner a luman karabus. <sup>7</sup>Kaba a töa angelo tara Tsunono e butu, ba ka e alesalana iahana rum te kaia e Pita. Ba angelo ena guleiena e Pita me poeiena, "Takei boroboro." Ba u tsien e tapurese ba nena a limana e Pita me rusuna. <sup>8</sup>Ba angelo e ranga menen, "Hasogo u hasobö na u sendol i tamölö." Be Pita e markato has uana temar ranga uaien. Ba angelo e ranga menen, "Hasogi u hasobö u ngahangaha i tuenrei mölö balö te kukutie mumou lia." <sup>9</sup>Be Pita e lakasana me kukutiena a angelo. Kaba nonei ema atei sile ii a ka te katoeia a angelo i tanen te mana uaien,

туру hakats i tanen nonei e sinasoho. <sup>10</sup> Pöata ti la karaseien a tson te tara kapiin a tamana tutuun na tson pepeito tara hahuoluna a tamana, ba nori ena butu ria tara tamana aien te lakasa uu tara taun. A tamana teka e takalata peisa beraien. Ba nori e lakasar ielesala me siler a töa maroro. Ba angelo e songots laba nena e Pita.

<sup>11</sup> Ba u hakats tere Pita e töan alesala poutsuna, ba nonei e poeiena, “Alia e atei hamana talagu, a Tsunono e hala nenama a angelo i tanen memi luba nena lia tara nitagala tere Herot na tara mamanaka ti katsin kato hasi a pala turu Jiu i tar.”

<sup>12</sup> A pöata te hakats sabe naia e Pita a ka teka ba nonei e la uana tara luma tere Maria, e tsinana e Jon a tana solo tanen e Mak. A katuun a para i gonoia tara luma teka bate singor. <sup>13</sup> Be Pita emi porporokona tara tamana tara ololo ielesala tara luma, ba töa taholun kukui a solonen e Roda e la sile nama tegomi kalata menaien a tamana.

<sup>14</sup> Pöata te hengo mareien e Pita, ba torinen e sasaala koruna. Ba tahol e piata poutsuna iahana luma, nonei ema kalata bei e Pita a tamana! Ba nonei e hatei ranen, “E Pita e tuolna tara tamana!”

<sup>15</sup> Ba nori e poeier i tanen, “A baku mölö ema hakats haniga nei!” Kaba nonei e tagala koru be poeiena, “U mana koru!” Ba nori e poeier, “A angelo banei i tanen.”

<sup>16</sup> E Pita e porporoko noa hasia tara tamana, ba nori ena kalata taler a tamana me tarer e Pita, nori i asingoto koru. <sup>17</sup> Be Pita e hasoa sei nena a limanen tegi kakamoto uaien. Ba nonei e hatei raneien ime temar halakasa mena meien a Tsunono tara luman karabus. Ba nonei e poeiena, “Alimiou ena hateie mou e Jemis na palair u kristen te butu

ualala a ka teka.” Be Pita e laba ranen me la uana tara tana makum.

<sup>18</sup> Ba tara bongbong, ba u soldia e asingoto korur, me poeier, “Pua, e Pita e taia?” <sup>19</sup> Pöata te lagi sakesakeia e Herot e Pita ba nonei e rangrangata raiena u soldia ti taratara kapiin e Pita, ba nonei e kitsena u ranga tegi atung hamate meraien.

Be Herot e laba nena i Judia me gala uana tara taun i Sisaria tena kaien.

### *A tou mate tere Herot*

<sup>20</sup> Tara pöata teka e Herot a King e raharaha korur u katunur tara taun i Taia na i Saidon. Ba nori e gono hobotor me la mam uaier tere Blastus, a töa tson pepeito tere Herot. Nori i hamatskö gono mam mei e Blastus u ranga me töan la uaier tere Herot. Ba nori e rangata siler tegi hia taratara pouts gono meien e Herot. Taraha, u katunur tara han i taren i roron holeia a kannou turu katuun tere Herot.

<sup>21</sup> Be Herot e hopö kap nena u töa u lan, ba turu lan teka ba nonei e hasogeiena u hasobö u ngahangaha tara king, mena gumna turu gumgum u göagono, me katoena u ranga u ngahangaha i taren. <sup>22</sup> Ba u katuun e ku hapanir me poeier, “Nonei ema mar ranga uanei tara katuun tuun! E möa. Nonei u ranga tara töa got!” <sup>23</sup> E Herot ema solosei mamei e Sunahan, ba angelo tara Tsunono e atunge nen. U kakaminei i noueien, ba nonei e mate nitöana.

<sup>24</sup> Kaba u ranga tara Tsunono e butu hapan me tasata uana tara han a parpara.

<sup>25</sup> Ba tara pöata ti hakapeia ere Banabas mere Sol a toukui i taren i Jerusalem, ba nori e luer e Jon Mak, me la pouts gono merien i Antiok.

# 13

## *Ere Banabas mere Sol i hala rai a toukui tere Sunahan*

<sup>1</sup> Turu kristenira i Antiok i kamei u propet na u katunun hihatuts turu lotu, ere Banabas, na e Simion ti ngö hasei a tson a ruruhana, na e Lusius na i Sairini, na e Manaen a hahikapien tere Herot a King, na e Sol. <sup>2</sup> Tara pöata ti singou u kristen tara Tsunono me agono has ner a kannou, ba u Namnamei u Göagono e poeiena, “Alimiou go hopö kap gono memi ere Banabas mere Sol a toukui tu ngö meraien lia egi katoeien.”

<sup>3</sup> I murina ti singo uaien tara Tsunono me agono lel has ner a kannou, ba nori e hatakope ria a limaren tere Banabas mere Sol, ba nori e tula mera rien tara toukui i taren.\*

### *A tolo i Saiprus*

<sup>4</sup> Ba u Namnamei u Göagono e hala ranen ba nori e gala uaier tara taun i Selusia, tina osaien tara tolaala me lauar tara tolo pan a solonen i Saiprus. <sup>5</sup> Ba nori ena tuku ria tara taun i Salamis me habulungana laner u raranga tere Sunahan turu luman lotu turu Jiu. Nori i ka gono has mei e Jon Mak te taguhu raian.

<sup>6</sup> Pöata ti la bubutu hakapeien a han i Saiprus, ba nori ena tuku ria tara taun i Pepos, tina sabeien a töa Jiu a solonen e Ba-Iesu (turu HaGrik i ngöeien e Elimas). Nonei a katuun a matmatuna na e ka has mei a hirakö, na nonei has a töa propet gamogamo. <sup>7</sup> Nonei e ka gono mei a katununa tara gamman tara tolo teka, a solonen e Setsius Paulus, a katuun

---

\* **13:3:** A tou lala tutuun tere Pol tara toukui i tanen.

te ka mei a niatei a niga. Be Setsius Paulus e ngö rena ere Banabas mere Sol, taraha nonei e ngilin hengoen u raranga tere Sunahan. <sup>8</sup> Kaba e Elimas ema ngil raien me torohanan habiritsena u hakats tere Paulus ba nonei tema hamana uanei tara Tsunono. <sup>9-10</sup> Kaba e Sol, ti ngö hase ii e Pol, e saputu mei u Namnamei u Göagono e tara tötosi e Elimas me poeiena, “Alö a pien tere Satan! Alö ema ngilemi a man markato a man niga! U mama u gamo e saputu korue nolö! Alö e antunan hanöa hasem te kato hakököela memilö a mamana maroro a matskö tara Tsunono? <sup>11</sup> Alia e hatei goulö, a nihahuna tara Tsunono e koul hamanasa uanama i tamölö, alö e gamon matakiou bumou a tsi tabubun pöata na lö ema antunan tara hase moi a pitala!”

E Pol e mar ranga hakapa las uu teka, ba ka te here ii u köasi u ruruhana e kopo kap nena a matana e Elimas. Ba nonei e hula salasa sakesake lanena ta katuun tega pilein a limanen bate haröte neien a maroro. <sup>12</sup> Pöata te tareia e gamman a ka teka ba nonei e töan hamanana. Nonei e asingoto koruni u hihatuts tara Tsunono.

### *A taun i Antiok tara provins i Pisidia*

<sup>13</sup> Be Pol na u katuun ti tataala gono meien e laba ner a taun i Pepos, ba tolaala e hosa mera neien tara taun i Pega tara provins i Pampilia. Kaba e Jon Mak e laba raien me la pouts uana i Jerusalem. <sup>14</sup> Kaba nori i la noa mena butu ria tara taun i Antiok tara provins i Pisidia. Ba turu lanin lotu ba nori ena tasu ria tara luman lotu turu Jiu, mena gumur. <sup>15</sup> I murina ti rit hakapeia u ranga tara Lo tere Mosis na palaina u raranga

туру propet, ba tsunono na turu lotu e tuoluna me poeiena, “A matsi hatoulana, te ka memia limiou ta tsi rangan hitaguhu turu katuun, ba limiou te tatei hatei namen.”

<sup>16</sup> Be Pol e tuoluna me hasoasei nena a limana tegi hengo menaien u katuun me poeiena: “Alimiou u katunura i Israel, na limiou has a palair u katuun te matoute miou e Sunahan, alimiou go hengoiam. <sup>17</sup> E Sunahan, te tara kap rena u katunura i Israel, e hopö kapir u tuburara, tara pöata ti kaien tara han i Itsip, ba nonei e kato hapara koru ranen. Ba i murinen, tara nitagala pan koru i tanen, ba nonei e lu halakasa ba raneien a han i Itsip. <sup>18</sup> Turu tohats u maloto u hiningal nonei e tara kap raien tara makum a palaka te söateien a mamana markato a omi i taren. <sup>19</sup> I murina te atung hakapa raien a tohit a hun katuun i Kenan, ba nonei e hala ranei u katunura i Israel u tsiktsiki egi tueien e antunaia turu 450 u hiningal.

<sup>20</sup> “Ba i murinen be Sunahan e hala raneien u tsonun taratarakap e antunaia tara pöata tere Samuel a propet. <sup>21</sup> Ba u katunura i Israel e harangata ner ta king, be Sunahan e hala raneien e Sol, a pien tere Kis, a pala tere Bentsamen. Nonei e king ia i Israel e antunaia turu 40 u hiningal. <sup>22</sup> Be Sunahan e tsugena e Sol me hakeiena e Devit a king i taren. Nonei e mar ranga menai e Devit teka: ‘Alia e tara sabiegu e Devit a pien tere Jesi nonei a mar katuun te ngile gulia. A torir e ngil korue nen. Nonei te kukute hanige nou u mamana u ngil hoboto i tar.’ E Sunahan temar ranga uu teka. <sup>23</sup> I murimuri e Sunahan ena habute nou e Iesu tara pala tere Devit, a katuun

tena lu pouts ranoura temar ranga hamana uu e Sunahan i manasa. <sup>24</sup> I mamuna tega butuia e Iesu, e Jon a Tsonun Baptais e habulungana hakapein u raranga turu katunura i Israel hoboto tegi habirits ba menaien a markato a omi ba nori te habaptaisir. <sup>25</sup> Na pöata te katsin hakapeia e Jon a toukui i tanen, ba nonei e poeiena, 'Alimiou e pei miou alia esi? E Kristo? E möa. Kaba a katuun te murimuri nama romana, nonei a Tsonono pan, alia a katuun papala koru. Alia ema antunan purese hasegi a kikits turu sendol i mounen,' E Jon temar ranga uu teka."

<sup>26</sup> E Pol e ranga noa me poeiena, "A matsi hahatoulana i tar a galapien tere Abraham, na limiou has a palair u katuun te hatsunone miou e Sunahan, u raranga te poeiena e Sunahan e ngilin lu pouts rena u katuun ti hala mena meien i tarara noahas. <sup>27</sup> U katunura i Jerusalem na pal kapan i taren ima atei sile ii e Iesu nonei e Mesaia. Na nori ima atei haniga sile ii u raranga turu propet ti kato nitöa naien turu mamana u lanin lotu. E möa. Nori i koutin e Iesu ba nori e markato mena rien ti mar ranga uu propet i manasa. <sup>28</sup> Nori ima sabe ii ta töa ta ka tega antunaia tegi kato hamate menaien. Kaba nori i rangate ii e Pailat tegi atung hamate noahas menaien. <sup>29</sup> Na tara pöata ti kato hakapeien a mamananaka ti koloto mamin u propet, ba nori e atung hamateier e Iesu. Ba nori e lu hakoule rien tara kuruse, mena honge rien tara kioun mate. <sup>30-31</sup> Kaba e Sunahan e hatakei poutseien tara tou mate, na u katuun ti la ma i Galili i la gono meien i Jerusalem, nori i tareien turu lan u parpara i murina te takei pouts ien.

Na u katuun teka i roron habulungana naien turu katuun.

<sup>32-33</sup> “Na lam e hatei has rami limiou u Bulungana u Niga teka. A ka te hateirai e Sunahan u tuburara i manasa tega katoeien, nonei e kato hakapa beraien ra u hatutubunei i taren, te hatakei menaien e Iesu. U Buku u Göagono e mar ranga has uu teka turu hahuoluna u Sam, te poeia e Sunahan,

‘Alö a pien i tar.

I romana alö e hatamana mia i tar.’

<sup>34</sup> “E Sunahan e hatakei poutseien tara tou mate, na nonei ema antunan mate lel nei bate koremena. E möa. E markato uana temar ranga uu e Sunahan tere King Devit:

‘Alia e kato hamana bera gilimiou romana a ka a niga tu ranga hamana naia lia tere Devit i manasa.’

<sup>35</sup> “Gaha nonei a ‘ka a niga’ teka? U Buku u Göagono e mar hatei mena neien teka turu tana u Sam, ‘Alö ema haniga namoi romana tego koreme uu a tsomi i tamölö. E möa.’

<sup>36</sup> “U ranga teka ema hatei nanei e Devit. Taraha, i murina te katoeia e Devit u ngil tere Sunahan tara pöata i tanen, ba nonei e töan matena ba nori e kaho narien ti kaho raia u tubunen, ba nonei e koremena. <sup>37</sup> Kaba e Iesu, nonei a katuun te hatakei poutsi e Sunahan, nonei ema koreme ii.

<sup>38</sup> “Na, a matsi hahatoulana, alia e habulungana ragi limiou, nonei a katuun teka e Iesu te luba sila nena e Sunahan a markato a omi i tamilimiou. <sup>39</sup> A Lo tere Mosis ema antunan luba nanei a markato a omi i tamilimiou bate ngö ranei limiou u katuun u matskö. Kaba e Iesu e luba nena a markato a omi



hoboto turu katuun te hamana uaier i tanen, bate ngö has raneien u katuun u matskö. <sup>40</sup> Alimiou go hanei iam! A ka teka, ti rangein u propet i manasa e namots la uanama i tamilimiou nonei ti mar ranga uaieren teka:

<sup>41</sup> ‘Alimiou u katuun te hahakosmiou, alimiou go taraiam,

bate asingoto miou, bate töan tiamiou!

Alia e katoegu a töa a toukui.

Na te hatei haniga ranoua limiou ta töa ta katuun tara toukui teka,

ba limiou tema hamana noahas moi.’ ”

E Pol e mar ranga uu teka me töan hakapana.

<sup>42</sup> Ere Pol mere Banabas i katsin lakasa uu iele-sala ba u katuun e poeier, “Turu lanin lotu te la nama alimiou emi hatei lel namou u raranga teka i tamulam.” <sup>43</sup> U katuun i tarura tala, na u Jiu u parpara na u katuun halhal ti tahongo poutsia turu lotu turu Jiu, nori i kukuteir ere Pol mere Banabas. Ba nori a huol a katuun e hala ner u raranga u niga i taren ba nori e ranga hatagala mera ren tegi ka hatagala uaieren tara nihitaguhu tere Sunahan.

<sup>44</sup> Na turu tanu lanin lotu, u katuun u parpara koru tara taun teka i gono silema tegimi hengo menaien u raranga tere Sunahan. <sup>45</sup> Kaba palair u Jiu i tara u katuun u parpara ti gono, ba toriren e hiomi koruna. Nori i torohanan pita putei u raranga tere Pol bate ranga homi naren. <sup>46</sup> Ti markato uaieren teka be Pol mere Banabas e ranga hatagala korur me poeier, “E matsköna tu hala mam merai lam alimiou u raranga tere Sunahan. Kaba limiou e tori tsuga ba namen bate kato here nami a peisamiou u katuun te raman lu ner a

nitöatöa te ka nitöana. Te kato uanen teka ba lam te la hamanasam tara pala tema Jiu ri. <sup>47</sup> A Tsunono e mar hatei mera mei lam teka:

‘Alia e haka here ragi limiou u ualesala turu katuun tema Jiu ri.

Ba limiou te tatei taguhu ramiou u katuun tara mamana han i puta, ba lia te lu pouts ragouen romana.’ ”

<sup>48</sup> U katuun tima Jiui i hengo u ranga teka, ba nori e sasaala korur, me hanigeier u raranga tere Sunahan. Na u katuun te hopö kapir e Sunahan tegi töatöa nitöa, nori i hamana uu i tanen.

<sup>49</sup> Na u raranga tara Tsunono e tasata hobotoia tara mamana han ti ka hasukusuku. <sup>50</sup> Kaba palair u Jiu i hatakei a raharaha tara touhaliouna turu lotu ti ka mei a solo pan, na turu tsunono has tara taun teka, ba nori e taniaan kato homi rer ere Pol mere Banabas. Ba nori e tsuga ba rarien tara han i taren. <sup>51</sup> I markato uu teka, ba e Pol mere Banabas e taholo ba ner u köahu i mouren, temar haröto menari te raharaha mera nei e Sunahan u katunura tara han teka. Ba nori e lar i Aikoniam. <sup>52</sup> Kaba u kristen i Antiok i sasaala koru, ba nitagala turu Namnamei u Göagono e saputuna i taren.

## 14

### *U aposol i kui ia i Aikoniam*

<sup>1</sup> A markato teka e takato has ia tara taun i Aikoniam, e Pol mere Banabas i tasu ia tara luman lotu turu Jiu me hatei ner u ranga. Nori i hatein u raranga u niga ba u katuun u parpara turu Jiu na turu Grik e hamamar. <sup>2</sup> Kaba palair u Jiu i ma hamana ii, ba nori e hatakeier a hiaraharaha

туру катуун тема Jiu ri, ba nori e tori hasoala raren <sup>3</sup> Kaba e Pol mere Banabas i kei a pöata a ngahangaha i Aikoniam, na nori i tagala mei ti hatei menaien u raranga tara Tsunono. Ba Tsunono e hatagala ranen ba nori e katoeier u mamana u mirakol. Tara ka teka, a Tsunono e haröto raien u rangan hitaguhu i tanen e mana koru. <sup>4</sup> Kaba u катуун tara taun teka i lu kataia i hagus. A palai i hanigei u ranga туру Jiu, na palai i hanigei u raranga туру aposol.

<sup>5</sup> Kaba u Jiu na u катуун тема Jiu ri na man tsunono i taren i katsin kato homir ere Pol mere Banabas na i katsin titi hatu has raien. <sup>6-7</sup> Ere Pol mere Banabas i hengo sabeni a ka teka, ba nori e bus uaier tara provins i Likonia, na tara taun i Listra na i Debi, na tara man han te sukuukuia tara makum ti kaien, ti hatei la naien u Bulungana u Niga.

### *U aposol i kui ia i Listra*

<sup>8</sup> Tara taun i Listra a töa катуун a mou omi e gum. I posa noahas mei a mar niomi teka na nonei ema mala tataala ii. <sup>9</sup> Nonei e hahengoia туру raranga te katoe e Pol. Pol e tari a катуун teka e kamei a nihamana te antunaia tegi kato haniga pouts menaien. <sup>10</sup> Be Pol e tara tötose nen me ranga hapanina me poeiena i tanen, “Takei balö te tuol hamatskö nem a moumölö.” Ba nonei e kurapa takeina me hula tataalana. <sup>11</sup> Pöata ti tareia u катуун u para koru a ka te katoi e Pol ba nori e ku hapan korur туру rangan HaLikonia me poeier, “U got e butun катуун hamanasa tala rima, bate koul uarima i tarara i puta!” <sup>12</sup> E Banabas nori i ngöeien e Sius, na e Pol i ngöeien e Hermis,

taraha e Pol a katunun raranga. <sup>13</sup> A luman lotu pan tere Sius e kaia i matana taun ielesala. Ba pris tara luman lotu pan teka e las ranama u bulmakau u tson na u palaua ti hil haperpereri. Ba nonei e la uanama tara tamana tara ololo tara taun. Nori emi ngilin katoei u haats tara huol a aposol.

<sup>14</sup> Kaba a pöata te hengo naia e Banabas mere Pol u raranga tara ka teka, ba nori e kiiseier u hasobö i taren, e haröto nena te rama koru mena rien a markato teka. Ba nori e piata uar i gusur u katuun ba nori e kur, <sup>15</sup> “A matsi hahatoulana, aha te kato sile milimiou a ka teka! Alam u katuun tuun, e here has rami limiou. Alam emi piou namula u Bulungana u Niga ba limiou te hapolase miou a markato a tutu teka, bate habirits uamiou tere Sunahan te töatöana. Nonei te katoe u kolö na u puta nu tasi, na mamanaka te kana iaharen. <sup>16</sup> E manana, tara mamana man pöata i manasa u katuun i markato uu ti ngil uaien, na e Sunahan ema hapiou raien. <sup>17</sup> Kaba nonei e haröto has nena temar kato haniga uanen i tamilimiou. Nonei e roron hapolena a langits, na e hahua hanigeiena u kui i tamilimiou. Nonei e hala hantue nena a kannou i tamilimiou bate kato hasasaala has ranou limiou.” <sup>18</sup> U aposol i mastein mar ranga has uu teka kaba nori u katuun i hasoso sil noahasi tegina kato menaien u haats i taren.

<sup>19</sup> Kaba a palair u Jiu turu taun i Antiok na i Aikoniam i lama, memi kato homier u hakats turu katuun. Ba nori e ti homi korueri e Pol u hatu, ba nori e las halakasa ba narien a taun. Nori i pei nonei e mate hakapa, ba nori e laba naren. <sup>20</sup> Kaba u kristen emi gono hahiseien, ba nonei e takeina be tasu pouts uana iahana taun. Turu hamahö be

Pol mere Banabas e lauaier tara taun i Debi.

*U aposol i kopis pouts uu i Antiok tara provins i Siria*

<sup>21</sup> I murina ti hatei hakapa naien u Bulungana u Niga tara taun i Debi ti lu has raien u katunun tsitsilo u para tere Iesu. Ba nori e la sila pouts uaier tara man taun i Listra na i Aikoniam, na i Antiok te kana tara provins i Pisidia. <sup>22</sup> Ba nori e hatagala raier a torir u kristen me hala ner u rangan hitaguhu i taren tegi pile hatagala menaien u nihamana i taren tara Tsunono. E Pol mere Barabas i pei hasi, a maroro te lauana tara Nipepeito tere Sunahan e ka mena u hakats u tiama u parpara i tanen. <sup>23</sup> Tara mamana taun i murina ti hopö kap hakapa raien u katunun pepeito kap i taren ti hamana uu tara Tsunono. Ba nori e agono ner a kannou me singo sil raren, me haka rarien tara nipepeito kap tara nitagala tara Tsunono tega tatei tara kap raien.

<sup>24</sup> Be Pol mere Banabas e la sila uaier tara provins i Pisidia me na tuku ria tara provins i Pampilia. <sup>25</sup> Pöata ti hatei hakapa naien u raranga tara taun i Pega, ba nori e gala lel uaier tara taun i Atalia. <sup>26</sup> Ba nori e osa ria tara tolaala me lauaier i Antiok na i Siria, a taun ti tanie men a toukui ti kato hakape men.

<sup>27</sup> Temi butu talaien i Antiok ba nori e gono hoboto raier u kristen, ba nori e hahatei naier a mamanaka hoboto te kato be raien e Sunahan, me poeier, “E Sunahan e kalati a maroro turu katuun tema Jiu ri, ba nori te hamanar.” <sup>28</sup> Bere Pol mere Banabas e ka gono meraier u kristenira i Antiok a pöata a ngahangaha.

## 15

<sup>1</sup> A palair u katunura i Judia i la uama i Antiok memi hatuts raier u kristen me poeier, “Tema kukute moi limiou a markato tere Mosis ba tema hapö mi, e Sunahan ema taguhu ranoui limiou.”

<sup>2</sup> Pöata timar ranga uu katuun teka, be Pol mere Banabas e hia raharaha gono me raren. Ba u kristen e hatuol raier ere Pol mere Banabas na palair u katuun has tegi la uaien i Jerusalem mena hamatskö gono merari u aposol na pal kapan turu kristen lotu u raranga teka.

*U hagum u kapan turu kristen te butuia i Jerusalem*

<sup>3</sup> Ba u kristen e tula merarien i Jerusalem ba nori e sila ria i gusuna i Pinisia na i Samaria. U kristen tara huol a han teka i sasaala koru mei ti hatei meraien, e Sunahan e habiritsir a torir u katuun tema Jiu ri. <sup>4</sup> Pöata tina tukuien i Jerusalem, u aposol na pal kapan na palair u kristen i sasaala koru meraien be Pol mere Banabas e hatei rarien a mamanaka te kato gono meraien e Sunahan. <sup>5</sup> Kaba a palair u kristen tara pala turu Parasi i takei me poeier, “U katuun tema Jiu ri egi hapö bate kukutier a Lo tere Mosis.”

<sup>6</sup> Ba u aposol na pal kapan e gono siler tegi hamatskö menaien u ranga teka. <sup>7</sup> Nori i solon gum a pöata a ngahangaha be Pita e tuoluna me poeiena i taren, “A matsi hatoulana, alimiou e atei silemiou i manasa e Sunahan e mola raira a toukui. Na nonei e hopö kap naiou lia tego hatei menai lia u Bulungana u Niga tara pala tema Jiu ri, ba nori te tatei hengor bate hamanar. <sup>8</sup> E Sunahan e atei silena a torir u katuun hoboto, bate haröto

ranei ra nonei e haniga has rena a pala tema Jiu ri. Nonei e hala raneien u Namnamei u Göagono i tanen, e kato has uana temar hala mera neien ra. <sup>9</sup> Kaba nonei ema katoe ii a tabina markato i tarara na tabina markato i taren. E möa. Nori i hamanaia i tanen, na tara markato lasi teka te luba meien a markato a omi i taren. <sup>10</sup> Alimiou e namots torohanan kato haraharahemiou e Sunahan tego haka mena milimiou a markato a tiama teka turu kristen. I manasa u tuburara na ra has ima antunan söate ii a mar nitiam a teka. <sup>11</sup> Ara e mar hamana las uara teka: e Sunahan e lu pouts ranou ra tara nihitaguhu tere Iesu a Tsunono, markato has uana te lu pouts mera neien u katuun teka.”

<sup>12</sup> Ba u hagum e gumuna me hahengona turu raranga tere Banabas mere Pol ti hahatei menaien u mamana u mirakol te kato sila nai e Sunahan i taren i gusuna u katuun tema Jiu ri. <sup>13</sup> Pöata ti ranga hakapaien, be Jemis e poeiena, “A matsi hahatoulana, hengo bumia i tar. <sup>14</sup> E Saimon e ranga hakapa mera lo limiou me hatei nena temar la tutuun uama e Sunahan turu katuun tema Jiu ri, memi hopö kap bera neien a peisanen i gusura u katuun. <sup>15</sup> U ranga teka e matskö gono mena u raranga turu propet timar koloto uaien:

<sup>16</sup> I murimuri alia ena la pouts guma romana,  
     ba lia temi kato haniga pouts ragou a pala tere  
     Devit,  
 e here nei a luma te omi  
     ba katuun temi kui hatsimus poutse nen.

<sup>17</sup> Ba u katuun halhal te tatei sake hase riou a  
     Tsunono,  
 u katuun has tema Jiu ri te opö kap mer a  
     solor.

<sup>18</sup> A Tsunono e mar ranga uu teka, nonei te habuti u raranga teka i manasa koru.’ “U propet timar koloto uu teka.

<sup>19</sup> “Bora: aragi ma tatei kato homi rai u katuun tema Jiu ri te habirits menarien a toriren tere Sunahan. <sup>20</sup> Aragi koloto uu i taren, bate hatei rarien nori egi agonein a mamananaka te haats ba naria turu kesa na nori gima tsikolo ii. Ba nori tema tatei noueri a haröete te kepa hamate naria i totongolo nen, na egima tatei nou hase ii u rahatsing. <sup>21</sup> Taraha, i manasa na te la noahasina i romana, u katuun te hahatei ner u raranga tere Mosis e ka ria turu taun hoboto. Na nori i roron habulunganein u raranga i tanen iahana u luman lotu turu Jiu turu mamana u lanin lotu i taren.” E Jemis temar ranga uu teka.

*Nori i hala menai u pas turu kristen tema Jiu ri*

<sup>22</sup> Ba u aposol na pal kapan na palair u kristen hoboto e kitseier u ranga ba nori e hopö kap naier a huol katuun i taren, tego la gono mer ere Banabas mere Pol i Antiok. Nori i halani ere Judas (a tana solo i tanen e Basabas) mere Sailas u tson mammam has turu kristen. <sup>23</sup> Nori i hala gono meraien u pas temar ranga uu teka:

“Alam u aposol na pal kapan, alam a töa pala has i tamilimiou te hamana uaiem tere Iesu. Alam e koloto menami u pas teka i tamilimiou a matsi hahatoulana tu tuhana ma tara pala tema Jiu ri, te ka mia tara taun i Antiok na tara provins i Siria na i Silisia.

<sup>24</sup> “Alam u hengoan a palair u katuun i tamulam ina hasingoto koru merai limiou a man raranga i



taren. Ba nori e kato hatutueier u hakats i tamilimiu. Kaba alam uma ranga mera leien tegina markato uaien teka. E möa. <sup>25</sup> Alam u hengo u ranga teka ba lam e ka mem u töa u tori me kitsem u raranga tego hopö kap menai a huol katuun bate hala mera muleien i tamilimiu, nori mera taina huol a katuun te ngil koru remuma lam, ere Banabas mere Pol. <sup>26</sup> E Judas ne Sailas i roron solosei e Iesu Kristo a Tsunono i tarara, na ima matoute ii ti katsin puli meraien u katuun. <sup>27</sup> Alam e hala rem ere Judas mere Sailas. Nori tena hatei peisa rariou limiou u töa noahas u mar raranga te kana turu pas teka. <sup>28-29</sup> U Namnamei u Göagono na lam u mar kits menai u raranga teka: alam ema tatei hakeiemi a markato a tiama koru i tamilimiu. A man markato lasi teka tegoma katoe milimiu: alimiu go agono naiam a manka te haats ba naria turu kesa, batema tatei nou hasemi u rahatsing na haröete te kepa hamate naria i totongolonen. Na limiou goma tatei tsikolomi. Te hatalis ba nemia limiou a man markato teka, ba limiou te ka haniga mou. Nonei talasi.” U pas e mar ranga uana teka.

<sup>30</sup> Ba u kristen e tula raren ba nori e la uaier i Antiok. Nori i goner u kristenira i Antiok ba nori e hala rarien u pas teka. <sup>31</sup> Ba nori e tara hakape ren me sasaala koru mer u raranga te kaia turu pas teka. <sup>32</sup> Ere Judas mere Sailas nori has u propet i hala rai u kristen u raranga u niga u parpara te kato hatagali a toriren. <sup>33</sup> A huol a katuun teka i gamon kaia i Antiok, bu kristen e hala pouts rarien a masalohana. Nori i hala pouts mera leien turu katuun ti hala ramen. <sup>34</sup> Kaba e Sailas e kaka poutsia i Antiok.

<sup>35</sup> E Pol mere Banabas i ka hasia i Antiok. Nori i kui gono mer a palair u katuun u para ti hatuts meraien u katuun na ti hatei menaien u Bulungana u Niga tara Tsunono.

### *Ere Pol mere Banabas i la kalakala*

<sup>36</sup> U lahisa u lan e la hakapa, be Pol e ranga mena e Banabas me poeiena, “Aragi la pouts batena tara raiera u kristen tara mamana taun ti hatei mam ramei ra u raranga tara Tsunono. Ba ra tena tarera ime te marka uaren.” <sup>37</sup> E Banabas e katsin peigi hasi e Jon ti ngö hase ii e Mak. <sup>38</sup> Kaba e Pol ema ngilin la gono mei a katuun te laba namen i Pampilia na tema la gono meraien tara man toukui. <sup>39</sup> A hiaraharaha taren e tagala koru ba nori e hialala kalakalar be Banabas e peigeiena e Mak be na osa ria tara tolaala me lauaier tara tolo i Saiprus. <sup>40</sup> Kaba e Pol e lui e Sailas, ba u kristen e poeier, “A niniganiga tara Tsunono e tatei la gono mera noulimiou.” <sup>41</sup> Ba nori e sila ria tara provins i Siria na i Silisia, mena hatagala raier u kristen tara man makum teka.

## 16

### *E Timoti e la gono mer ere Pol mere Sailas*

<sup>1</sup> Ere Pol mere Sailas i la mam uu tara taun i Debi be la lelir i Listra te kaia a töa kristen a hitots, a solonen e Timoti. E tsinanen a toun Jiu, nonei a kristen has kaba e tamanen a toun Grik. <sup>2</sup> U kristenira i Listra na i Aikoniam i hamana korui a markato tere Timoti me poeier, “Nonei a katuun a niga.” <sup>3</sup> Pol e ngil korui e Timoti ga la gono meien. Ba nonei e lue nen me hapö nanen, taraha, u Jiu hoboto ti kaia tara han teka i atei sil e tamane Timoti a toun Grik. A tei Grik ima kukute ii a

markato te hapö uaier ti tagala mei u Jiu. <sup>4</sup> Pöata ti tataala ien tara man taun teka nori i hateirai u kristen u raranga ti kitseia u aposol na pal kapan i Jerusalem bate poeier, “Alimiou go kukuteiam a ka teka.” <sup>5</sup> Ba u nihamana turu kristen e butu hatagala koruna, na u hihase i taren e butu hapan susul turu mamana u lan.

### *E Pol e tari a katununa i Masedonia*

<sup>6</sup> Nori i silaia i gusuna a provins i Prigia na i Gale-sia. U Namnamei u Göagono e hatei raien tegima tatei hihatuts menaien u raranga tere Sunahan tara han i Eisia. <sup>7</sup> Pöata tina butuien i Misia, ba nori e torohanan katsin la uaier iahana a provins i Bitenia. Kaba u Namnamei tere Iesu e hatu kap raien. <sup>8</sup> Ba nori e la karasa ba ner i Misia me la uaier tara taun i Troas. <sup>9</sup> Tara bong be Pol e tarena u töa u hiharöto. A töa tsonuna i Masedonia e tuol me poeiena i tanen, “Alö go aroho uama i Masedonia batemi taguhu ramou lam!” <sup>10</sup> Pöata te tara hakapeien u hiharöto, ba lam e haseseim me torohanan lauaiem tara provins i Masedonia, taraha alam u atei sil e Sunahan e ngö sil rai lam tegona polasa menai lam u Bulungana u Niga turu katuun tara han teka.

### *E Lidia e hamanaia tere Iesu*

<sup>11</sup> Ba lam ena osa mia tara tolaala be laba nem a taun i Troas me aroho hamatskö uaiem tara tolo i Samotres. Ba u hamahö ba lam e la sokö uaiem tara taun i Niapolis. <sup>12</sup> Alam u laban i Niapolis be kete uaiem tara taun i Pilipai, a han pan tara provins i Masedonia, a han has turu katunura i Rom. Ba lam e gamon ka bumia i Pilipai. <sup>13</sup> Turu Lan u Göagono turu Jiu, ba lam e lakasa uam ielesala tara taun i rehina ramun olo tu peia lam

te kaia a makum ti roron singoia u Jiu. Ba lam e gumum me raranga gono merem a touhaliou ti gono hakapaia nonei tara makum. <sup>14</sup> A töa tahl a solonen e Lidia e kaia i gusura a touhaliou ti hengoia i tamulam. Nonei a tahluna tara taun i Taiataira na nonei e roron haholin u labalaba a hihol i tanen te la sei. Nonei e roron hatsunoni e Sunahan, ba Tsunono e kalatena a torinen ba nonei e hanige iena u raranga tere Pol. <sup>15</sup> Ba nonei na u katuun ti sösohoia i luma i tanen e habaptaisir. Ba nonei a tahl e ranga hataatagina me poeiena, “Te atei sile mia limiou alia e hamana hatagala koru uagu tara Tsunono, ba limiou temi ka bumia i luma i tar.” Ba nonei e tagala sil koru ranou lam ba lam e lam i luma i tanen.

*Ere Pol mere Sailas i kaia tara karabus i Pilipai*

<sup>16</sup> Turu töa u lan alam u la uu tara makum ti roron singoia, be tupalem a tahlun kukui puku te ka mei a masaloho te hatein a manka tena la nama. A tahl teka e harangi a töa liliahanei a omi, ba nonei e lu bera nei u katuun ti hakuie ien a pan nen a moni. <sup>17</sup> Pöata te kukuteien e Pol na lam, nonei e ku nitöani, “A pal tson teka u katunun kui tere Sunahan iasa koru. Nori e haröto rari limiou a maroro te lu sila namia limiou a nihitaguhi tere Sunahan.” <sup>18</sup> A tahl teka e kato nitöa las uu teka turu mamana u lan. E Pol e sökana koru mei te rangan töa uu a tahl ba nonei e habiritsina me poeiena tara liliahanei, “Alia e ranga megou lö tara solona e Iesu Kristo, alö go koulban a tahl teka.” Ba nonei tara tsi pöata puku has ba liliahanei e laba nanen.

<sup>19</sup> U katuun ti hakui a tahl teka i atei sil a ka ti lulueien a moni e kapa tala. Ba nori ena las

boroboro raier ere Pol mere Sailas me las tsibil me rarien tara makumun töana i matar a pal kapan.

<sup>20</sup> Ba nori ena piou rarien turu katuun tara gamman me poeier, “A pal tson teka u Jiu, nori emi kato homier a taun i tarara. <sup>21</sup> Nori emi hihatuts has ner a markato te hapiou nena a lo i tarara. Ara ema tatei hanige rei a ka teka, taraha ara a tei Rom.” <sup>22</sup> Ba u katuun e hatangana hoboto ner u ranga teka. Ba gamman e hatangana hasir ba u katuun i taren e kiis kata ba ner u hasobö tere Pol mere Sailas, ba nori e singata rarien a pata. <sup>23</sup> I murina ti singata hohomi koru rarien ba nori ena lapo ba rarien tara luman karabus. Me poeier tara tson pepeito kap tara luman karabus, “Pepeito kap haniger a huol a katuun teka.” <sup>24</sup> Tara pöata te hengoeien u ranga teka, ba nonei e haka ranen tara töa rum iogana nitöa me hakits kap ranei a man mouren a makumun rui a tiama.

<sup>25</sup> Tara gusuna bong bere Pol mere Sailas e singo uaiier tere Sunahan me soloseieren turu köman lotu, a palair u karabus i hehengoia ti köma uaien.

<sup>26</sup> Ba töa nun a pannen koru e songots butuna me gas hapanena a luman karabus me tagas hanöa nitöa nama i kopina u tul tara luma. Ba man tamana hoboto e takalatar, na u tsien i tapurese ba hasir a mour u karabus me rusur. <sup>27</sup> Ba tson pepeito kap e supakatana me tagulena. Ba pöata te tareien u tamana i takalata hakapa, ba nonei e lousena u kilatan hiatatung i tanen me katsin ngats hamate iena a peisanen, taraha nonei e pei u karabus i bus hakapa. <sup>28</sup> Be Pol e ku hapan koruna me poeiena, “Möa tu ngatsi a peisamölö! Alam hoboto e kam!”

<sup>29</sup> Ba tson pepeito kap e ngö silena tu alesala

me piata tasuna mena tuhatukun nena i matana ere Pol mere Sailas, bate toltololo tala mena a nimatout. <sup>30</sup> Ba nonei e las mera neien i biou me poeiena, “A matsi tsunono, aha tego kati lia balia te luegou a nihitaguhu tere Sunahan?”

<sup>31</sup> Ba nori e poeier, “Hamana uu tara Tsunono e Iesu, balö te lueiem a nihitaguhu tere Sunahan, na pal katuun has i tamölö.” <sup>32</sup> Ba nori e hatei rien u raranga tere Sunahan na u katuun hoboto has ti kaia i luma tanen. <sup>33</sup> Ba nonei noahas tara bong teka ba tson pepeito kap e lu rena ere Pol mere Sailas me galus rena a man takiraha i taren. Ba nonei na u katuun hoboto i tanen e lu sokön töa ner a baptais. <sup>34</sup> Ba nonei e lu rena ere Pol mere Sailas mena sei ria i luma i tanen, ba nonei e hanou ranen. Nonei na pala hoboto i tanen i sasaala koru mei ti hamana uaien tere Sunahan.

<sup>35</sup> Tara bongbong ba gamman e tula ranama u polis, nonei e hatei rema u polis me poeiena, “Halakasa raiam u katuun teka.”

<sup>36</sup> Ba tson pepeito kap ena hatei rena ere Pol mere Sailas me poeiena, “A gamman e hala nena u ranga te poeiena, alimiou mere Sailas egi halakasa raiou. Bara! Lakasa tala muma, a masalohana e tatei la gono mera noulimiou.”

<sup>37</sup> Be Pol e poeiena turu polis, “Nori i ma kout hamatskö merai lam na nori i singata railam a pata i matar u katuun. Alam has u katunura i Rom, kaba nori i haka has raia lam tara karabus. Nori e katsin halakasa hamous rariou lam. E möa koru! Nori peisa egi lama batemi halakasa rariou lam!”

<sup>38</sup> Ba u polis ena hatei ner u raranga teka tara gamman. Pöata ti hengo naien ere Pol mere Sailas u katunura i Rom, ba nori e matout korur. <sup>39</sup> Ba

nori ena ranga hataatagi koru ria i taren ba nori e lakasa gono mera ren tara luman karabus be tahul raren egi laban a taun. <sup>40</sup> Bere Pol mere Sailas e laba ner a luman karabus me lauaier i luma tere Lidia, ba nori ena tara raier u katuun ti hamanaia tere Iesu. Ba nori e ranga gono mera ren me kato hatagaler u nihamana i taren, ba nori e töan lar.

## 17

### *A han i Tesalonaika*

<sup>1</sup> E Pol mere Sailas i silaia tara taun i Ampipolis na i Apolonia ba nori ena butu ria tara taun i Tesalonaika te kaia a luman lotu turu Jiu. <sup>2</sup> Be Pol e tasu na tara luman lotu turu Jiu te roron markato uaieren, ba turu topisa u Lan u Göagono be Pol e ranga mera nen me hatei nena u Buku u Göagono. <sup>3</sup> Ba nonei e ranga hatarare nena u hihatuts turu Buku u Göagono be haröto nena e Kristo e lu hakapi a kamits na e takei pouts has ia tara tou mate i tanen. Ba nonei e poeiena, “E Iesu a katuun te ranga negu lia nonei a Mesaia, a katuun te hopö kapiin e Sunahan.” <sup>4</sup> A palair u katuun i hamana me ka hoboto gono meraier ere Pol mere Sailas. U katunura i Gris u para ti hatsunoni e Sunahan i kato has uu iesana, na touhaliou ti panpanir a touhaliou i kukute has rema ere Pol mere Sailas.

<sup>5</sup> Kaba u Jiu i hiomi ba nori e gono hoboto rarima u katuun u karous u omi ti roron ka pinopino laia tara töana memi gono hobotor me katoeier a töa hun katuun, ba nori e getar me hasingoto rer u katuun hoboto tara taun. Ba nori emi heleier a luma tere Jeson ti sake meraien ere Pol mere Sailas bate la meraren turu katuun ti gono. <sup>6</sup> Pöata

tima sabe raien, ba nori e las halakasa rer e Jeson na palair u katuun ti hamanaia tere Iesu mena piou rarien tara pal kapan tara taun. Ba nori e poeier, “U katuun teka i kato hasingoter u katuun tara han hoboto, ba nori e la has uarima i teka. <sup>7</sup> Be Jeson e las hagum ranen i luma i tanen. Nori e hipus ner a lo tere Sisa, a gamman pan i tarara, ba nori e poeier a tana katuun a solonen e Iesu te kingina.” <sup>8</sup> U katuun na pal kapan tara taun i hengoein u ranga teka, ba nori e toku korur. <sup>9</sup> Pöata ti lu hakapeia a pal kapan a moni tegi sakahis meraien ere Jeson na palair u katuun ti hamanaia tere Iesu, ba nori e halakasa ba rarien.

<sup>10</sup> Ba tara bong turu lan teka bu katuun ti hamanaia tere Iesu e hala ba merari ere Pol mere Sailas tara taun i Beria. Ba pöata ti tuku hakapa ien i Beria ba nori ena tasu ria tara luman lotu turu Jiu. <sup>11</sup> U Jiu teka ima here rai u Jiu ra i Tesalonaika. U Jiu ra i Beria i hakats halesala koru, kaba u Jiu ra i Tesalonaika i hapiou ni u raranga u tsimus. U Jiu ra i Beria i hengo hanigei u raranga tere Pol, na turu mamana u lan nori i taratara ia turu Buku u Göagono bate sakier tego mana uu raranga teka. <sup>12</sup> A para koru a katuun e hamanaia tere Iesu. Na u katunura has i Gris u para i hamana has, a touhaliou pan na pal tson has. <sup>13</sup> Kaba pöata ti hengoeia u Jiu ra i Tesalonaika e Pol e habulunganein u raranga tere Sunahan i Beria has, ba nori e la uarima i Beria memi hatakei haser a raharaha turu katuun teka. <sup>14</sup> Ba u katuun ti hamanaia tere Iesu e hala ba menari e Pol i tasi, kaba ere Sailas mere Timoti i kakaia i Beria. <sup>15</sup> U katuun ti la gono mema e Pol ina pioun töa naien tara taun i Atens. Be Pol e tula kopis mera



neien u raranga tegina ngö meraien ere Sailas mere Timoti ba nori te la boroboro uarima i tanen, ba nori e hakopis pouts uaier i Beria.

### *A taun i Atens*

<sup>16</sup> Pöata te hahaloso raien e Pol i Atens, nonei e tori tsuga koruni te tara menaien u kesa u para ti lotui u katuun tara taun teka. <sup>17</sup> Be Pol e hia e ele gono merena u Jiu na u katuun tema Jiu ri ti hatsunoni e Sunahan tara luman lotu. Na turu mamana u lan nonei e hiararanga gono has mer u katuun ti kaia tara töana. <sup>18</sup> Nonei e hiararanga gono has mer u tson hihatuts turu huol u mar hihatuts ti ngöe ii u Epikurian na u Stoik. Ba palai e poeier, “Aha nonei te ranga nena a katuun a borera teka?”

Ba palai e poeier, “Nonei e ranga toum nena a tana got halhal.” Nori i mar ranga uu teka, taraha e Pol e hatei raien e Iesu me poeiena nonei e takei poutsia tara tou mate. <sup>19</sup> Ba nori e luer e Pol mena piou narien turu töa u hagum te kaia tara makumun hagum ti ngöei u Ariopagas. Ba nori e poeier, “Alam e ngilin atei silem u hihatuts u tsimus te la memuma lö. <sup>20</sup> Alam u töan hengoe naten na lam e ngilin atei silem te mouna uana u raranga teka.” <sup>21</sup> U katuun hobotora i Atens na u katunura tara man tana man han ti kaia i Atens, nori i ngilin hakapa koruei a pöata i taren tara saha ka tsimus te butu banori te hagum mer ti hia raranga sil meien.

<sup>22</sup> Be Pol e tuoluna i gusuna u Ariopagas me poeiena, “A matsi tsunonora i Atens, a mamanaka hoboto te tare gulia e haröto nena alimiou e hakats nitöa mia turu spirit. <sup>23</sup> Alia u hula la bate tareiegu

a man makum a man Göagono te lotu mia limiou. Alia u tara hasi a töa makumun haats te kana u ranga te poeiena: ‘Tara töa got tema atei sileri u katuun.’ Nonei a Got teka te hatsunono uami limiou na limiou ema atei sile mien, nonei a Got te habulungana nagu lia i tamilimiou.

<sup>24</sup> “E Sunahan te habuti a han i puta teka na mamanaka te kana i tanen, nonei ema ka neia turu luman lotu ti kui u katuun, taraha nonei a Tsunono na i Kolö na i puta has. <sup>25</sup> E möa ta katuun ga kui beien, nori e mar taguhu mena roien ime? E möa. Nonei peisa te hala nena a nitöatöana i puta turu katuun hoboto bate hala raneien a mamanaka hoboto teka meren. <sup>26</sup> Tara töa tuburen ba nonei e hatuhanena a hun katuun te hasaputeien a man han hoboto i puta tegina kaien. Nonei e hopö kap mamin a pöata tara man töa man hun katuun hoboto, bate pana kap has nena a man han tegina kaien. <sup>27</sup> E Sunahan e kato mei a ka teka ba u katuun te sachie ren, bate salasa sakesake rouen turu kuhil bate tatei sabie rouen. Kaba e Sunahan ema lehana koru ba nanei ta töa i tarara. <sup>28</sup> Taraha, i tanen puku bara te töatöara, bara te tataalara, na i tanen puku bara te kara. Na palaina u tson atei i tamilimiou i pei hasi, ‘Ara has i tuhanama i tanen.’

<sup>29</sup> “Ti tuhanaia ra tere Sunahan, bara tema tatei pei rei nonei e here nei a goul tsi a silva na a hatu na a ka te hakats mam nena a katuun bate toke nen. E möa. <sup>30</sup> E Sunahan e tara hahalongolo tunir u katuun tara pöata i manasa ti tutu ien. Kaba i romana nonei e hatei renei u katuun tara man han hoboto egi hakapa korui a man markato a man omi na u hakats u omi i taren. <sup>31</sup> Taraha, nonei e hopö kapiin u lan tego butuma u kout i

tanen, tara pöata teka ba nonei te hala nanou a nitsunono i tanen tara katuun te hopö kap mam naien. Na katuun teka e ona hamatskö hoboto ranou u katunura i puta. Be Sunahan te haröto rena u katuun hoboto te mana uana a ka teka, taraha nonei e hatakei poutsi a katuun teka tara tou mate.”

<sup>32</sup> U katuun i hengo hakapi u raranga tere Pol. Ba pöata ti hengo naien a katuun e takei poutsia tara tou mate, ba palai e gol hahamana naren. Kaba palai i pei, “Alam e ngilin hengoem u raranga i tamölö tara tana pöata.” <sup>33</sup> Be Pol e laba nena u hagum teka. <sup>34</sup> Kaba a palair u katuun ti ka gono meien i hamana me ka gono mer e Iesu. E Daionisias, te kaia turu hagum i Ariopagas, e kaia i gusuna a tsi hun katuun teka, na töa tahol has a solonen e Damaris, na palai has ti ka gono meraien.

## 18

### *E Pol e kui ia i Korin*

<sup>1</sup> Ba i murina a manka teka be Pol e laba nena a taun i Atens me la uana tara taun i Korin. <sup>2</sup> Ba nonei ena sabeiena a töa Jiu, a solonen e Akuila, a toun Pontas. Nori mera tahol i tanen e Prisila i hagou laba tuun nema a provins i Itali. Taraha, a gamman pan e Klodias e ranga merai u Jiu hoboto egi laban a taun i Rom, be Pol ena tara ranen.

<sup>3</sup> Nori u mun tahol i ka mei a töa mar toukui te ka has mei e Pol, be Pol e ka gono mera nen ba nori te kui hobotor. Nori i atein kuin a luma labalaba.\*

<sup>4</sup> Turu mamamu Lan u Göagono turu Jiu e Pol e la

---

\* **18:3:** Nori i atein tulin a luma te ngöeri turu HaInglis: *tent*.

uu turu luman lotu i taren bate ranga gono mera nen. Nonei e ngilin habuti u nihamana u niga turu Jiu na turu katunura i Grik has.

<sup>5</sup> Pöata tina tukuia ere Sailas mere Timoti ti laba namen i Masedonia be Pol te pina mena te habulungana menaien u ranga turu Jiu me poeiena, “E Iesu nonei e Mesaia.” <sup>6</sup> Kaba nori u Jiu i hipusiin u ranga i tanen me ranga sisi ria i tanen. Ba nonei e tohu ba nena u köahu turu hasobö i tanen te haröto merien a raharaha i tanen. Ba nonei e poeiena i taren, “Te tapolasa ba nemoa limiou e Sunahan bate tiamiou, a ka peisa noahas i tamilimiou. Alia u hatei hakapa railimiou u raranga u mana. Alia e la hamanasa tala uagou turu katuun tema Jiu ri.” <sup>7</sup> Be Pol e laba nena a luman lotu teka, me la uana tara luma tara töa katuun, a solonen e Tisias Jastas, a katuun te hatsunono hasi e Sunahan. A luma i tanen e kaia i rehina luman lotu turu Jiu. <sup>8</sup> Na tsunono tara luman lotu a solonen e Krispas. Nonei na u katuun hoboto ti kaia i luma i tanen i hamana ia tara Tsunono. Na para a katununa i Korin i hengo ia turu ranga tere Pol, ba nori e hamanar me habaptaisir.

<sup>9</sup> Tara töa bong be Pol e tarena u töa u hiharöto, ba Tsunono e poeiena i tanen, “Alö goma matouti. Möa tu hahalongolo, alö go hahatein u ranga. <sup>10</sup> Alia e ka gono megou lö, na e möa nou ta töa ta katuun tega antunan kato homie ioulö. Alia e ka megu u katuun u para tara taun teka.” <sup>11</sup> E Pol e kaia i Korin u töa u hiningal na tönomo a tsihou, te hihatuts naien a man raranga tere Sunahan.

<sup>12-13</sup> Kaba tara pöata te gamman ia e Galio i Gris, ba u Jiu e takei hobotor mena luerima e

Pol. Ba nori ena piou narien turu kout me poeier, “A katuun teka e roron hatuts ranei u katuun tegi kato menaien u mar lotu tere Sunahan tema matskö neia tara Lo i tamulam u Jiu.”

<sup>14</sup> Pöata te katsin ranga palis ia e Pol be Galio e poeiena turu Jiu, “Alimiou u Jiu, sanena tega pekoia a katuun teka a lo, tsi tega katoeien ta markato ta omi, alia e antunan hengo ragou limiou. <sup>15</sup> Kaba temi ranga menamilimiou a man ranga pinopino na man solo na man lo peisa i tamilimiou, alimiou peisa tego hamatsköeiam a ka teka. Alia ema antunan hengoegi u kout turu mar ranga teka.” <sup>16</sup> Ba nonei e tsuga ba ranen turu kout. <sup>17</sup> Ba nori hoboto e pile kap ner a tsunono tara luman lotu turu Jiu, a solonen e Sostenis, ba nori e singsingate rien i rehina makumun kout. Kaba e Galio ema tara sile ii a ka teka.

### *E Pol e la pouts uu tara taun i Antiok te kana i Siria*

<sup>18</sup> E Pol e gamon ka lel ia i Korin, ba nonei e raranga haniga merena u kristen, me töan lana. Ba nonei e osana tara tolaala tega la uaien tara provins i Siria. E Prisila mere Akuila i la gono meien. Tara taun i Senkria nonei e kuli ban a hulunen, te mar ranga hamana uaien tere Sunahan. <sup>19</sup> Pöata tina tukuuien tara taun i Epesis, be Pol e laba rena ere Prisila mere Akuila. Ba nonei e tasu pepeisana iahana luman lotu turu Jiu mena hiararanga gono mera iena u Jiu. <sup>20</sup> Kaba tara pöata ti rangata naien tega gamon ka buen ba nonei e ramana. <sup>21</sup> Kaba tara pöata te katsin laien be Pol e ranga haniga pouts mera nen me poeiena, “Turu ngil tere Sunahan, balia tena la pouts guma

romana i tamilimiou.” Ba nonei ena osana tara tolaala me laba nena i Epesis.

<sup>22</sup> Pöata tena sung ia a tolaala tara taun i Sisaria, be Pol e lase uana i Jerusalem mena tara rena u kristen, ba nonei e töan la uana i Antiok.

*E Pol e hatania a hatopisana nilala i tanen*

<sup>23</sup> I murina te gamon kaia e Pol i Antiok ba nonei e lana tara man palaina man han tara provins i Galesia na i Pritsia, te kato hatagala pouts menaien u nihamana turu kristen hoboto.

<sup>24</sup> A töa Jiu a toun Aleksenria emi kaia i Epesis. A solonen e Apolos. Nonei a katuun te roron katoi a man ranga a man niga, na nonei e atei sil koru hasi u raranga tere Sunahan te kana turu Buku u Göagono. <sup>25</sup> Nonei i hatutse ii a maroro tara Tsunono, na nonei e tagala sil korui a Tsunono. Nonei e roron hatuts hamatskö rai u katuun a manka tere Iesu te hengo naien. Kaba nonei e atei sil peisa lasi a man hihatuts tere Jon a Tsonun Baptais. <sup>26</sup> Nonei e hatanian ranga hatagalai ia hana luman lotu turu Jiu. Kaba pöata te hengo naien e Prisila mere Akuila ba nori e lue ren me haröte rien a mouna koru a markato tere Sunahan. <sup>27</sup> Tara pöata te katsin laia e Apolos tara provins i Gris, ba u kristenira i Epesis e hale rien u rangan hitaguhu tara nilala i tanen. Nori i koloto has menai u pas turu kristenira i Gris tegi tatei lu haniga menaien. Be Apolos ena tukuna i Gris, me taguhu hatagala koru rena u katuun ti hamana te taatagi meraien e Sunahan. <sup>28</sup> Nonei e tagala koru mei te ranga palis uaien, bate pitaputa koru hasena u ranga hasoala turu Jiu i matar u katuun

hoboto. Bate haröto ranen turu Buku u Göagono, e Iesu nonei e Mesaia.

## 19

### *E Pol e kui ia i Korin*

<sup>1</sup> Tara pöata te kaia e Apolos tara taun i Korin, be Pol e silana tara makum te ka mei a man pokus ba nonei ena butuna i Epesis, tena sabe raien a palair u kristen. <sup>2</sup> Ba nonei e rangata ranen, “Alimiou u lu haseiam u Namnamei u Göagono tara pöata tu tanian lueia limiyou u nihamana turu kristen?”

Ba nori e poeier, “E möa. Alam uma hengo has nai u Namnamei u Göagono.”

<sup>3</sup> Be Pol e rangata lel ranen, “Ga saha mar baptais tu lueiam limiyou?”

Ba nori e poeier, “Alam u lui a baptais tere Jon.”

<sup>4</sup> Be Pol e poeiena, “Pöata te baptais raia e Jon u katuun ba nonei e poeiena, ‘Habirits ba naïam a man markato a man omi i tamilimiyou.’ Ba nonei e hatei raneien tegi hamana uaien tara katuun te kute nama i tanen, nonei e Iesu.”

<sup>5</sup> Pöata ti hengoeien u raranga teka ba nori e töan habaptais ria tara solona e Iesu a Tsunono.

<sup>6</sup> Pöata te hatakopeia e Pol a limanen ieluren, ba u Namnamei u Göagono e koul uanama i taren. Ba nori e ranga ria turu mamana u mar ranga, me ranga ner a manka te butu moto nou. <sup>7</sup> Toum romana a maloto na huol a katuun te habaptais nonei tara pöata.

<sup>8</sup> Be Pol e tasu uana iahana luman lotu turu Jiu, ba tara topisa a tsihou, nonei e rangan töa lasiin u Bulungana u Niga. Nonei e ranga hatagala meraien me torohanan hatakeiena u hakhakats u niga i taren tara Nipepeito tere Sunahan. <sup>9</sup> Kaba

a palai i hipus naien batema hamanari me ranga homi hasner a Maroro tara Tsunono i matar u katuun. Be Pol e lurena u kristen me la gono mera nen, na turu mamana u lan nonei e hatei naia u raranga iahana luman skul tere Tiranas. <sup>10</sup> U raranga teka e la me antunena u huol u hiningal. U katuun hoboto u Jiu na u katunura i Grik ti kaia tara provins i Eisia i hengo hoboti u raranga tara Tsunono.

### *A galapien tson tere Siva*

<sup>11</sup> E Sunahan e hatakui sila naia u mamana u mar mirakol tere Pol. <sup>12</sup> U hangitsip tsi u labalaba te sebeli a tuenreina e Pol i söata menai turu katuun ti siki ba man siki taren te laba ranen, na u liliahanei u omi i koul ba hasir u katuun bate lar. <sup>13</sup> Ba palair u Jiu e torohanen kato haser a mar toukui teka me poeier a solona e Iesu a Tsunono tegi hakoul meraien u liliahanei u omi turu katuun. Na nori a man töa i roron ranga u teka, “Alia e ranga hatagala koru megou lö tara solona e Iesu te roron ranga nena e Pol, koul ban!” <sup>14</sup> U tohit u munmun toulana ti kato a markato teka nori a galapien tson tara töa pris pan turu Jiu a solonen e Siva.

<sup>15</sup> Kaba töa liliahanei a omi e ranga palis raien me poeiena, “Alia e atei silegu e Iesu na e Pol e ka mer a nitagala, kaba lia ema atei sil ragi limiou!”

<sup>16</sup> Ba katuun te ka mei a liliahanei a omi e kura-pa uana i taren be atung ranen me tagala saluhe ranen me kato hohomi koru rena a peisaren me kiis kaakata ba raneien a man hasobö i taren. Ba nori e bus ba ner a luma teka me la mer a beloso. <sup>17</sup> Ba u Jiu na u Grik hoboto ti kaia i Epesis e hengo ner a ka teka, ba nimatout a kapan e butuna



turu katuun hoboto, ba nori e soloseier e Iesu a Tsunono. <sup>18</sup> U katuun u parpara koru ti hamana i lama memi pokeier a mamana a markato a omi ti katoeien i manasa. <sup>19</sup> Na para koru a katuun ti roron katoe u matuna na hirakö i gono hoboti a man bukun matuna na hirakö i taren me haatse ria turu tula i matar u katuun hoboto. Ba nori e aser a hihol tara buku hoboto teka me antunana tara 50,000 a makumun silva. <sup>20</sup> Tara markato teka, ba u raranga tara Tsunono e sata uana tara han a parpara me tagala saluhena.

*A tei Epesis i ku homin e Pol*

<sup>21</sup> Na i murina a manka teka, ba u Namnamei tere Sunahan e haleie nei e Pol u hakats tega la uaieren tara provins i Masedonia na i Gris, bate la hamurimuri uana i Jerusalem. Be Pol e poeiena, “I murina tena tare goua lia a man han teka, balia tena tara hase gou i Rom.” <sup>22</sup> Ba nonei e tula rena a huol a katunun hitaguhu i tanen, ere Timoti mere Irastas, ba nori e la mam uaier i Masedonia. E Pol e gamon ka noa buia tara provins i Eisia.

<sup>23</sup> Tara pöata teka a nomi pan e butuia i Epesis tima ngil menai u katuun a Maroro tara Tsunono. <sup>24</sup> E Demitrias e kukuiei a manka a silva. Nonei e roron kui tatateie a matsi makumun silva a mankan lotu ti hakeia tara luman lotu pan tere Atemis, a got gamogamo a tetahol ti roron hatsunono uu katunura i Epesis. E Demitrias e roron habuti a toukuin hahol a para turu katunun kui i tanen. <sup>25</sup> Nonei e goner u katuun teka ti kamei a töa mar toukui me poeiena, “A pal tson, alimiou e atei sil hasemiou a toukuin hahol teka e roron habutena a moni i tarara. <sup>26</sup> Na katuun teka e Pol e habirits hakapi u hakats tara katuun a parpara be

poeiena, ‘U kesa te kuieri ualima ema got hamanari.’ Alimiou u tare men na limiou u hengo hakapa hase men. Nonei ema markato peisa uai teka i Epesis. E möa. Nonei e kato hasema a man ranga teka tara han a parpara koru iahana provins teka i Eisia. <sup>27</sup> U raranga tara katuun teka e namots kato homiena a solo tara toukui i tarara. Na tana ka lel, u raranga i tanen e namots kato homi hasena a solo tara luman lotu pan tara got a tetahol e Atemis, bate here nei a ka pinopino turu hakats turu katuun. U katunura i Eisia hoboto na u katuun tara han hoboto e roron hatsunoner a got a tetahol teka. Kaba u raranga tara katuun teka e Pol, e katsin kato hataia tsiponena a nika-pan i tanen.” E Demitrias e mar ranga uu teka.

<sup>28</sup> Pöata ti hengoeien u raranga teka ba nori e raharaha korur. Ba nori e kur me poeier, “E Atemis a tetahol i tarara u katunura i Epesis te pan koruna!” <sup>29</sup> Ba u katuun hobotora i Epesis e hiage-tagetar. Nori i takei hoboto me piata uaier tara makumun hagum. Ba nori e las raier ere Gaius mere Aristakus be la gono mera ren. Nori a huol a katununa i Masedonia ti roron lala gono mei e Pol. <sup>30</sup> E Pol e ngilin la uu i gusur u katuun, kaba u kristen i hapiou naien. <sup>31</sup> Na palai hasir u gamman ni Eisia a man hahikapien tere Pol, nori i hala has nema u raranga i tanen bate ranga hatagala meren tegoma tatei la uaieren iahana makumun hagum. <sup>32</sup> U hagum teka ema niga lel ii, a palai i ku ni u tan u mar ranga, na palai i ku ni u tana lel has u mar raranga. Na para koru a katuun ema atei sile ii a mouna a ka timi gono sileien. <sup>33</sup> Ba u Jiu e tula menari e Aleksenda i hagus,

ba palair u katuun e ku siler tego kato menien u ranga. Be Aleksenda e hasoasei nena a limanen tegi kakamoto uaien ba nonei te ranga palisena u ranga i taren. <sup>34</sup> Kaba ti tara mareien nonei a Jiu, ba nori e totou ku hobotor me poeier, “E Artemis a tetahol i tarara u katunura i Epesis te pan koruna!” Nori i mar ku las uu teka e antunaia tara huol a aua.

<sup>35</sup> Ba töa katuun pan ni Epesis e kato hakakamoto rena u katuun me poeiena, “Ara u katunura i Epesis, u katuun hoboto e atei siler i Epesis nonei a taun te tara kap nena a luman lotu tara tetahol pan e Artemis, na taun has tara hatu a göagono te rusma i Kolö. <sup>36</sup> Möa koru ta katuun tega hipusin u raranga teka. Alimiou go kakamotoiam ba tema katoemi ta töa ta ka ta omi. <sup>37</sup> Alimiou ti lu remuma a huol a katuun teka, kaba nori ima kope ii ta ka tara luman lotu. Na nori ima ranga hahakos has nai a got a tetahol i tarara. <sup>38</sup> Te ngilin kout mena e Demitrias na u katunun kui i tanen a töa katuun, e ka mena a pöatan kout. Na gamman e ka hasina. Nori egi hamatsköeia u ranga i taren turu kout. <sup>39</sup> Na te ka lel memia limiou tu taina tu ranga, ba limiou te hamatsköe mien romana tara pöatan hagum. <sup>40</sup> Ara ena mots lueier ta niomi tara hiagetageta teka, ara i möa ta ka tegi rangein te hatei nanou a hiagetageta te kato lala.” <sup>41</sup> Pöata temar ranga hakapa uu a kapan teka, ba nonei e tula kalakala rena u katuun ba u hagum e tarurana.

## 20

*E Pol e la uu i Masedonia na i Gris*

<sup>1</sup> I murina te kapaia u hiagetageta be Pol e hangö ralala u kristen ba nonei e hala nena u ranga ti kato hatagala raien. Ba nonei e töan la uana tara provins i Masedonia. <sup>2-3</sup> Pöata te tataala hakapa la len tara man makum teka, me hala has nalala u rangan hitaguhu u parpara turu kristen, ba nonei ena töan butuna tara provins i Gris, te keien a topisa a tsihou. Pöata te katsin osa ien tara tolaala tega la uaien i Siria, kaba u Jiu i korupakö naien. Ba nonei e hakats nena tega sila pouts uaien i gusuna i Masedonia. <sup>4</sup> E Pol e la gono mei e Sopata, a katununa tara taun i Beria a pien tere Pairus. A palair u katuun i la gono has meien: ere Aristakus mere Sekundus ri Tesalonaika, na e Gaius tara taun i Debi, ne Timoti, na ere Tikikus mere Tropimas tara provins i Eisia. <sup>5</sup> Nori u katuun teka ti la mam mena hahaloso raria lam tara taun i Troas. <sup>6</sup> I murina a kannouna tara Beret te möa ta Is e la hakapa, ba lam e laba nem a taun i Pilipai mena osa mia tara tolaala me lam. Ba lam ena tuku mia i taren tara taun i Troas turu hatolimana u lan. Ba lam e ka mia i Troas turu tohit u lan.

### *E Pol e hatakei poutsi e Yutikas i Troas*

<sup>7</sup> Turu Sandei alam u gono sil te go nou hoboto uu bate kato hasem a Komunio. E Pol e katsin la turu hamahö ba nonei e rangana turu katuun me pile kap ranen e antunaia tara gusuna bong. <sup>8</sup> U lam u para e kulupuia tara rum iasa tu gonoi lam. <sup>9</sup> A töa katuun a hitots a solonen e Yutikas e gum ia tara binroa te tötopikueien. E Pol e ranga noa kaba e Yutikas e topi koru. Nonei e soho koru tala ba nonei e rus na tara binroa te gum ien me rus nitöa uana i puta, nonei e rus ma tara hatopisana

a salolo tara luma. Ba u katuun e piata koul uaier i puta tina tara menaien kaba nonei e mate hakapa. <sup>10</sup> Be Pol e koul hasina tena tara meien ba nonei e turuna me lukutu nanen me poeiena, “Alimiou goma tokumi. Nonei e töatöana.” <sup>11</sup> Be Pol e la pouts uana iasa tena pose menaien a beret ba nori e nour. Ba nonei e tania sei lelana u raranga i tanen e antunei a bongbong, ba nonei e töan laba ranen. <sup>12</sup> Ba nori e lu menari a katuun a hitots te töatöa pouts i han. Ba toriren e sasaala koru pouts tala menen.

*E Pol e laban i Troas me la uana i Mailitas*

<sup>13</sup> Alam u la mam mena osa mia tara tolaala me lauaiem tara taun i Asos. Ba lam ena sake la nem e Pol i Asos tego lu mena mien lam tara tolaala. Nonei noahas temar haka mam menai u ranga teka, taraha nonei e ngilin tataalaia i maroro te lauen i Asos. <sup>14</sup> Be Pol emi sabe rena lam i Asos, ba lam e lu mena mien tara tolaala ba lam e la hoboto uaiem tara taun i Mitilin. <sup>15</sup> Ba lam e laba nem i Mitilin ba turu hamahö ba lam ena tuku mia tara töa tolo a solonen i Kios. Ba turu hamahö lel ba lam ena tuku lel mia tara tabina tolo te ngöeri i Samos. Ba turu tana u lan ba lam ena tuku lel mia tara taun i Mailitas. <sup>16</sup> E Pol e hakatsin tego la sokö ba menaien a taun i Epesis ba nonei tema antunan gamon ka bunei tara provins i Eisia. Nonei e ngilin hasesei sil tega antunan na butu uaieren i Jerusalem i mamuna u Pentikos.

*E Pol e ranga haniga mer a pal kapanira i Epesis me lana*

<sup>17</sup> Tara pöata tu tukuia lam i Mailitas, be Pol e hala mena nei u ranga i Epesis. Nonei e ngör a pal kapan turu kristen egi la uama i tanen. <sup>18</sup> Pöata

temi tukuien i tanen ba nonei e poeiena i taren, “Alimiou e atei sil peisemiou tu marka uu lia tara pöata tu tuku ialia i Eisia, na tara mamana pöata tu ka gono merai lia limiou. <sup>19</sup> Na limiou e atei sile miou, a para pöata ti kitseia u Jiu u raranga tegi pitaputa menaien lia. Na tara ka teka alia u ka mei a nitiamana na u kamits u para. Kaba lia u hala putei a peisar bate katoegu a toukui tara Tsunono. <sup>20</sup> Na lia uma matout mei tu habulungana menai u raranga te tatei taguhu ranou limiou. Na turu hagum na tara man luma has i tamilimiou, alia u hatuts raiou limiou. Alimiou e atei sile men. <sup>21</sup> Alia u hatei hatagalein u ranga tara pal katuun i tar u Jiu na i tamilimiou has u Grik, tego habirits uaiam limiou tere Sunahan, na tego hamana has uaiam limiou tara Tsunono i tarara e Iesu Kristo.

<sup>22</sup> “Na lia e hatei ragou limiou, u Namnamei tere Sunahan e las tale noulia balia te la uagu i Jerusalem. A saha ka tena butu noua i tar i Jerusalem, alia ema ateigi. <sup>23</sup> A ka lasi teka te atei sile gulia: tara mamana taun u Namnamei u Göagono e roron hatei halesaleiou lia bate poeiena, ‘Alö ena sabie mou a kamits ba nori tena haka hase roua lö tara karabus.’ <sup>24</sup> Kaba lia ema hakats hapara nagi tego töatöa uu lia tsi tego mate uu lia. Kaba lia e hakats sil koruegu tego antunan hakapa haniga menai lia a toukui teka tu lueia lia tere Iesu a Tsunono, a toukuina te hatei menari u Bulungana u Niga tara nihitaguhu tere Sunahan.”

<sup>25</sup> E Pol e ranga lel me poeiena, “I manasa tu tataala ia lia i gusumilimiou, ba lia te hatei negu u rangana tara Nipepeito tere Sunahan. Kaba lia e hatei ragou limiou, alimiou hoboto ema tara

lele moui lia. <sup>26</sup> Na lia e hatei ragou limiou, te tapolasa noa ta tōa i tamilimiu, ema ka uanei i tar. <sup>27</sup> Alia uma peits ba railimiu tu ranga. E möa. Alia u hatei railimiu a man hakats hoboto tere Sunahan. <sup>28</sup> Alimiu go tara kap haniga naiam a peisa milimiu na u katuun hoboto tere Iesu, te here rari u sipsip. U Namnamei u Göagono e hopö kap raiou limiou u katunun taratarakap i taren. Taraha, nonei e ngilena alimiu go taratara kap haniga raiam u katuun tere Sunahan. A Pien Tson i tanen e sakahis hakapa raien u rahatsing i tanen. <sup>29</sup> Kaba alia e ateigu, te laba ragoua lia limiou ba u katunun hihatuts u omi te la rima romana i gusumilimiu batemi kato homi rariou limiou, bate here roi u muki u hie te kato homi raier u sipsip. <sup>30</sup> A palair u katuun i tamilimiu pouts has te katoeier romana u ranga u gamo, tegi las merai u kristen bate kukute raren. <sup>31</sup> Na limiou go hanei haniga nitōa iam. Alimiu go hakats sileiam a ka teka: turu topisa u hiningal nitōa, tara bong na tara lan, alia uma hanōa ii tu hatuts merai limiou hoboto a man tötōa. Alia u hatuts merai limiou a nitaatagi pan.

<sup>32</sup> “Na lia e haka tala ragia limiou tara nipepeito tara Tsunono, na turu rangana tara nihitaguhu i tanen. Nonei e antunan hatagala nena a nihamana i tamilimiu bate hala ranei limiou a manka man niga hoboto, te roron hala ranei e Sunahan u katuun hoboto te hopö kap meraien i tanen. <sup>33</sup> Alia uma kato sile ii tego lu menai ta moni tsi tu hasobö tara tana katuun. <sup>34</sup> Alimiu te atei silemiou u huol u ualima i tar te pilein a toukui na te taguheiou lia tara manka te makmakum, bate taguhu has rena u katuun ti ka gono

meiou lia. <sup>35</sup> Tara mamana toukui i tar, alia u haröto railimiou tegi mar kui hatagala uu ra teka, bara te tatei taguhu raier u katuun u pinolasa. Aragi hakatsin u raranga te kato e Iesu a Tsunono me poeiena, ‘A nisasaala tara katuun te hala nena a manka tara tana katuun e pan bala nena a nisasaala tara katuun te luna tara tana katuun.’ ”

<sup>36</sup> E Pol e hakapi u raranga i tanen ba nonei e hatukununa me singo hoboto gono mera nen tere Sunahan. <sup>37</sup> Kaba nori i tabe koru lasi me lukuter e Pol me taatagi koru naren. <sup>38</sup> Nori i hasagohi a nitaatagi pan koru te pei mam menai e Pol, “Alimiou ema tara lele moui lia.” Ba nori ena piou narien tara tolaala.

## 21

### *E Pol e osaia tara tolaala tega la uaien i Jerusalem*

<sup>1</sup> Alam u laba raien mena osa mia tara tolaala ba lam e seil hamatskö uam tara töa tolo i Kos. Ba u hamahö ba lam ena tuku mia tara tana tolo i Routes. Ba lam e laba nem i Routes me la uam tara taun i Patara. <sup>2</sup> Ba lam ena sabeiem a töa tolaala te katsin la uu tara provins i Ponisia, ba lam e osa mia i tanen me lam. <sup>3</sup> Ba lam e tarem a tolo i Saiprus me la karasa ba mena mien tara pal keruka me lam. Ba lam e la uaiem tara provins i Siria mena sung mia tara taun i Taia. A tolaala ega hakouleia a kakö tara han teka. <sup>4</sup> Alam u tarer u kristen tara han teka, ba lam e ka gono mera men u tohit u lan. Tara nitagala turu Namnamei tere Sunahan nori i ranga mei e Pol tegoma la uaien i Jerusalem. <sup>5</sup> Pöata te kapaia a man lan i tamulam tara han teka, ba lam e takeim me lam. U



kristen hoboto, a man munmun tahol na galapien i taren emi hipiouia ielesala tara taun. Ba lam e hatukun mia i kotolana me singom. <sup>6</sup> Ba lam e hiahhanhanga gono mera men, mena osa mia tara tolaala, ba nori e la poutsur i han i taren.

*I Sisaria e Agabas e hatein u ranga tara propet*

<sup>7</sup> Alam u osaia tara tolaala mena tuku mia tara taun i Tolemes. Ba lam e tara rem u kristen, be ka gono mera men u töa u lan. <sup>8</sup> Ba turu hamahö ba lam e la uaiem i Sisaria tina tuku ia lam i luma tere Pilip, a katuun te hahabulunganein u raranga tere Sunahan. Nonei a töa tara tohit a katuun ti hopö kapir i Jerusalem ba lam e ka gono memen. <sup>9</sup> Nonei e ka mei a tohats a pien tahol a kukubei i tanen ti atein rangein u raranga turu propet. <sup>10</sup> Pöata ti gamon kaia lam, ba töa propet a solonen e Agabas e gala nama i Judia. <sup>11</sup> Nonei e la uama i tamulam be mi lueiena a lete tere Pol, be kitse nei a lete a peisanen, a man mounen na man limanen has. Ba nonei e poeiena, “U Namnamei u Göagono tere Sunahan e mar ranga uana teka, ‘U Jiu i Jerusalem ena markato has uariou teka ba nori te kitseriou a katuun terena lete teka. Ba nori te hala mena rouien turu katuun tema Jiu ri.’ ”

<sup>12</sup> Tara pöata tu hengoeia lam a ka teka, ba lam na u katuun hoboto e ranga hataatagi tori silem e Pol tegoma la uaien i Jerusalem. <sup>13</sup> Ba nonei e ranga palisina me poeiena, “Aha te tabe sile milimiou? Alimiou e kato hatitiama koruemiou a torir. Te ngilin kits narouen lia tara karabus, alia e tatei karabusugu, na lia e haniga hasigu tegona mate sil menai lia e Iesu i Jerusalem.”

<sup>14</sup> Nonei e tagala sil koru tega la uaien ba lam e hanöam me poeiem, “E Sunahan e tatei kato mena neien turu ngil i tanen.”

<sup>15</sup> Ba lam e kato hamatsköem a manka i tamulam be kete sei uaiam i Jerusalem. <sup>16</sup> A palair u katunura i Sisaria ti hamanaia tere Iesu i la gono has meraiou lam. Ba nori ena piou raria lam i luma tere Nason, a katununa tara tolo i Saiprus. Nonei e kaia turu katuun ti hamanaia tere Iesu i manasa noa, ba lam ena ka mia i luma i tanen.

### *E Pol e tari e Jemis*

<sup>17</sup> Tara pöata tu tukuia lam i Jerusalem ba pal katuun ti hamanaia tere Iesu e sasaala koru mer ti tara meraien lam. <sup>18</sup> Ba u hamahö be Pol e peigi ranou lam hoboto tuna tara menai lam e Jemis. A pal kapan tara pala tere Iesu i ka hoboto has. <sup>19</sup> Be Pol e hatsi söasa ranen, be hatei raneien a mananaka hoboto te katoe e Sunahan me poeiena, “E Sunahan e taguhe moulia ba nonei te kato be ranei u katuun tema Jiu ri a toukui a niga.”

<sup>20</sup> Pöata ti hengo naien a ka teka, ba nori e soloseier e Sunahan. Ba nori e poeier i tanen, “A tsi hatoulana, alö e atei silem u Jiu te hamana ria tere Iesu e para korur na nori hoboto e kukute hanigeier a man Lo tere Mosis. <sup>21</sup> Nori i hengen tu hatuts mera mei lö u Jiu hoboto te ka ria turu han turu katuun tema Jiu ri ba lö te poeiem nori gi tori tsuga ban a man Lo tere Mosis, ba lö e ranga has nem tegima hapö menaien a hatöatongo tere Sunahan tara galapien i taren, ba nori tema tatei kukute haseri a markato turu Jiu. <sup>22</sup> Gaha tala te katoe roura? Nori e hengo na riou te tuku hakapa uamula lö.

23 “Bora kato tala uu temar ranga uamulam. Alam e ka mem a tohats a tson te ka ria teka ti hamana uu iasa i matana e Sunahan. 24 Alö gona piou raien ba limiou te la hobotomiuu tara Luman Lotu Pan batena haröto nem tego matskö uaiam limiou tara Lo turu Jiu. Na lö go hol has beraien, ba nori te kobana ba ner u hulu i bakuren. Ba u katuun hoboto te atei sile riou u mamana u ranga ti ranga sil mei lö u katuun ema mana nei. Nori e atei sile riou alö te kukutem a man Lo tere Mosis. 25 Na alam u hala hakapa nela u pas turu katuun tema Jiu ri te hamana ria tere Iesu. U pas teka e hatei nena u haniga i tamulam tegi kato menaien a tohats puku a ka: nori egi agonein a ka te haats ba naria turu kesa, na nori egi agonein u rahatsing, na nori egi agonein a ka te kepa hamate naria i totongolonen na nori egi ma tsikolo ii.”

26 Be Pol e lu rena a pal tson, ba u hamahö ba nori e la hoboto uaier turu lotu. Na turu lotu teka nori ina tuol ia i matana pal kapan turu lotu turu Jiu me hamana uaier iasa tere Sunahan ti matskö uaieren tara Lo turu Jiu. Be Pol e tasuna tara Luman Lotu Pan bena hatei nena u haats i taren e katöe rouen turu hatohitina u lan. U haats teka e haröto nanou u raranga i taren e manana.

### *Nori i pile kapiin e Pol i Luman Lotu Pan*

27 Te katsin kapaia u tohit u lan teka, ba u Jiur i han i Eisia e röte ria e Pol i Luman Lotu Pan. Ba nori e kato haraharaha rer u katuun hoboto be pile kap ner e Pol. 28 Ba nori e ku hapanir me poeier, “U katunura i Israel, mi taguhu ramou lam! Nonei lasi a tson teka te hatuts rena u katuun tara man han hoboto tegi tori tsuga ba menai u katunura i Israel a Lo tere Mosis na Luman Lotu

Pan teka. Na tana ka lel has, nonei e piou hasir u katuun tema Jiu ri iahana Luman Lotu Pan ba nonei e kato habahi hakapena a makum a Göagono teka!”<sup>29</sup> Taraha nori i tara mami e Tropimas a toun Epesis me tara gono merien e Pol iahana taun, ba nori i poeier e Pol e la gono meien i Luman Lotu Pan.

<sup>30</sup> Ba u katuun iahana taun e hiagetageta hobotor, ba nori e piata gögonor me pile kap ner e Pol me las halakasa ba narien a Luman Lotu Pan. Ba nori e hapili boroboro raier u tamana tara Luman Lotu Pan. <sup>31</sup> Pöata ti katsin atungeien e Pol, ba u töa u raranga e la uana tara tsunono tara Ret-simen te poeiena u katuun hobotora i Jerusalem e hiagetagetar. <sup>32</sup> Ba tsunono e lu rena u soldia na palair u kepten ba nori e piata gala hobotor turu katuun. Ba pöata ti tareien a tsunono na u soldia, ba nori e hanöan singata ner e Pol. <sup>33</sup> Ba tsunono turu soldia e lana tere Pol me pile kap nanen ba nonei e ranga merena u soldia i tanen tegi kits menien a huol a tsien. Ba nonei e rangatana, “Esi nonei teka, na ha te katoe lalen?” <sup>34</sup> Ba u katuun e ku hobotor, ba palai e poeier a töa ka na palai e poeier a tana ka. U katuun i geta hapan koru, ba tsunono ema antunan hengo sabe nanei aha koru te butu lala. Ba nonei e ranga merena u katuun i tanen tegi lu menai e Pol i luman soldia. <sup>35</sup> Pöata te tukuia e Pol turu tötö tara luma ba u soldia e söata tuner e Pol, taraha u katuun i tagala sil korui tegi lu menaien. <sup>36</sup> U katuun i kukute raieren bate kur, “Atung hamate iam!”

*E Pol e ranga hatarareia turu katuun*

<sup>37</sup> Pöata ti sukuſukun taſu menai u ſoldia e Pol iahana luman ſoldia, ba nonei e poeiena tara tſunono turu ſoldia, “Alia e ka megu a tſi ranga i tamölö.”

Ba tſunono e poeiena, “Alö e hahatongon ranga uaiem turu HaGrik? <sup>38</sup> Alia e pei laſegu alö a toun Itsip tu kato haraharher u katuun me laſ mera nei u 4,000 u tſonun hihipuli me la mera neien tara makum a palaka.”

<sup>39</sup> Be Pol e poeiena, “Alia a toun Jiu na tara taun i Taſuſ, a taun te panina tara provins i Silisia. Alö go haniga ba lia te ranga gia turu katuun.”

<sup>40</sup> Ba tſunono e hanigana be Pol e tuoluna turu tötö tara luma be haſoasei nena a limanen turu katuun. Ba u katuun e kakamotor be Pol e ranga i taren turu HaHibru.

## 22

<sup>1</sup> Ba nonei e poeiena, “A man hatamana na man hatoulana, hengoiam ba lia te ranga hatarare gia i tamilimiou.” <sup>2</sup> Tara pöata ti hengoeien te ranga uaiem turu HaHibru, ba nori e kakamoto korur.

<sup>3</sup> Be Pol e poeiena, “Alia a toun Jiu ti poſeia i Taſuſ, a taun i Silisia. Kaba alia u pan ia tara taun teka i Jeruſalem na e Gamaliel nonei a tſon hihatuts i tar. Alia u tſiſiloia tara man Lo hoboto turu tuburara, na lia u tagala ſil koru tego kukute haniga menai lia e Sunahan, te kato haſ uami limiou hoboto i romana. <sup>4</sup> Alia u kato homir u katuun ti kukute a maroro tara nihamana te kukutie gulia i romana, e noaia ti mateia a palai. Alia u kits kap raien a tſien, a pal tſon na touhaliou haſ, na lia u hala meraiem tara karabus. <sup>5</sup> A tſunono pan turu pris na pal kapan hoboto turu Kout Pan turu Jiu e

atei siler te ranga hamana uagu lia. Alia u lu u pas ti koloto menai a pal tson teka turu Jiu i Damaskus. Ba lia e la uagu i Damaskus tegona pile kap merai lia u katuun tere Iesu, bate kits ragien u tsien bate la pouts mera gumeien i Jerusalem bate hahuna ragen.”

*E Pol e hatararein te palis menai e Iesu u hakats i tanen*

*(Aposol 9:1-19, Aposol 26:12-18)*

<sup>6</sup> Be Pol e ranga lenina me poeiena, “Pöata tu la noaia lia tara kalana me sukusukun butu gia i Damaskus, ba u töa u ualesala pan e songots butu nama i Kolö tara pal söasa me piraha hahise noulia. <sup>7</sup> Ba lia e rus uagu i puta turu tsiktsiki, me hengoegu u töa u ranga bate poeiena i tar, ‘O Sol, o Sol, aha te kato hakamits sile milö alia?’ <sup>8</sup> Ba lia e rangatagu, ‘O tsunono, alö esi?’ Ba nonei e poeiena i tar, ‘Alia e Iesu ni Nasaret, a katuun te kato hakamitse mölö. Te kato hakamits ramia lö u katuun i tar, alö e kato hakamits hase moulia.’ <sup>9</sup> A pal tson ti la gono meiou lia i tari u ualesala, kaba nori ima hengoi u ranga tara katuun te rangaia i tar. <sup>10</sup> Ba lia e poeiegu, ‘O tsunono, aha te katoe goulia?’ Ba Tsunono e poeiena i tar, ‘Alö go takei balö te lam i Damaskus, balö tena hengo namou a mamanaka hoboto te hopö kap mei lö e Sunahan tegona kati lö.’ <sup>11</sup> U ualesala teka e pan koru me kato hakiouena a matar, ba pal tson ti la gono meiou lia e pile ria i limar me las mena rilia i Damaskus.

<sup>12</sup> “A töa tson a solonen e Ananias e la uama i tar. Nonei a katuun te hatsunonei e Sunahan bate kukutiena a Lo i tarara, na u Jiu hoboto ti kaia

i Damaskus i haniga korueien. <sup>13</sup> Ba nonei e la nama memi tuoluna i rehir me poeiena, ‘O Sol, hatoulana i tar tere Kristo, alö go tara pouts!’ Ba nonei tara tsi poata puku has balia e tara poutsigu me töan tare gen. <sup>14</sup> Ba nonei e poeiena, ‘E Sunahan ti hatsunoni u tuburara e hopö kap naiou lö tego atei sil menai lö u ngil i tanen, na tego tara menai lö a Katuun a Matskö i tanen, na tego hengo menai lö u raranga i rung nen pepeisa. <sup>15</sup> Taraha, alö ena hatei namou e Iesu turu katuun hoboto, ba tena rarare mou a manka tu tari lö na tu hengoin lö. <sup>16</sup> Ga lö e hahalosem aha? Alö go takei bate luem a baptais. Alö go singo uu tara solonen ba nonei te galus ba nena a man markato a man omi i tamölö.’”

*E Pol e hatein a toukui te hopö kap beien e Sunahan*

<sup>17</sup> Be Pol e ranga lenina me poeiena, “I murina ti la pouts malia i Jerusalem, ba tara pöata tu singo ia lia i Luman Lotu Pan balia e hatareri u töa u hiharöto. <sup>18</sup> Alia u tarei e Iesu ba nonei e poeiena i tar, ‘Hasesei balö te laba boroboro nem i Jerusalem, taraha u katuun teka ema hengoe roui a ka te poa memi lö alia.’ <sup>19</sup> Ba lia e poeiegu, ‘O Tsunono, nori e atei sil koruer alia u la uu tara mamana luman lotu hoboto turu Jiu bate lu regu u katuun te hamana ria i tamölö. Ba lia tena haka ragien tara karabus bate hasingata has ragen. <sup>20</sup> Na tara pöata ti atung hamateien e Stiven, a tson te hahatein u raranga i tamölö, alia u ka has ia i rehiren. Alia u hanigein tegi kato hamate menaien, balia e tara kap negu a man hasobö turu katuun ti atung hamateien.’ <sup>21</sup> Ba Tsunono e

poeiena i tar, ‘La, alia e hala halehana menagi lö turu katuun tema Jiu ri.’ ”

<sup>22</sup> U katuun i hengoia tere Pol e antunaia teka, ba nori e ku hapan korur me poeier, “Atung ba naiam! Atung hamate iam! A mar katuun teka e möa koru tega tatei töatöa lel uaien!” <sup>23</sup> Ba tara pöata ti ku hapan noaien bate hula lapo ba ner u hasobö i taren me lapo sei has ner u köahu iasa. <sup>24</sup> Ba tsunono e ranga merena u soldia i tanen egi lu menaien iahana luman soldia. Ba nonei e ranga mera nen tegi lahus menaien tegoma hatei menai e Pol a ka te raharaha koru meraien u katuun. <sup>25</sup> Kaba tara pöata ti kitseien a lete, be Pol e ranga mena a töa kapten te tuol ia i rehinen me poeiena, “A lo ema haniga nanei tego lahus menai lö a toun Rom tema la noa uaneien turu kout.”

<sup>26</sup> Ba tara pöata te hengoeia a kapten u ranga teka ba nonei e lauana tara tsunono turu soldia mena poeiena i tanen, “Alö e katsin katoeiem aha? A tson teka a toun Rom!”

<sup>27</sup> Ba tsunono e lana tere Pol mena poeiena i tanen, “Hatei moulia, alö a toun Rom?” Be Pol e poeiena, “Aa alia a toun Rom.”

<sup>28</sup> Ba tsunono e poeiena “Alia a toun Rom, taraha alia u holin a moni pan.” Be Pol e ranga palisina me poeiena, “Alia a toun Rom has, i posa noa gono meilia.”

<sup>29</sup> Ba pal tson ti katsin rangateien bate lahuse ren e la haطومuri ba naren. Na tsunono e matout has tara pöata te sabe ien e Pol nonei a toun Rom, taraha nonei e kits hakapeia e Pol a tsien.

*E Pol e tuol ia i matar a pal kapan*



<sup>30</sup> A tsunono turu soldia e ngilin atei sil koruni a ka ti kout sil mei u Jiu e Pol. Ba turu hamahö ba nonei e hapurese nena a tsien tere Pol, ba tsunono e ranga merena u pris pan na pal kapan hoboto tegi gono hoboto uaien. Ba nonei e luena e Pol mena hatuole rien i mataren.

## 23

<sup>1</sup> Be Pol e tara hamatskö uana tara pal kapan me poeiena, “Man hatoulana, alia u ka mei u hakats u alesala nitöa i matana e Sunahan te la noa hasina i romana, a torir ema pei töe ii ‘Alö e kato homim.’ E möa.” <sup>2</sup> Ba tsunono pan turu pris, e Ananias e ranga merena u katuun ti tuol ia i rehina e Pol egi tapali a rungnen. <sup>3</sup> Te mar kato uaien teka be Pol e poeiena i tanen, “E Sunahan e tapala hase nou lö, taraha alö a katuun a nigan ranga tuun! Alö e gum silem tego kato hamatskö menai lö alia tara lo, kaba lö has te pekoem a lo, taraha alö e ranga memula u katuun teka egi tapale ioulia!”

<sup>4</sup> Ba u katuun ti tuol ia i rehina e Pol i poeier, “Alö e ranga homi nem a tsunono pan turu pris tere Sunahan!”

<sup>5</sup> Be Pol e poeiena, “Man hatoulana, alia ema atei sile gulei te tsunono pan uanen turu pris. Sanena tego atei sil mena lei lia nonei a tsunono pan turu pris, alia sane ma ranga homi nagu leien. Taraha, u Buku u Göagono e poeiena, ‘Alö goma ranga homi sile ii a katuun pan turu katuun i tamölö.’ ”

<sup>6</sup> Tara pöata te atei sileia e Pol u Sadiusi na u Parasi i ka hobotoia turu hagum pan teka, ba nonei e ku uana i taren me poeiena, “Man hatoulana, alia has a Parasi na pien turu Parasi. Alia

e ka gia turu kout, taraha alia e hamana gia tara tou takei pouts tara tou mate!”

<sup>7</sup>Nonei e ranga hakapa uu teka ba hiagetageta e taniana i gusuna u Parasi na u Sadiusi, ba u hagum teka e lakatana i hagus. <sup>8</sup>Taraha, u Sadiusi e roron poeier a katuun te matena ema takei pouts nei romana tara tou mate, na nori e roron pei haser e möa ta angelo na e möa has tu namnamei. Kaba u Parasi e roron hamana ria tara manka hoboto teka. <sup>9</sup>Ba hiagetageta teka e butu hapan susuluna, ba palair u tson hihatuts tara Lo tere Mosis ti kaia tara pala turu Parasi e tuolur me ranga sisir me poeier, “Alam ema sabiemi ta ka ta omi tara tson teka. Toum u namnamei tsi a angelo te ranga meien.”

<sup>10</sup>Pöata te takei hatagala susul ia a hiaraharaha, ba tsunono turu soldia e matoutena u katuun e namots las kakatser e Pol! Ba nonei e ranga merena u soldia egi la batena luba naruma e Pol bate la merumen tara luman soldia.

<sup>11</sup>Ba tara bong ba Tsunono e tuolna i rehina e Pol me poeiena, “Möa tu matout. Alö tu hatei nama lia i Jerusalem, alö ena markato has uamou teka i Rom.”

### *Nori i korupaköni e Pol*

<sup>12</sup>Tara bongbong bu Jiu e hagumur me korupakö ner e Pol. Nori i kati u hamal pan tegi atung hamate menai e Pol ba nori ema nou ri na ima ua has ii. <sup>13</sup>U hihase turu katuun ti kati u korupakö teka e kurapa harohi u tohats u maloto. <sup>14</sup>Ba nori e la uaier turu pris pan na tara pal kapan mena poeier, “Alam e katoe muma u hamal pan tegoma nou menai lam ta ka e noana tara pöata

te atung hamate moa lam e Pol. <sup>15</sup> Bora, alimiou na pal kapan turu Kout Pan ego hale mula tu raranga tara tsunono turu soldia na i Rom bate hatei muleien tego lu mena meien e Pol bate la merumen. Alimiou go gamo ramen bate poeiem-ula, ‘Alam e ngilin rangata lel namen.’ Ba lam tena hahalose men bate atung hamate mouen i mam tegomi tuku uaien teka.”

<sup>16</sup> Kaba a töa pien tson, a hanangona e Pol, e hengoan u korupakö teka, ba nonei e lana mena tasuna i luman soldia mena hateiena e Pol. <sup>17</sup> Be Pol e ngöena a töa kapten me poeiena, “Lu mena lei a pien tson teka tara tsunono turu soldia, taraha nonei e ka mena a töa ka tega hatei naien.” <sup>18</sup> Ba kapten teka e lue nen me na piou nanen tara tsunono mena poeiena, “E Pol a karabus e ngöe lalou lia me tahule nei lia tegomi piou menai a pien tson teka i tamölö, taraha nonei e ka mena a töa ka tega hatei naien i tamölö.”

<sup>19</sup> Ba tsunono e pile nena a limanen me gamon la hatalis menen me rangate nen, “Alö e katsin hatei mi lia aha?”

<sup>20</sup> Ba pien e poeiena, “U Jiu e haniga hoboto narima tegi rangata menaien lö tego lu mena lei lö e Pol turu Kout Pan i mahö. Nori e gamo rima bate poeier, ‘Alam e ngilin rangata lel nem tu harangata i tanen.’ <sup>21</sup> Kaba alö goma hengo raien, taraha u tohats u maloto tara katuun batena kurapana e mous riou bate hahalose ren. Nori e katoe rima u hamal pan tegima nou uaien na tegima ua has uaien e antunana tara pöata tegi atung hamateien e Pol. Nori e mous hahaloso

hamanasa tale ren, na nori e hahaloser u ranga i tamölö.”

<sup>22</sup> Ba tsunono e poeiena, “Möa tu hahatei ta töa ta katuun te hatei mena mulei lö alia a ka teka.” Ba nonei e hala poutseiena a pien.

*Nori i hala menai e Pol tere Piliks a gamman*

<sup>23</sup> Ba tsunono turu soldia e ngörena a huol a kapten i tanen me poeiena, “Lui a 200 tara soldia, na 70 turu katunura turu hos, na 200 turu katunura turu saka, ba limiou te takei mou i 9 kilok bate la mou i Sisaria tara bong i romana.

<sup>24</sup> Lu hasiam a man hos te hihitaguhu nariou tegi hosa menaien e Pol ba limiou te peito kap haniga namouen, ba limiou tena piou namien tere Piliks a gamman.” <sup>25</sup> Ba tsunono e kolotena u töa u pas tega markato uu teka:

<sup>26</sup> “O Piliks, alö a gamman te soloseie mulam. Alia e butu gia i tamölö i romana. Alia e Klodias Lisias. <sup>27</sup> U Jiu i pile kapiin a tson teka me katsin atung hamatie ren. Alia u hengoin nonei a toun Rom ba lia e la gono meregu u soldia i tar mena luba ragien u Jiu. <sup>28</sup> Alia u katsin atei sil aha ti kout sil meien balia te lu mena gien turu Kout Pan i taren. <sup>29</sup> Alia u sabe ti kout sil menaien a man kana tara lo peisa i taren, kaba nori ima kout sil meien ta ka tega antunaia tegi atung hamate menaien tsi tegi karabus menaien. <sup>30</sup> Na tara pöata tu hengo naia lia u Jiu i korupakö naien, ba lia te hala menagien i tamölö. Na lia u ranga mer u katuun ti kout meien egin hateia i mata mölö aha te kout sil merien. Nonei lasi a tsi ranga i tar.”

<sup>31</sup> Ba u soldia e hengoer u ranga tara tsunono i taren ba nori e luer e Pol mena piou narien tara

taun i Antipatris tara bong. <sup>32</sup> Ba u hamahö ba u soldia e kopis pouts uaier i luman soldia, ba u katunura turu hos e la gono mer e Pol. <sup>33</sup> Ba nori ena piou narien i Sisaria mena hala naier u pas tara gamman, ba nori e hatuoler e Pol i matanen. <sup>34-35</sup> Ba gamman e tarena u pas me rangatena e Pol, “A han tamölö i me?” Pöata te hengo naien e Pol a toun Silisia ba nonei e poeiena, “Alia e hengoe gou romana lö tara pöata te la ruma romana u katuun te kout nariou lö.” Ba nonei e ranga merena u soldia i tanen tegi pepeito kap haniga menai e Pol iahana luman gamman tere Herot.

## 24

### *A pal kapan turu Jiu i koutin e Pol*

<sup>1</sup> U tolima u lan e kapa, be Ananias a tsunono pan turu pris e la uanama i Sisaria me la gono mera nama a pal kapan turu Jiu, na katunun raranga i taren, a solonen e Tetulus. Ba nori e hateieri e Piliks a gamman u ranga ti katsin kout meien e Pol. <sup>2</sup> Ba gamman e ngöena e Pol.

Be Tetulus e tanian sake nei e Pol u ranga me poeiena, “A tsi tsunono o Piliks, alö u taguhu raiou lam tara nigumgum a niga koru na e möa ta hi-atatung tega butu. Na turu hakats u niga i tamölö, alö u taguhir a pala i tamulam tu hamatskö menai a manka man para te omi i manasa turu han hoboto. <sup>3</sup> A torimulam e haniga koruena a ka teka, ba lam te haniga koru hase mölö. <sup>4</sup> Kaba alia e namots hatu kap nagou lö a pöata lehana. Alia e ranga hataatagi gia i tamölö tego hengo menai lö u ranga i tamulam.

<sup>5</sup> “Alam u sabe a tson teka e Pol a katununa tara markato a omi. Nonei e roron habutena a raharaha na hiata tung i gusur u Jiu tara han hoboto i puta. Na nonei a töa tson mammam has turu katuun ti lukater a pala i tamulam me ka uaier tara tana pala te ngö rari a hun katunura i Nasaret. <sup>6</sup> Nonei e torohana hasi tega kato hakorkoriana menaien a Luman Lotu Pan i tamulam, kaba lam u pile kap naien. Na lam u ngilin kout naien tara lo i tamulam. <sup>7</sup> Kaba a tsunono e Lisias na u soldia i tanen i tagala koru, me luba rarien lam. <sup>8</sup> Na e Lisias e ranga mer u katuun ti katsin kout naien egimi butuia i tamölö. Ba lö noahas te tatei rangate men, balö te tatei atei peisa moa i tanen a mamanaka te kout memien lam.” E Tetulus temar ranga u teka. <sup>9</sup> U Jiu has i taguhe ien me saka menari u ranga tere Pol. Nori i ranga hatei hoboto me poeier, “A man raranga hoboto teka e manana.”

### *E Pol e hatein u ranga i matana e Piliks*

<sup>10</sup> Ba gamman e hanigana tega kato menai e Pol u raranga i tanen. Be Pol e poeiena,

“Alia e atei silegu turu hiningal u para alö a tsonun hahamou turu ranga tara pala i tamulam u Jiu. Ba lia te sasaala megu te ranga palis uagu lia i tamölö. <sup>11</sup> Te rangata ramouen lö balö te tatei ase hase mou u töa u maloto na u huol u lan puku te kapa tu la uu lia i Jerusalem tegona kato menai u lotu. <sup>12</sup> Na pal kapan turu Jiu ima tarei tego hiata tung gonö menai lia ta töa ta katuun turu ranga iahana Luman Lotu Pan. Na nori ima tara hasei tego hatakei mei lia tu hagum tu omi turu katuun iahana a man luman lotu tsi iahana taun.

E möa. <sup>13</sup> Na turu ranga te kout merien lia, nori ema antunan habutu naroui tu töa ta mouna tu raranga te tatei kato hamanena u ranga i taren teka. E möa. <sup>14</sup> Kaba alia e hatei goulö, nonei a Maroro teka tara Tsunono te ngöe rien ‘A markato te peko menari a hun katuun,’ e manana alia e roron kukutie gen. Alia e kukutiegu a Maroro teka ba lia te singo uagu tara Got turu tubumulam e Sunahan. Alia e hamanegu u raranga hoboto te kana tara Lo tere Sunahan na u ranga hoboto ti kolotein u propet. <sup>15</sup> Na lia e hamana silegu nonei a ka te hamana sil hase ren, nonei te hatakei poutse noua romana e Sunahan u katuun ti mate, u katuun u matskö na u katuun tema matskö has ri. <sup>16</sup> Ba tara mamana pöata a torir e tagala silena tego matskö uu lia i matana e Sunahan na i matar u katuun has.”

<sup>17</sup> Be Pol e ranga lenina me poeiena, “Tara man hiningal te la hakapa alia u kaia tara palaina u han, ba lia e töan la pouts uagu i Jerusalem. Alia u la mema u moni tegona taguhu merai lia u katuun ti möa ta ka, na lia u la sil hasi tegona haats uu lia tere Sunahan. <sup>18</sup> Na lia u kato hakapi a markato tego gogoso uu lia i matana a Lo. Alia u markato u teka iahana a Luman Lotu Pan ba nori e tare riou lia. Na e möa ta pal katuun tegi ka gono meiou lia, na e möa has tu geta. <sup>19</sup> Kaba a palair u Jiu ri Eisia e mi pile kap naiou lia. Na te ka merien tu ranga i tar, nori gi la uama i matamölö bate kout nariou lia. <sup>20</sup> Te möa nen, ba u katuun teka te hatei rilö a saha a nomi ti sabeien i tar, tara pöata tu tuol ia lia i matana u Kout Pan turu Jiu. <sup>21</sup> Toum u töa puku lasi u ranga. Pöata tu tuol ia lia i gasuren

ba lia e mar ku uagu teka, ‘Alia e hamanegu e Sunahan e hatakei pouts rena romana u katuun ti mate. Nonei lasi a mouna a ka te kout merien lia i matamilimiou.’ ” E Pol emar ranga uu teka.

<sup>22</sup> E Piliks e molo atei haniga sil u nihamana na markato turu kristen. Ba nonei e ranga mera nei u Jiu egi hahaloso ba nonei e poeiena, “Pöata te la nama romana a tsunono e Lisias, ba lia te tatei hamatsköe gou u ranga i tamilimiou.” <sup>23</sup> Nonei e rurari u hagum me ranga menei a kapten turu soldia ega hakeia e Pol tara karabus, kaba nonei e goma hakarabus hatagala korueien. Na nonei e hanigeir a man hahikapien tere Pol tegi taguhu menaien tara matsi ka te ngileien.

### *E Piliks e hakeia e Pol tara karabus turu huol u hiningal*

<sup>24</sup> U lahisa u lan e kapa, be Piliks e la gono menama a tahol i tanen e Drusila a toun Jiu. Be Piliks e ngöena e Pol me hengoeiena u raranga i tanen te hatei naiena a mouna a ka te hamana siler u kristen tere Iesu Kristo. <sup>25</sup> Pöata te raranga naia e Pol a markato a matskö, na tega hala puta menai a katuun u ngil i peisanen, na te kout gono mera noua e Sunahan u katuun, be Piliks e matout koruna me poeiena, “La tala. Te ka megoua lia ta pöata ba lia te ngö lele goulö.” <sup>26</sup> E Piliks e hakatsin e Pol ega haleien ta moni ba nonei te hapurese nen tara karabus. A pöata a para nonei e roron ngö menaien i tanen bate hiararanga gono menen.

<sup>27</sup> U huol u hiningal e la hakapa, be Posius Pestus e palisena e Piliks tara toukui i tanen. E Piliks e ngilir u Jiu egi haniga uu i tanen ba nonei ema hapurese ba nanei e Pol tara karabus.



## 25

### *E Pol e kato sil tega la uaieren tere Sisa*

<sup>1</sup> E Pestus e la hakapa uama i Sisaria tegomi tara kap menaieren a provins i tanen, ba i murina u topisa u lan ba nonei e laba nenama i Sisaria me kete sei uana i Jerusalem. <sup>2-3</sup> Ba u pris pan na pal kapan turu Jiu e la uaieren i tanen me sakere e Pol a man ranga. Nori i ranga hatagala uu tere Pestus me poeier, “Alö go taguhu ramou lam balö te hala mena mumei e Pol i Jerusalem.” Nori i ngilin na mous kap ia i mam tara maroro tegi sila meia e Pol bate pulie ren. <sup>4</sup> Be Pestus e ranga palis uana i taren me poeiena, “E Pol e karabus na i Sisaria. E ma lehana noi balia te la uagou i Sisaria. <sup>5</sup> Na pal kapan i tamilimiou e tatei la gono has meriou lia. Na te kato homi ia a katuun teka ba limiou te tatei na kout gono memen.”

<sup>6</sup> Pöata te ka hakapa gono meraien e Pestus u töal tsi u maloto u lan, ba nonei e töan gala uana i Sisaria. Ba u hamahö ba nonei e gumna tara luman kout, ba nonei e hangö na lala e Pol. <sup>7</sup> Pöata te tuku hakapa ia e Pol ba u Jiu ti lama i Jerusalem e tuol hahise ren, ba nori e sake rien u parpara u ranga u tiama. Kaba nori ima antunan haröte ii e Pestus tego mana uu a man ranga teka. <sup>8</sup> Be Pol e mar ranga palis uana teka, “Alia uma katöe ii ta töa ta ka ta omi tara lo turu Jiu, na tara Luman Lotu Pan has, na tara gamman pan has e Sisa.”

<sup>9</sup> Kaba e Pestus e ngilin kato hasasaaler u Jiu. Ba nonei e rangatena e Pol, “Alö e ngilin la uam i Jerusalem balia tena hengoe goua u kout i tamölö i Jerusalem?”

<sup>10</sup> Kaba e Pol e pei, “A luma teka te tuol gia lia i romana nonei a luman kout tara gamman pan e Sisa. A luma lasi teka nonei a makum te tatei hengoe ria u kout i tar. Alö u atei hakapa, alia uma katoe ii ta töa ta ka ta omi turu Jiu. <sup>11</sup> Te ka megia lia ta ka ta omi, tsi tu katoeia lia ta töa ta ka te antunana tego mate mei lia, alia ema tatei bus ba nagi a nihahuna teka. Kaba e möa tega mana uu a man ranga te kout merien lia, na e möa has ta töa ta katuun tega hala menai lia i taren. Alia e hasoso silegu u kout pan tere Sisa!”

<sup>12</sup> Ba i murina te hiararanga gono mam meia e Pestus u tsonun pepeito i tanen me töan poeiena tere Pol, “Alö e kato silem tego la uu lö tere Sisa, bara nigana, alö e la uamou tere Sisa.”

### *E Pol e tuol ia i matana e Agripa na e Benis*

<sup>13</sup> I murina u lahisa u lan e la hakapa be Agripa a King na e hahinanen e Benis e tuku ria tara taun i Sisaria tegina tara menaien e Pestus. <sup>14</sup> Nori i gamon ka gono meien u lahisa u lan, be Pestus e ranga hatei nena e Pol tara king. Ba nonei e poeiena, “A töa tson e kana teka e karabus noaia tara pöata tere Piliks. <sup>15</sup> Tara pöata tu la uu lia i Jerusalem ba u pris pan na pal kapan turu Jiu e kout naren, ba nori e rangate riou lia tego pei menai lia nonei egi hahunei. <sup>16</sup> Ba lia e ranga palis meragen me poeiegu, ‘Alam a tei Rom ema hahuna mam memi a katuun i mam te gum hoboto mera nen u katuun te kout na ren, ba nonei te ka mena a pöata tego ranga palis menaien u ranga te kout merien u katuun.’

17 “Ba tara pöata ti gono hobotoien teka ba lia e haseseigu turu hamahö ba lia e gum gia turu gungum tara tsonun hahamou turu ranga be ngö regu u soldia tegi la mena meien e Pol i tar. 18 Ba u katuun ti kout meien e tuolur, kaba ima kout meien ta marka ta omi tu hakats meien lia. 19 Nori i raharaha meien a manka lasi turu lotu peisa i taren na tara töa katuun te mate, a solonen e Iesu. Be Pol e poeiena e Iesu e töatöa noahasina. 20 Alia uma atei sil hanigei u mar ranga te markato uana teka, ba lia e ranga megu e Pol tego tatei la pouts uaian i Jerusalem batena kout mera neien u ranga teka. 21 Kaba e Pol e ranga hatagala sil tega ka noa uaian tara karabus antunana tara pöata te la nen romana turu kout peisa tara gamman pan e Sisa. Balia e poeiegu egi tara kap noani e antunana tara pöata te hala nagien romana lia tere Sisa.” E Pestus te mar ranga uu teka.

22 Be Agripa e poeiena tere Pestus, “Alia e ngilin hengo negu u ranga tara katuun teka.” Be Pestus e poeiena, “Alö e hengoe men romana i mahö.”

23 Ba turu hamahö be Agripa mere Benis e la gono merima u hiharöto pan, ba nori ena tasu ria iahana makum te hengoe ria u kout. Ba u tsunono pan turu soldia na pal kapan tara taun e tasu gono meren. Be Pestus e hala nena u raranga ba nori e tasu merima e Pol. 24 Be Pestus e poeiena, “O King Agripa na u katuun hoboto te ka ria teka. Alimiou e tare miou a katuun teka, a solonen e Pol. U katuun hoboto turu Jiu i Jerusalem na teka has i hala sil meien tar tara man raranga man omi. Ba nori e ku hapan mer tegoma tatei töatöa lel uai e Pol. 25 Kaba alia uma sakei ta töa ta ka te tegi atung

hamate meien. Na nonei peisa e kato silena tega lauaien turu kout tere Sisa, balia e hanigagu tegi hala menaien. <sup>26</sup> Kaba alia uma koloto noei tu pas tere Sisa a tsunono i tar, taraha alia ema atei silegi aha tego ranga sil mei lia e Pol. Balia temi piou nagien i matamilimiou, na i mata mölö bala o King Agripa. Ba pöata te kapa noa a man harangata teka balia te ka toum megou ta ka tego koloto sil mei lia e Pol. <sup>27</sup> Taraha, alia e poeiegu ema niga nei tego hala menai lia a karabus turu kout pan balia tema hatei nagi a saha ka te kout sil merien.”

## 26

### *E Pol e rangaia i matana e Agripa*

<sup>1</sup> Be Agripa e poeiena tere Pol, “Alö e tatei ranga beiem a peisamölä.” Be Pol e hasoasei nena a limanen me hatanian rangana.

<sup>2</sup> Ba nonei e poeiena, “O King Agripa. Alia e sasaala koru megu te hengo memulei lö u kout i tar i romana balia te hatei negu a manka hoboto te kout sil meri lia u Jiu. <sup>3</sup> Taraha, alö e atei sil haniga koruem a markato hoboto na man harangata turu Jiu. Balia te ranga hataatagigu tego hengo menai lö alia ba tema haseseimi.

<sup>4</sup> “U Jiu hoboto e atei siler a markato i tar tu pien noaia lia bate antunana i romana. Nori e atei siler tu kaia lia i han, na i Jerusalem. <sup>5</sup> Nori e solon atei siler tu ka uu lia turu Parasi, a pala te kukute hamatskö koruer u lotu i tarara. Nori e tatei hatei ner a ka teka turu ngil peisa i taren.

<sup>6</sup> Na i romana alia e tuol gia teka turu kout, taraha alia e hamanegu te mana uana u raranga te hopö kapiin e Sunahan turu tuburara i manasa. <sup>7</sup> Nonei

u töa u raranga noahas te hamana ria a maloto na huol a hun katuun i tarara tegi lueiou, ba nori te hatsunono hapaner e Sunahan turu mamana u lan na tara mamana bong. Na nonei lasi u töa u nihamana teka te kout meri lia u Jiu, o King. <sup>8</sup> Ga e ha tsiponina balimiou te pei miou, ‘Ara ema hamana rei tego tatei hatakei pouts menai e Sunahan u katuun ti mate?’

<sup>9</sup> “I manasa alia has u pei go hitagala sil tego kato homi menai lia a solona e Iesu na i Nasaret. <sup>10</sup> Na lia u markato has uu teka i Jerusalem. Alia u lui u raranga u mal turu pris pan balia te hakarabus regu u katuun tere Sunahan. Na tara pöata ti katsin kato hamate raien balia te haniga hasigu. <sup>11</sup> Alia u hahuna hapara raien tara man luman lotu hoboto turu Jiu na u torohana hatagala sil tegi ranga uaien bate holis ner a manka ti hamanaien. Alia u raharaha homi koru raien me kute has meragien turu han i lehana tegona kato homi meraien lia.”

*E Pol e hatararein te palis menai e Iesu u hakats i tanen*

*(Aposol 9:1-19, Aposol 22:6-16)*

<sup>12</sup> Be Pol e ranga lenina me poeiena, “Alia u la mei u raranga u mal turu tson mammam turu pris na u katuun u kapan tego la uu lia i Damaskus tegona lu has merailia u kristen. <sup>13</sup> O King, alia u la noaia i maroro tara söasa balia e taregu u töa u ualesalana i Kolö te alesala balein a pitala, ba nonei e piraha hahise noulia na u katuun has ti la gono meiou lia. <sup>14</sup> Ba lam e rus hoboto uam i puta turu tsiktsiki, balia e hengoegu u töa u ranga turu HaHibru bate poeiena i tar, ‘O Sol, o Sol,

aha te kato hakamits sile milö alia? Alö peisa te kato hakamits poutsem a peisam. E here nei a bulmakau a tson te kiki hatoumurena a tsi ruei tara katuun i tanen.'

<sup>15</sup> “Ba lia e poeiegu, ‘O tsunono, esi alö?’ Ba Tsunono e poeiena, ‘Alia e Iesu, a katuun te kato hakamitse mölö. <sup>16</sup> Takei, ba lö te tuolum. Alia e butu sile gia i tamölö tego hopö kap mei lö balö te katunun kui uamou i tar. Alö ena hatei ramou u katuun, a ka te tare mula lö i romana na tara manka te haröte goui lia lö i murimuri. <sup>17</sup> Alia e hala mena goui lö tara honoto mölö na turu katuun tema Jiu ri, ba lia te taguhe gou romana lö ba nori tema kato homie roui lö. <sup>18</sup> Alia e hala sile goui lö tegona hatuts meraien lö u raranga i tar na tegi habirits ba menaien a man markato a man omi te here nei u kuhil. Alia e hala mena goui lö i taren tegi habirits uaieren tara markato a niga te here nei u ualesala, ba lö tena habirits ba ramien a nitagala tere Satan ba nori te habirits uaier tere Sunahan. Ba lia te luba negou a man markato a man omi turu katuun te hamana ria i tar, ba nori te lue riou a makum i taren i gusuna u katuun te hopö kap berai e Sunahan a peisanen.’ ”

*E Pol e hatararein a toukui i tanen*

<sup>19</sup> Be Pol e ranga noana me poeiena, “O King Agripa, alia uma hipus nai a kana i Kolö teka tu tare malia. <sup>20</sup> Alia u la mam uu i Damaskus mena hatei ragi u katuun tegi hakapa menaien a man markato a man omi na man hakats a man omi i taren bate habirits uaier tere Sunahan, na tegi kato menaien a manka te haröto nena ti hakapa koru menaien a markato a omi na u hakats u omi i taren. Na lia u kato has uu iesana i Jerusalem na

tara man han hoboto i Judia na turu katuun has tema Jiu ri. <sup>21</sup> Nonei lasi a ka teka ti lu sil mei lia u Jiu i Luman Lotu Pan be torohanan atung hamate riou lia. <sup>22</sup> Na te antunana i romana e Sunahan e taguhe ioulia, balia te tuol gia teka bate hatei negu a manka teka tara katuun papala na turu tsunono has. Na lia e katoegu u mar ranga noa lahas ti katoi u propet na e Mosis i manasa tara manka tega butu. <sup>23</sup> U ranga teka e poeiena e Mesaia a katuun te hahalose rara ega sagohi a kamits ba nonei te takei mam pouts noa tara tou mate ba nonei tena habulungana nena tego lu pouts merai e Sunahan u Jiu na u katuun tema Jiu ri.”

<sup>24</sup> Pöata te ranga noaia e Pol, be Pestus e kuna me poeiena, “O Pol, a baku mölö ema kui lel nei! A niatei pan i tamölö e kato hamomölöe noulö!”

<sup>25</sup> Be Pol e poeiena, “Alia ema momölö gi! U ranga i tar e manana na e matskö hasina. <sup>26</sup> U mana koru a King e atei silena a manka teka, na i matamölö alia ema matsingolo nagi tego ranga uu lia. Alia e atei hamana sil koruegu e möa ta ka tega mous bani a matamölö, taraha a manka teka ima katoei i mous. <sup>27</sup> King Agripa, alö e hamana has rem u propet tere Sunahan? Alia e atei silegu alö e hamanam.”

<sup>28</sup> Be Agripa e poeiena tere Pol, “Ga lö e tuke hasesei korue moulia tego hamana uu lia tere Iesu?”

<sup>29</sup> Be Pol e poeiena, “Hasesei tsi e möa, alia e matesil koruegu tego here menai lö alia, na u katuun hoboto has te hengoe riou lia i romana, kaba tara tsien puku teka.”

<sup>30</sup> Be King e takeina na e gamman na e Benis, na u katuun ti gum gono meien i takei has. <sup>31</sup> Ba pöata ti lakasaien ba nori e poeier, “A katuun teka ema katoe ii ta ka tegi atung hamate meien tsi tegi karabus meien.” <sup>32</sup> Be Agripa e poeiena tere Pestus, “Sanena a katuun teka tema kato peisa sile ii tega la uaien romana turu kout tere Sisa, nonei sanena e hapureseier.”

## 27

### *E Pole la uu i Rom*

<sup>1</sup> E gamman e hale iema u ranga tego osa uu lam tara tolaala bate la uaiem i Itali. Ba nori e lu rer ere Pol na palair u karabus be hapile rarien tara töa katuun a solonen e Julius. Nonei a töa tsunono te kaia turu soldia ti ngö rai a Retsimen tere Sisa. <sup>2</sup> Ba lam e osa mia tara töa tolaala na i Adramitium te katsin la uu tara man taun te ka ria i rehina a tasi tara provins i Eisia. Alam u la gono mei a töa tson a solonen e Aristakus, a toun Masedonia tara taun i Tesalonaika. <sup>3</sup> Bu hamahö ba lam ena tuku mia tara taun i Saidon be Julius e kato haniga koruena e Pol na e haniga hasein tegana tara menaien a matsi hahikapien i tanen ba nori te hale rien a matsi ka te ngileien. <sup>4</sup> Ba lam e takei ba pouts nem a han teka be seil uaiem i hapalana tolo i Saiprus te oho, taraha alam u lagi lalaia tara lomolomo. <sup>5</sup> Ba lam e seil haroho uaiem tara tasi i rehina provins i Silisia na i Pampilia mena tuku mia tara taun i Maira tara provins i Lisia. <sup>6</sup> Tara taun teka a tsunono turu soldia e sakei a töa tolaalana i Aleksenria te la uu i Itali, ba nonei e hosa ranou lam.



<sup>7</sup> Alam u seil hamokomoko koru u lahisa u lan me kato hatagala sil koruem tego la noa uu lam, ba lam ena butu mia tara taun i Nidus. A lomolomo e hatu raiou lam tego la noa uu lam tu mar la uu lam, ba lam e la karasa ba nem u oluna i Salmone me seil uaiem i hapalana a tolo i Krit te oho. <sup>8</sup> Ba lam e kui hatagala korum me seil sila mia i rehina kotolana me na tuku mia tara makum te ngöeri a Gohi a Maraha. Ema lehana banai a taun i Lasia.

<sup>9-10</sup> A pöata a para e la hakapa tala, ba pöata tara eihalata e butuna, a pöata turu tasi pan. Na ka e omi koru tego la noa u lam tara nilala teka. Be Pol e ranga mera nen me poeiena, “A matsi katuun, te la noa uarou ra teka bara te ka merou a nomi, ba kakö na tolaala te omi has nou, na u katuun.”

<sup>11</sup> Kaba a tsunono turu soldia ema hengoi u ranga tere Pol. Nonei e hengo lasi u ranga tara kapten tara tolaala na tara katuun tere na tolaala. <sup>12</sup> Na u katuun u parpara i ngilin la noahas tara nilala i taren, taraha a gohi teka ema niga korui tega hahaloso uu a tolaala bate antunana tega kapaia a pöata tara eihalata. Nori i ngilin torohanan lui a taun i Piniks, tegi antuna uaien. Nonei a gohi te kana i Krit te mata halhal ba nena a lomolomo tara pöata te posa hapanna u tasi. Na nori i ngilin hahalosoia i Piniks e antunana tara pöata tega kapaia u tasi pan.

### *U ualupu pan e takeima*

<sup>13</sup> A tsi lomolomo e biririma i pal tasi, ba u katuun e poeier nori i antunan na luni a han ti ngilin la uaien. Ba nori e tanian la hamanasar me seil sila ria i rehina koru u kotolana i Krit. <sup>14</sup> Ba e möa tega lehana uaien, ba u töa u ualupu pan e rus

gala uanama i tasi. <sup>15</sup> A tolaala ima antunan habir-its nai bate mata ualala tara lomolomo, ba lam e rongaronga ba namen ba lomolomo e söate iena a tolaala. <sup>16</sup> Ba lam e olo uaiem i hapalana a töa tolo te oho, a tsi tolo te ngöeri i Kauda. Tara makum teka alam u kui hatagala me las hasukusukeiam u boutuna tara tolaala.\* <sup>17</sup> Ba nori e las haseie ren ieluna tolaala. Ba nori e kits hahis haseri a tolaala pannen a rop a tagala, taraha a tolaala e namots taktakatana. Nori i matout tena pasasa uaren tara makumun kotolana te sukusuku uu i Afrika, ba nori e lu puteier u seil pan me rongarongeier a lomolomo bate söata peise iena a tolaala. <sup>18</sup> U ualupu e tagala koru me hula kato hagere noahas ranou lam. <sup>19</sup> Ba turu hamahö ba nori e tanian ba ner a kakö i tasi. Na turu hatopisana u lan ba nori e lu baba ner a man kaan kui tara tolaala. <sup>20</sup> A pöata tuma tara hamanasei lam a pitala na pitopito turu lan u para temar bahu hatagala koru las uu a lomolomo teka, alam uma ka hamanasa mei tu hamana tego niga uu lam.

<sup>21</sup> U katuun ima nou ii a pöata a lehana, be Pol e tuolna i gasuren me poeiena, “A matsi katuun, alimiou go mala hengoe moulia ba tema seil uamumei i Krit, ba ka a omi teka tema tatei butu neia i tarara. <sup>22</sup> Kaba e noahasina. Alia e hatei ragou limiou go tagalaia, e möa ta töa i tamilimiou ego tia iou romana. A tolaala puku lasi te tatei tia nou. <sup>23</sup> Taraha, i bong a töa angelo e tuol lala i rehir, a angelo tere Sunahan te hopö kap naiou lia, e Sunahan te hatsunone gulia. <sup>24</sup> A angelo e pei lala, ‘O Pol, alö goma matout ii. Alö ena tuol

---

\* **27:16:** A tsi bout te roron las nena a tolaala i kopinen.

noahas moa i matana e Sisa. E Sunahan e hapiou nanou tego mate uu ta töa ta katuun te ka gono menou lö tara tolaala, ba nonei te kato benoui lö a ka teka.’<sup>25</sup> Na matsi katuun, alimiou go tagalaiam, taraha alia e hamanegu e Sunahan, a ka e mar butu uanou romana temar ranga ualala a angelo.<sup>26</sup> Kaba ara ena pasasa roua tara töa tolo.”

<sup>27</sup> U maloto na tohats a bong e kapa, ba lam te hula olo noa has mia i tasi i Edria. Ba tara gusuna bong ba u boskuru e hasagoher te sukuuku uama u tsiktsiki. <sup>28</sup> Ba nori e harukueier a töa rop te kitsia a bol me noana turu huol u maloto a ngaha te ruku. E möa tega lehana uaien ba nori e haruku leneier a rop me noana tara maloto na tolina a ngaha. <sup>29</sup> Ba nori e matout mer a tolaala tena mots lapo kaakata mena neien turu hatu, ba nori e harukueier a tohats a hangga tara pal tou me singo siler a ka ega lan. <sup>30</sup> Ba u boskuru e katsin bus ba ner a tolaala ba nori e hakouler a tsi bout i tasi. Nori i gamo me poeier ina hakoul a hangga i pal mus. <sup>31</sup> Be Pol e poeiena tara tsunono turu ami na turu soldia, “Tema ka roui a pal tson teka tara tolaala, ba limiou te tia mou!” <sup>32</sup> Ba u soldia e ngats puser a man rop te tanga kapiin a tsi bout ba nonei e olona.

<sup>33</sup> A sukuukuna lunlan be Pol e ranga hataatagina turu katuun hoboto tegi nou menaien ta tsi kannou. Ba nonei e poeiena, “I romana u hamaloto na u tohats u lan tu agono menami limiou a kannou. Alimiou u toku sil korueiam a tolaala batema nouemi ta ka. <sup>34</sup> Na lia e ranga hataatagi mera goulimiou tego nou uaiam limiou. A tsi kannou e kato hatagala pouts ranou limiou.

Taraha e möa ta töa i tamilimiou tega antunan tia iou.” <sup>35</sup> E Pol e ranga hakapa lasi ba nonei e luena a beret me haniga uana tere Sunahan i matar u katuun hoboto. Ba nonei e posepose nen me tania nouna. <sup>36</sup> Ba peisaren hoboto e gigaha poutsuna ba nori e nou haser a tsi kannou. <sup>37</sup> Na alam hoboto tu kaia tara tolaala u antunaia tara 276 a katuun. <sup>38</sup> Pöata ti masul hobotoia u katuun ba nori e ba ner u wit i tasi te kato hagigahi a tolaala.

### *A tolaala e taktakata*

<sup>39</sup> Tara bongbong nori ima tara marei a han, kaba nori i tari a tsi töa tsi gohi te ka mei u kotolana, nori i ngilin hasungi a tolaala tara makum teka tegi antuna uaien. <sup>40</sup> Ba nori e ngats puseier a man rop tara hangga me laba naren i tasi. Ba tara töa pöata noahas a palai i puresei a man rop te kits kapiin a man hosen tou. Ba nori e haseier u seil i pal mus tega bahu menaien a lomolomo ba nori te la uaier i kotolana. <sup>41</sup> Ba tolaala e na sungna turu mats ba pal mus ena pasanana mema antunan tasese lel nei, ba u tasi e hula tegu nena a pal tou me tania taktakatana.

<sup>42</sup> U soldia i hakatsin tegi atung hamate meraien u karabus, taraha nori e namots ape sungor bate bus hakapar. <sup>43</sup> Kaba a tsunono tara ami e ngilin taguhin e Pol ba nonei e hapiou ranen. Ba nonei e ranga merena u katuun ti atein ape tegi kurapa uaien i tasi bate torohanan la mam uaier i kotolana. <sup>44</sup> Na palai tegi murimuri egi pileia tara man makumun palang na tara matsi makum te tapekoia tara tolaala. Tara markato teka ba lam ena tuku haniga hoboto mia i kotolana.

# 28

## *A tolo i Malta*

<sup>1</sup> Pöata tu sung hakapaia lam, ba lam e töan atei silem a tolo teka i ngöei i Malta. <sup>2</sup> U katunur tara tolo teka i kapiena haniga koru raiou lam. A langits e polo tania ba ka e hamuri koruna, ba nori e hatseier u tula me ngö rariou lam. <sup>3</sup> Ba e Pol ena soro hobotenama a kopa ruei, ba pöata temi hopöeien a rue turu tula ba töa kökötsi a omi e bus lakasa nenama u hiski memi kotena a limanen. <sup>4</sup> Pöata ti tareia u katunura tara tolo teka a kökötsi e kuteia i limana e Pol, ba nori e hiararangar me poeier, “A katuun banei teka a hihipuli romana. Nonei e katosabe nama i tasi, kaba a got na tara hipou e hapiou nena tega töatöa uaian.” <sup>5</sup> Be Pol e tsibil ba nena a kökötsi me rus uana turu tula, kaba e Pol ema lu homi ii. <sup>6</sup> Ba nori e pepeito kap ner tego puku uu a limanen tsi tego singotei rus uaian bate matena. Nori i solon hahaloso kaba nori ima tarei ta ka ta omi ega butuia i tanen, ba nori e paliser u hakats i taren me poeier, “Nonei a töa got.”

<sup>7</sup> E Publius, a tsunono tara tolo teka, e ka mei a makumun tsiktsiki te sukusukuia tara makum teka. Nonei e las raioulam ba lam e ka gono memen turu topisa u lan. <sup>8</sup> Tara pöata teka e tamana e Publius e opö mei a peisanen e lolanga mei a siki na e ka has mei u purus. Be Pol ena tare nen me singo uana tere Sunahan. Ba nonei e hatakopena a limanen i tanen me kato haniga poutse nen. <sup>9</sup> Pöata te kato uaian teka ba u katuun hoboto tara tolo teka ti ka mei a siki e la uarima i tanen banonei emi kato haniga pouts has ranen.

<sup>10</sup> Ba nori e hala rari lam a manka a man parpara. A töa tolaalana i Aleksenria e hahalosoia tara tolo teka tega kapa uu tasi pan. Ba i murina tu ka hakapaia lam tara tolo a topisa a tsihou, ba lam e katsin la lel talam, ba nori e hoseier a mamanaka hoboto tu ngili lam, tara tolaala.

### *E Pol e tukuia i Rom*

<sup>11</sup> Ba lam e osa mia tara tolaalana i Aleksenria me lam, a solonen u Mun Toulana u Puna e ohoia tara tolo ti kaia lam. <sup>12</sup> Ba lam ena hasung mia i Sirakus me keiem u topisa u lan. <sup>13</sup> Ba lam e laba nem a taun teka be sila mia i rehina kotolana mena sung mia tara taun i Ritsiam. Ba turu hamahö ba belbelaha\* e takei nama, ba turu hahuoluna u lan ba lam ena tuku mia i Puteoli. <sup>14</sup> Ba tara taun teka ba lam e saberaiam u katuun ti hamanaia tere Iesu. Ba nori e ngö rariou lam ba lam ena ka gono meramen u tohit u lan. Ba lam e töan la uaiem i Rom. <sup>15</sup> U katuun ti hamanaia tere Iesu i Rom i hengoin tu la uama lam, ba palai e taatago mera rime i lam tara taun te kaia i gusuna kalana a solonen a Hanin Töana i Apias. Na palai i taatago mera mei lam tara taun ti ngöei a Topisa Taven. Pöata te tara raien e Pol ba nonei e haniga uana tere Sunahan ba peisanen e tagala poutsuna.

### *A taun i Rom*

<sup>16</sup> Pöata tina tukuia lam i Rom ba tsunono turu soldia e haniga nena tego ka pepeisa uu e Pol na töa puku a soldia, tega taratara kap naien.

<sup>17</sup> U topisa u lan e la hakapa be Pol e ngö gögono rena a pal kapan turu Jiu. Pöata ti gono hoboto

---

\* **28:13:** Belbelaha, a lomolomo te takei nama i pal saut.

men ba nonei e poeiena i taren, “A matsi hahatoulana i tar, alia uma katoei ta töa ta ka tego tula puta menai lia u katuun i tarara na u mar hihatutsina turu tuburara. Kaba nori i karabuse ma lia i Jerusalem, ba nori e hala mena rilia turu katunura i Rom. <sup>18</sup> Pöata ti rangrangingatei lia ba nori e katsin hapurese riou lia, taraha nori ima sabie mei ta töa ta ka tegi atung hamate sile ien lia. <sup>19</sup> Kaba pöata tima haniga ia u Jiu, alia u möa lel ta maroro ba lia e töa kato silegu tego la peisa uu lia turu kout tere Sisa. Kaba alia ima ka mei ta ka tego kout gono sil merai lia a hun katuun i tar. <sup>20</sup> Nonei a ka teka te ngö gögono sil mera gi lia alimiou bate ngilin ranga gono mera goulimiou. Taraha, nonei a nihamana te kame gulia tara katuun te hahaloser u katunura i Israel te kits sile gia lia tara tsien teka.”

<sup>21</sup> Ba nori e poeier i tanen, “Alam uma luei tu pas i Judia tega ranga sile ioulö. Na man hahikapien i tamulam ima söata hase mei tu rangana i Judia tega markato uu teka, na e möa has ta katuun tega ranga homi sileiou lö. <sup>22</sup> Kaba alam e ngilem alö peisa tego hatei rameilam a ka te hamana mia lö. Taraha, alam e atei silem u katuun tara han hoboto ema ngileri u lotu teka.”

<sup>23</sup> Ba nori e hakeier u lan tegi gono hoboto meien e Pol, ba u katuun u parpara e la uarima tara makum te kaia e Pol. Tara bongbong mena antunena a lahibong nonei e ranga hatararein a Nipepeito tere Sunahan. Nonei e kato sil tega antunan palis meien u hakats i taren tere Iesu, bate hatei raneien u raranga te kana tara Lo tere Mosis na u raranga turu propet. <sup>24</sup> A palai i hamani a

ka te ranga naien, kaba a palai i hahamana naien.  
<sup>25</sup> Ba nori ema hiahanhaniga ri, ba pöata ti katsin taruraien be Pol e hala lel raneien ien u tana u raranga. Ba nonei e poeiena, “U Namnamei u Göagono tere Sunahan e ranga hamana i manasa tara pöata te harangeien e Aisaia a propet tere Sunahan me ranga gono mena u tubumilimiou.  
<sup>26</sup> Nonei e pei tere Aisaia:

‘Alö gona hateir u katuun teka bate poeiem,  
 Alimiou e hahengo mou bate hengo tuun las mou,  
     kaba limiou ema atei sile moi ta töa ta ka.  
     Alimiou e tara mou bate tara tuun las mou,  
     kaba alimiou ema tara hamana koru moi.

<sup>27</sup> Taraha, u katuun teka a tui i taren e bout hakapa,  
     na talingaren ema hengo haniga nei  
     na nori i hasoho hakapa hasi a mataren.  
 Nori e namots tara naier a mataren,  
     na e namots hengo naier a talinga ren,  
     ba tui taren te ateina.

Nori e raman habirits pouts uaier i tar balia te kato haniga pouts ragen.’

“E Sunahan temar ranga uu teka.”

<sup>28-29</sup> Be Pol e pei hasena, “Na lia e hatei ragoui limiou, a nihitaguhi teka tere Sunahan e la tala uana turu katuun tema Jiu ri, nori tena hengo riou.” Pöata te ranga hakapa ia e Pol ba u Jiu e tarurar me hiangenngenar.

<sup>30</sup> Nonei e kaia tara makum teka u huol u hinin-gal na e hol peisa hasi a makum te kaien na e haniga koru hasir u katuun hoboto timi tareien.

<sup>31</sup> Nonei e hihatutsin a Tsunono e Iesu Kristo na Nipepeito tere Sunahan. Nonei ema matout ii, na e möa ta katuun tega hapiou naien.



**U BULUNGANA U NIGA**  
**The New Testament in the Halia Language of Papua**  
**New Guinea**  
**Nupela Testamen long tokples Halia long Niugini**

copyright © 2020 Wycliffe Bible Translators, Inc.

Language: Halia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-08

---

PDF generated using Haiola and XeLaTeX on 8 Mar 2023 from source files dated 5 May 2022

03815460-d6a0-5a59-aa7b-2a4278f7e67d